

ASO LUA, 24 ME 2022

Na nofoia e le Fofoga Fetalai le Nofoa i le itula e 9:30 i le taeao.

Tatalo.

FOFOGA FETALAI: Ou te faasilasila atu ua amatalia nei Taulumaga a le Fono Aoao Faitulafono.

Ou te faafeiloai atu i lenei taeao fou i le toe tauaofia ai o le tatou Palemene mo galuega ua faatulaga mo tatou felafolafoaiga. O paia o le Malae i Tiafau nei e le toe tau tapueina, a o mamalu foi o le Maota nei, ua o se uluvai manino e pei o le upu i Matavai e faafailele ai aloalii o le atunuu, e le gafatia e se gagana a le Nofoa ona tau soofau le pua ma le laau. Ua tatou fesilafai i lenei taeao, ua le o se tala nai olofaga, a o le manino i manu na apelepele mai le lagi, ua o se taeao foi nai le papa o le puataupea, aua ua le o Sasae po o Sisifo, po o le vao foi e i ai mauga, a o le Atua na te faamasinoina. O Ia na te faamaualaloina le tagata, o Ia foi na te faaeaina i luga le tagata. Na te le faia lava lo tatou tofi ma faaupegamaa. Ia foi atu pea ia le viiga ia te Ia, aua o tatou o le nuu ma le lafumamoe na ia fafagaina, o lea ua tatou fesilafai ai i manu ma oaoa ai i faleseu i lenei taeao ua maleifua mai ai i le lagi e mama ma le soifua manuia le paia o le Palemene. I le afio o lau Afioga i le Tamaitai Palemia, afio lau Afioga i le Sui Palemia, afifio a outou Afioga i Minisita o le Kapeneta, ae tainane a outou Afioga i Minisita Lagolago.

Afio le Sui Taitai o le Itu Agai ma le mamalu o sui usufono o le Palemene. Ou te ofo alofa ma faatalofa atu i lenei taeao, malo le soifua manuia ma le lagi e mama.

E faatalofa atu i Ofisa Sili o Pulega o Matagaluega ma Faalapotopotoga Tumaoti a lo tatou Malo ua mafai ona tatou mafuta i lenei taeao.

E fia afea foi i se faatalofa i lenei taeao le tapuaiga a le Afioga i Le Ao Mamalu o le Malo ma le Masiofo, le Sui Tofia ma lou faletua, le Faamasino Sili ma le mamalu o le Faamasinoga. E ofo alofa ma faatalofa atu lau Palemene i lenei taeao.

Lau tapuaiga Samoa le atunuu pele, i ou tulaga faalagia, o mamalu lava mai le vavau e oo atu lava i le faavavau, e leai se na te toe autalaina, nuunuu atu ia i le fatuaiga tausii a tulatoa ma totooouli o le atunuu. Le tapuaiga mana a auauna o le talalelei, matou faatalofa atu i lenei taeao i le alofaiva o le tatou Maota i lenei taeao, ia agalelei le Alii ma faaaupegaina mai le Alii le tofa.

Manuia le usugafono a le paia o le Palemene, manuia le tapuai mai o si o tatou atunuu.

ISI FAASILASILAGA A LE FOFOGA FETALAI

FOFOGA FETALAI: Mo le silafia e le Palemene, ua ou taulimaina nei se Faitioga Tusitusia e faatatau i le Lagaina o se Mataupu Tau Tulaga Aloaia, e pei ona aiaia i Tulafono Tumau 178(1).

O lea Faitioga Tusitusia, e tauala mai i se tasi o sui usufono o lenei Maota, e faasaga i se isi sui usufono o le Palemene.

E tusa ai ma aiaiga o Tulafono Tumau 180(1), ua maea ona tuuina atu e Lē e ana lenei Mataupu ia le kopi o lana Faitioga Tusitusia i le sui usufono o lo o faasaga i ai, mo lona silafia manino o le mataupu, ma ua ou lipotiina mai ma faailoaina atu mo le silafia e le Maota, e tusa ai ma aiaiga o Tulafono Tumau 180(2).

E tusa ai o le aloaia o tofiga o sui usufono mamalu o le Maota, o le a le mafai ona ou faailoaina atu i lenei taeao ia suafa o sui usufono o aafia i lenei mataupu, ona o se mataupu e le o i se tulaga ua faamaonia.

E tusa ai ma Tulafono Tumau 178(2), o le a iloilo e le Fofoga Fetalai le tulaga o le faitioga o lenei mataupu mo sana Faaiuga, po o ua fesiligia ai tulaga aloaia o le Palemene i le mataupu ua tuuina mai.

Ona o lea, ou te poloaia ai le sui usufono mamalu o lo o faasaga i ai lenei Faitioga, ina ia tuuina mai sana Tali Tusitusia i le Faitioga ua ia taulimaina, ia le silia le itula e 4:00 i le afiafi (4pm) o le Aso Lua 31 o Me 2022, mo le iloiloga a le Fofoga Fetalai.

O le a faasilasila aloaia i luma o le Palemene le Faaiuga a le Fofoga Fetalai i lenei mataupu i lana fonotaga o le aso 21o Iuni 2022.

POLOAIGA O FAALAVELAVE TUTUPU FAAFUASEI

FOFOGA FETALAI: E faasilasila atu i le mamalu o le Palemene ua ou taulimaina nei le Poloaiga o Faalavelave Tutupu Faafuasei mo le Koviti-19, e pei ona faamaonia e Lana Afioga, O Le Ao o Le Malo, Tuimalealiifano Vaaletō'a Sualauvi II, i luga o le Fautuaga a le Kapeneta e pei ona taua i lalo, mo le faataatiaina i le Laulau-a-Fono:

1. Poloaiga o Faalavelave Tutupu Faafuasei Numera 79, na amata faamamaluina i le itula e 12:00 i le taeao o le Aso Lulu, 18 o Me 2022 seia aulia le itula e 11:59 i le po o le Aso Lua, 31 o Me 2022.

TUUINA ATU O LIPOTI A KOMITI FAA-PALEMENE

Na tolaulauina e le Failautusi le faasologa o Lipoti a Komiti Faa-Palemene e tusa ai ma T.T.52(5):

1. P.P.2022/2023 Nu.7, Lipoti a le Komiti o Tulaga Aloaia ma Amio Taualoa i le P.P.2022/2023 Nu.5, Faitioga Tusitusia Aloaia na tuuina mai e le Sui Palemia e faasaga i sui usufono o Itumalo Palota o Lepa & Faleata Numera 3 ma le P.P.2022/2023 Nu.6, Tali Tusitusia a sui usufono o Itumalo Palota o Lepa & Faleata Numera 3 i Faitioga Tusitusia Aloaia na tuuina mai e le Afioga i le Sui Palemia.

ILOILOGA O LIPOTI A KOMITI FAA-PALEMENE

P.P.2022/2023 NU.7, LIPOTI A LE KOMITI O TULAGA ALOAIA MA AMIO TAUALOA I LE P.P.2022/2023 NU.5, FAITIOGA ALOAIA NA TUUINA MAI E LE SUI PALEMIA E FAASAGA I SUI USUFONO O ITUMALO PALOTA O LEPA & FALEATA NUMERA 3 MA LE P.P.2022/2023 Nu.6, TALI TUSITUSIA A SUI USUFONO O ITUMALO PALOTA O LEPA & FALEATA NUMERA 3 I FAITIOGA ALOAIA NA TUUINA MAI E LE SUI PALEMIA

FOFOGA FETALAI: Na ona ou toe faamanino mo le silafia e le tatou Maota, e tusa ai o le Lafo na faatuina ma faamaonia e le Fono Aoao Faitulafono i le aso 17 Me 2022, o le aso Fono leni e toe lipoti mai ai le Komiti o Tulaga Aloaia ma Amio Taualoa i le Fono Aoao i Galuega na tuuina atu i ai e tusa ai ma aiaiga o Tulafono Tumau 181(2).

E tusa ai foi ma Tulafono Tumau 182, e tatau ona tuuina atu le faamuamua i so o se Lipoti a le Komiti o Tulaga Aloaia ma Amio Taualoa i se mataupu e fesiligia ai tulaga aloaia, nai lo isi galuega a le Fono Aoao.

Ma o le a sagai atu loa le Fono Aoao mo le iloiloina o le Lipoti a le Komiti o Tulaga Aloaia ma Amio Taualoa e pei ona faataatia i le Laulau-a-Fono i le taeao nei.

O le taeao nei ua faataatia ai le lipoti a le...

Tofa Hon Laufo Fonotoe Nuafesili Pierre Laufo (Anoamaa 2): Lau Afioga i le Fofoga Fetalai, pe maua se avanoa faamolemole...

FOFOGA FETALAI: A le Komiti o Tulaga Aloaia ma Amio Taualoa i le Laulau-a-Fono...

Tofa Hon Lauofo Fonotoe Nuafesili Pierre Lauofo: Lau Afioga i le Fofoga Fetalai, e faaoioi atu so matou avanoa, o le fesili faamolemole e fia malamalama ai.

FOFOGA FETALAI: Ia, atonu e i ai se taimi lau Afioga i le Sui Taitai o le Itu Agai se i faaauau atu le tatou galuega.

Tofa Hon Lauofo Fonotoe Nuafesili Pierre Lauofo: Faafetai.

FOFOGA FETALAI: O le taeao nei, ua faataatia le Lipoti a le Komiti o Tulaga Aloaia ma Amio Taualoa i le Laulau-a-Fono.

E tusa ai ma Tulafono Tumau 52(3), ua maea ona tuuina atu le Lipoti a le Komiti i le Failautusi mo le Tuuina mai i le Fono Aoao. O lea Lipoti na autasi uma i ai finagalo o sui usufono e toa-9 o le Komiti mo a latou Sailiiliga, Fautuaga ma le Iugafono. E le toe tau faailoaina atu foi i le Palemene, o lenei galuega ua faatulaga e tagofia e le Maota i le taeao nei e tusa o le lafo na faamaonia e le Fono Aoao Faitulafono.

O tulaga aloaia ia o le faagasologa o galuega fai a le tatou Palemene, peitai, o lea ua faaleo finagalo o nisi o sui usufono e toa-2 o le Komiti o Tulaga Aloaia ma Amio Taualoa e faapea ua finagalo e toe tuueseina mai a la saina ma le Lipoti a le Komiti, sa ioe muamua i ai ma saina ai o la aao. O Tulafono Tumau 166(6), o lo o atagia manino ai le aloaia o le faagasologa o lea tulaga. Afai e i ai se sui usufono e le malie i se Lipoti a se Komiti, e tataua ona folasia i luma o le Komiti ma mafai ai ona faatino aiaiga o Tulafono Tumau 166(2). O le faanoanoaga o le Nofoa ona o le tulai mai o lenei mataupu, e foliga e mama i se finagalo, ae atagia ai e le manatu i le mamalu o le Palemene. O le ioe o se sui usufono i se iugafono a se Komiti, ae toe tulai mai i se minute mulimuli i luma o le Palemene sona toe tetee, e le o se tulaga lelei. E le manaomia se tofa femoumouai i le Maota lenei, e le toe toloa foi galuega a le Palemene ua uma ona ioe i ai le Palemene ina ia faatino i le aso Fono lenei.

Na ona ou faapuupuu atu e faapea, o le a faamau la oulua tetee i faamaumauga, ae o le toe tagofia e le Komiti o lana Lipoti mo le suiga, e le talia e le Nofoa, o le a faaauau le tatou galuega.

Tofa Hon Lauofo Fonotoe Nuafesili Pierre Lauofo: Lau Afioga i le Fofoga Fetalai ou te tulai atu ma le faaaloalo, e puupuu lava se mataupu e fia oo i ai se lagona e tusa ai ma...

FOFOGA FETALAI: Ia, se i saunoa lau Afioga i le Sui Taitai po o se fesoasoani i le tatou galuega.

Tofa Hon Laufo Fonotoe Nuafesili Pierre Laufo: Faafetai i lau Afioga i le Fofoga Fetalai i lenei taeao fou, ua faafofoga foi Ieova i le taulaga siitia ua fai lea mo tatou, e amatalia ai le tatou galuega i lenei foi taeao. Ua faamalo foi le maleifua mai i pue o manu i le paia ma le mamalu o le Palemene, ua afea foi i lau saunoaga le tapuaiga a le atunuu o lo o taputapu mai o tatou faiva aua le faatinoina o le tatou galuega pei ona i ai. A o se lagona lau Afioga, ia o lea ua matau atu ua faamalieina le lafo sa faatuina ma pasia i le Maota Fono ina ia faataoto i le Laulau-a-Fono i le taeao lenei le Lipoti a le Komiti, Komiti o Tulaga Tauloa aua foi le mataupu e pei ona e saunoa i ai.

Ia, ae e faapea se lagona ma se tatalo i lau Afioga, ona o le faatauaina lava o le Fuaiupu 9 o le tatou Tulafono Faavae, so o se tagata e tuuaia i ni moliaga po o se mataupu, e ao lava ona maua le avanoa e tali ai, e le gata i le tuuaiga, aemaise lava se faasalaga, se faasalaga e faatulai mai ae le i faapena ona pasia e le mamalu o le Maota.

Lua o se lagona lau Afioga, o lea faatoa faataoto le tatou Lipoti o lea e tau faatopetope atu le faitau, ae talitonu o se mataupu taua tele lenei mataupu. E i ai le lagona e le tatau ona faatumutumulima pe faataetaealuga le tagofia o lenei mataupu, aemaise o lea foi e matau atu i le agai sao o se vaavaai i fautuaga, e aafia ai le tulaga o tofi o Afioga i sui usufono mamalu o le Maota, le Afioga i le Taitai o lenei foi Itu faapea foi le Susuga i le Failautusi, le Susuga ia Tuilaepa ma le Tofa ia Lealailepule. O vaega ia e pei ua mafua ai ona tulai atu, pei e fausia se tuualalo o lenei foi Itu aua o lea foi tatou te toe tauaofia i lea vaiaso, ia ae le o faatasi mai le Taitai o le Itu Agai ona o Tulafono tau le faamai, o la e o lo o faanofosea. E pei lava o le Aso Sa ea lea e lumanai nei e maea ai ona maua lea o se avanoa. Ona e agai se popolega lau Afioga i le fautuaga a le Komiti lea ua agai sao lava i ai lau vaai o le tuueseina lea o laua mai le Fono.

E pei e faapena se lagona lau Afioga, ae le tetee lava lenei Itu ma lou foi sui usufono, ae tatou faasee, o lea e manaia le mataupu lona lua lea ou te vaai atu i ai i le Pepa o Galuega, o tatou Tulafono foi ia e tolu, ona o lea e le o po se lilo, ua silafia e le atunuu o lo o toa le galuega i le Faamasinoga o Fanua ma Suafa. Ia, atonu o le avanoa lelei lenei e tatou te faaauau ai i lenei Lipoti i lenei taimi. E pei o le tulaga lea lau Afioga, ae o le a se finagalo, ae faatu atu se lafo, *Pe a faapea ina ia faataatia le tatou Lipoti se i talanoa i lea vaiaso, e momoli atu i ai e le Atua lo outou soifua ma so matou foi ola, a ua maua foi se avanoa e afio mai ai le Taitai o le Itu Agai, e pei o ia lea o lo o mamafa i ai le mataupu lenei, pau i ai le mamafa o le mataupu.*

Ia, pei o le tulai atu lea ma le faaloalo i lau Afioga i le Fofoga Fetalai i lenei taeao, ae o i ina o lo o i ai le pule e faatonutonufolau ai le tatou Fonousu. Ma le faaloalo tele.

FOFOGA FETALAI: Ia se i tulai mai le sui usufono.

Faaluaaina e le sui usufono mo Vaimauga 3.

FOFOGA FETALAI: Ia, se i tulai mai lau Afioga i le Palemia.

Afioga Hon Fiamē Naomi Mataafa (Palemia): Faafetai mo le avanoa. Ou te tulai atu ma le faaaloalo i lenei taeao e faafeiloai atu i lau Afioga ma le mamalu o le Maota Fono o Samoa. Ua matau atu i le faagasologa o le tatou galuega, o lea ua taatia mai le tatou mataupu muamua, o le tagofia lea o le Lipoti a le Komiti na tuuina atu i ai e le Palemene e iloiloina se faitioga a se tasi o sui usufono e faasino i nisi o sui usufono o le Maota. O le tatou Fonotaga talu ai na talosaga mai ai le Komiti e toe fia maua se isi taimi, ona faapea lea ona avatu foi le faatagaga a le Maota, a ia toe faataatia mai le latou Lipoti i le aso lenei.

Lau Afioga i le Fofoga Fetalai, o le mea muamua, o le tatou Tulafono Tumau, o mataupu nei o tulaga taualoa, e faasino i le amio a sui usufono e ave i ai le faamuamua i a tatou galuega e faagasolo. Ua maua atu i le saunoaga a le Afioga i le Sui Taitai o le Itu Agai, ua sii mai se vaega o le Tulafono Faavae i le tulaga foi lea o le avanoa e tali ai se ua molia.

Lau Afioga i le Fofoga Fetalai, ua tali le ua molia i le Komiti na filifilia e le Palemene latou te faatautaia le mataupu lenei. O le toesea foi o le na molia, na toesea ma le silafia lelei le mataupu lenei. Ma o le uiga lea lau Afioga i le Fofoga Fetalai ma le mamalu o le Palemene, ona o lea tatou te talanoaina tulaga o le taualoa ma le mamalu o le Palemene ma amioga a sui usufono o le Palemene, e faafesili foi i lou taofi le faataua ma le amanaia e le Taitai o le Itu Agai le mataupu lea ua faagasolo i luma o le Palemene.

Ou te manatu lau Afioga i le Fofoga Fetalai, ua i ai avanoa uma, o lea foi ua maua le avanoa e faitau ai Lipoti, o lea lava o lo o manino na faataatia mai le talia lelei o faamatalaga a e na molia ma le talifuaitau a le na faitio.

Lau Afioga i le Fofoga Fetalai, atonu o lea e silasila mai lau Afioga ma le mamalu o le Maota, e le o nofoia le nofoa o le sa tuuina atu lenei faitioga, le Afioga i le Sui Palemia, atonu ua oo mai se faanoi i lau Afioga, ae ao pea ona silafia ua faagasegasea le Afioga i le Sui Palemia i le faamai ua feagai nei ma tatou o le Koviti-19, le virasi.

Lau Afioga i le Fofoga Fetalai, atonu o le a le afaina foi lea, aua o lea foi e faanofoesea le na aumaia le moliaga, a o lea ua taatia lelei faamaumauga. I le itu la lea e talosaga mai ai le Itu Agai e toe tolopo le tatou mataupu, lau Afioga i le Fofoga Fetalai, ou te momoli atu le taofi o le Taitai o le Malo. O le mataupu lenei, o se mataupu ua ave i ai le faamuamua, o le tausiga lea o le mamalu o le Palemene. Ma afai e i ai se manaoga e taualuga i ai le faamoemoe o lenei Vaega Faaupufai ua tulai mai e faafoeina le Malo, ia toe faafoi mai i le Maota lenei ona mamalu, ma ia taulamua ia tatou uma i le tatou valaauina mo tatou tofi faa-faipule i le tausiga o le mamalu lea. Aua o

le itu lava lea lau Afioga i le Fofoga Fetalai ou te talitonu ua lava faamatalaga e fai ai le tatou faasoa ma le tatou faaiuga.

Ou te manatua le taimi mulimuli i le Paeaiga talu ai, na talanoaina ai foi i lalo o aiaiga o tulaga taualoa ia se tasi foi o sui usufono, taatia le Lipoti, talanoaina loa, faaauau le mataupu. Lau Afioga i le Fofoga Fetalai, ina ne i te i ua faagasolo aumai foi se finagalo o le Nofoa ae le i avatua so matou taofi. Ia, ma lou faaaloalo lava.

FOFOGA FETALAI: Malo faafetai malele, malo foi saunoa i lau Afioga i le Tamaitai Palemia o le Taitai o le tatou Malo. Ia ua matau atu foi o lea ua tau tulai mai foi le Sui Taitai o le Itu Agai ma ua faailoa mai foi lona finagalo i le taimi ua sola. Ia a o lea lava tou te silasila mai o lo o nofonofu atu lava le Fofoga Fetalai ma mataitu atu ma vaavaai atu i tulaga o le tatou Fono i lenei taeao. Ae manatu lava le Nofoa sa tuu atu pea le avanoa ina ia tuuina mai pea se faamatalaga e tusa ai o lenei faamoemoe.

Ae o lea ua saunoa manino le Taitai o le Malo. O lenei foi mataupu i totonu o tatou Tulafono Tumau e pei lava ona saunoa le Taitai o le Malo, e ave lava le faamuamua i tulaga aloaia, e faamulimuli lava isi mataupu a le Palemene ae ave lava le faamuamua. Aua o le matau foi a le Nofoa, e le i faataga faia le Komiti na filifilia e le Palemene, o le Komiti lava lea e toa-9 o le Komiti Filifilia a le Palemene ua uma ona asa uma ogasami uma o lenei mataupu. Ma e le na ma le laina o lea sa toe tolo mai le tatou feiloaiga talu ai ona o le avanoa lea pei ona saunoa mai ai lau Afioga i le Sui Taitai o le Itu Agai. E manatu tele i le itu lea, peitai o lea ua maea tapena uma itu uma ma vaega uma a le Komiti ina ia pupuni uma itu ia pei ona e taua, ma ua uma foi le feiloaiga a le Komiti ma le sui usufono mamalu e pei ona taua e le Sui Taitai o le Itu Agai le sui usufono o Lepa. Ua uma ona faaalua sona finagalo, ua uma foi ona tali i fesili a le mamalu o le Komiti, o lo o i ai foi lana faamatalaga tusitusia i totonu o le Komiti ma o lea ua i totonu o le Palemene.

Ia, o le ala lena o lea tou te silasila mai, e le o gae lava le Nofoa, o lo o toa lava le Nofoa ma le faaiuga o lenei mataupu. Ma e manatu foi, e leai o le mamalu lava o le tatou Palemene lea e tau saili atu, ioe. E vaavaai ma manatunatu i le mamalu o lenei Palemene ma ona tulaga aloaia, e le itiiti lenei faamoemoe o le Palemene e pei ona i ai. Ma o le mea moni lava ia, o lea o lo o i ai lava i a tatou Tulafono Tumau le ave o le tatou faamuamua. Ma o le Fono lenei, o le aso Fono faapitoa lava lea mo le Lipoti lenei, e leai lava se isi galuega a le Palemene o fuafua, o le galuega fuafua lava a le Palemene o le Lipoti lenei ona e avea i ai lana faamuamua.

O le mea lea le talosaga a lau Afioga i le Sui Taitai o le Itu Agai, ia ou te faamalulu atu ma faamalie atu i le talosaga, ua vaavaai lava le Nofoa i itu uma ma e talitonu foi, e leai e atagia ai lava le mamalu o le tatou Palemene pe a tatou o lava i a tatou Tulafono Tumau. O nisi tulaga e pei ona tau faailoa mai, e silafia lava tulaga faapena i le va o tatou ma totonu o Faamasinoga a

tatou lava ma tatou mataupu i totonu o le lotoifale o le Palemene, e mamalu lava o le Palemene ma tatou. E leai foi se isi mea i talaatu atu o le faaiuga a le Palemene lenei.

O le mea lea ou te faamalulu atu ai i lau Afioga i le Sui Taitai o le Itu Agai, ua le talia la outou talosaga, o le a faaauau le tatou galuega.

Tofa Hon Lauofo Fonotoe Nuafesili Pierre Lauofo: Faafetai lau Afioga i le Fofoga Fetalai. Ia o se avanoa lava e momoli atu ai le faafetai aua o lea ua faafogamaua le Maota i le saunoaga a le Afioga i le Tamaitai Palemia. Ae pau lava ia o nai itu lau Afioga o lo o taumafai atu ai, o le aano moni lava o lou tulai atu o le tausia lea o le mamalu o le Palemene. Ae pei lava foi ona silafia ma taumafai atu i le taimi ua tea, e le i maua se avanoa o le ua tuuaia e tali ai i le faasalaga. E sao lau saunoaga, e saolele foi le saunoaga a le Tamaitai Palemia, o lea sa tali i suesuega. Ae pei o faasalaga ia ua matau atu, pei e tei ai le vaai i le tulaga lea ua aumai ona o faasalaga ia ua aumai...

FOFOGA FETALAI: Se i saunoa mai lau Afioga i le Palemia.

Afioga Hon Fiaame Naomi Mataafa: Lau Afioga i le Fofoga Fetalai, o le mea e fia faasao, o le mea e fia faasao. E leai se aiaiga i totonu o Tulafono Faavae e tali ai se tagata i sona faasalaga i totonu o le Maota lenei. O le faaiuga a le Palemene, o le faaiuga lena e fai. Ma le faaaloalo.

FOFOGA FETALAI: Masalo ua e maua mai lau Afioga i le Sui Taitai o le Itu Agai, o lau Afioga foi ua lava foi lou silafia ma ua e matua foi i le Maota lenei.

Tofa Hon Lauofo Fonotoe Nuafesili Pierre Lauofo: Lau Afioga i le Fofoga Fetalai, faafetai i lau Afioga. E fai lava e lau Afioga le faaiuga, matou te le tetee lava i se tulaga...

FOFOGA FETALAI: Ia o lea ua avatu le faaiuga a le Nofoa... o lea ua maua...

Tofa Hon Lauofo Fonotoe Nuafesili Pierre Lauofo: Ae tau lava ina faapea atu ona ou nofo loa lea i lalo. E pei o le tulaga lena lea sa taumafai atu ai. O isi foi mataupu uma lava i totonu o le Maota lenei... sa i ai lava sui usufono ma auai sui usuofono e tali, ae peitai, o le tulaga lena ma le faaaloalo.

FOFOGA FETALAI: Se i tulai mai lau Afioga i le Minisita o Galuega.

Tofa Hon Olo Fiti Afoa Vaai (Minisita mo Galuega, Felauaiga ma Atinae Esee): Lau Afioga i le Fofoga Fetalai, masalo le Afioga i le Sui Taitai o le Itu Agai ua galo ia ia, na fai lava le faaiuga ia maua lea... e leai ma se ma tala na tali i totonu o le Palemene lenei, leaga ma te usitai i le Tulafono Tumau o le Maota, ae na leotele lava le latou ioe, e tutuli maua. E leai ma se tala e tasi pe lua na fai ai se ma tala i totonu o le Palemene. Ou te iloa ua galo i le Afioga i le sui Taitai.

Afioga Hon Lauofo Fonotoe Nuafesili Pierre Lauofo: Lau Afioga i le Fofoga Fetalai, ia faamalie atu e le o galo ia au. Ae ese mamao lava le mataupu la e saunoa mai ai ma le mataupu lea e agai atu ai le taeao lenei. E le o se mea tau privilege lena na tuli ai oulua. O le sao lena, e le o galo ia au o lea ou te manatua uma.

Lau Afioga i le Fofoga Fetalai, e faapena se lagona lea na faatu atu ai le lafo ma le agaga faaaloalo.

FOFOGA FETALAI: Ia faafetai, o lea ua maua le finagalo, o lea ua avatu le faaiuga a le Nofoa. Tulai mai le...

Tofa Lealailepule Rimoni Aiafi: Ia faafetai lava. E tulai atu e faafetai i lau Afioga mo lau faaiuga, e le toe faia foi se manatu. E faafetai foi i lau Afioga i le sui Taitai a lailoa lau Afioga. Ae tatou faatea lea mataupu, tatou faatalanoa. Aua tatou te popole o la e soifua le Atua.

FOFOGA FETALAI: Ia malo faafetai, o lea ua fesoasoani mai le sui usufono mamalu, e ui lava o ia lea e fitoitonu i ai, ae o lea ua saunoa, tatou faaauau. O lea tatou te malaga faatasi ma le Atua. O le mea lea le tatou Palemene, ia malu ave i vai foi lenei taeao i lo outou faafogafoga mai, tatou faamoemoe i le Atua, tatou talanoa ma le Atua e manuia ai lo tatou faamoemoe i lenei aso. O le mea lea, faafetai mo le finagalo faaalua o le sui usufono mamalu o lo o aafia, ae o lea lava e aumai lona agaga aua lenei mataupu.

Ou ta tapa ma le faaaloalo lau Afioga i le Taitaifono o le Komiti o Tulaga Aloaia ma Amio Taualoa, Hon Valasi Luapitofanua Toogamaga Taafito Selesele.

Afioga Hon VALASI LUAPITOFANUA TOOGAMAGA TAFITO SELESELE: (Taitaifono Komiti o Tulaga Aloaia ma Amio Taualoa): E avea ia au ma sui o le Komiti o Amio Taualoa, ma o au o le Taitaifono, ou te tulai atu e faapea, Lau Afioga i le Fofoga Fetalai, ou te tulai atu ma le faaaloalo e faatu le lafo, *Ina ia faamaonia e le Fono Aoa le Lipoti a le Komiti o Tulaga Aloaia ma Amio Taualoa i le Faitioga Tususia a le Afioga i le Sui Palemia e faasaga i sui usufono mo Itumalo Palota o Lepa ma*

Faleata 3, e faapea tali a sui usufono mo Lepa ma Faleata 3 i lea Faitioga, o lo o tuuina atu ai ma Sailiiliga ma ana Fautuaga.

Faaluaina e le Minisita o Faatoaga ma Faigafaiva, Minisita o Galuega ma le Minisita o Pisinisi ma Alamanuia.

Na faamaonia le lafo.

FOFOGA FETALAI: Tulai mai lau Afioga i le Taitaifono o le Komiti o Tulaga Aloaia ma Amio Taualoa mo le tolauluina o Sailiiliga ma Fautuaga ma Iugafono a la outou Komiti.

Afioga Hon VALASI LUAPITOFANUA TOOGAMAGA TAFITO SELESELE: Lau Afioga i le Fofoga Fetalai, ou te folasia i luma o le Palemene le lipoti a le Komiti o Tulaga Aloaia ma Amio Taualoa, mo le silafia e lenei Maota, ma le faafofoga tapuai a Samoa.

Lau Afioga i le Fofoga Fetalai, faafetai tele mo lo matou avanoa. E avea au ma sui o le Komiti e pei ona tofia e le tatou Palemene e faafeiloai atu ai i lau Afioga faapea le Taitai o le Maota, ma le aiga Kapeneta, afifio Minisita Lagolago, susu le Taitai o le Itu Agai ma le paia o le la Itu ma sui usufono uma o lenei Palemene, malo afua ailao ua maua.

Lau Afioga i le Fofoga Fetalai, ua tatou seu matila i lenei taeao fou i le alofa ma le agalelei faaauau o le Tapaau Sili i le Lagi. E i ai le manatu, ae ou te le i utufia Vailoa ma Vaigaga aua le taeao o Tafaigata i Faleata. E muamua ona ou tatala le taafi tualua na ifo ai le aso o le aiga tautai. Ma ou vaisausauina paia ma le mamalu o Samoa o le aomamala i le faasouga o ao ma le atufolasa. Ona o le matou faaeteete lea leaga e faigata le Maota ma le malae i Tiafau nei, ua ao i ai paia ma mamalu o Samoa. I le amata mai i le oneone le ufitia, seia paia le faletapaau o le Alataua, aua le afifio o Sua ma le Vaifanua, Fofu ma Aitulagi, Saole ma Saleaamua ma le Launiusaelua, Faatuiolemotu o le laau amotasi, le Faleagafulu ma le Tootoo o le Faleula, ma le Maopu o le Manuatele.

Ua afio Aiga ma Tama o Tama ma o latou Aiga, Usoga a Tumua ma Pule, Ituau ma Alataua, Aiga i le Tai ma le Vaa o Fonoti. O paia faale-Malo, o paia faale-aganuu o paia faale-Tala Lelei, o le a nuunuu atu faatini o le tausala. O mamalu ia ua faaifo i malae o le faautugatagi, e fatufaasoo ai le titi o Samoa aua ona upufai. Ua malo le soifua manuia ma le lagi e mama, tapuai maia Samoa aemaise lenei Maota mamalu, ae se i taumafai i se taunuuga o iloiloga a le Komiti o Tulaga Aloaia ma Amio Taualoa, i le galuega e pei ona sa tuuina mai e le Fono Aoaofaitulafono mo le lauliliuina ma toe lipoti mai le taunuuga e oo i ai sailiiliga a le Komiti.

Lau Afioga i le Fofoga Fetalai, a o le i agai se faamatalaga i se faaiuga ua taunuu i ai le Komiti i lenei mataupu, e i ai le talitonuga e ao ona se i

faamaalo muamua le iuofe, ma faatepa le maota lenei i le taua o lenei mataupu, i lona tulaga aoatetele.

O lenei galuega e le itiiti lona taua, ma e le o se mataupu sa faataetaealuga i ai le silasila a le Komiti. E le faigofie le tofa liliu, ma le faautaga mamao i mataupu faapenei. Ae peitai, o faiva faamatai tausinnuua masani ai sui usufono mamalu o le Maota lenei, a tupu se mataupu faapenei, e fetufaai le tofa, sufi le utaga, aua e sua le aulapauta sua le aulapatai, ina ia maua le amiotonu o le faaiuga.

O le upu a le Tusi, “a pule ma le saua, e mapu i tiga le nuu, ae a pule ma le amiotonu, e olioli le nuu”. O nei e fausia ai taeao, o le laau e toto nei, e paologia ai taeao ma le lumanai. O le uiga o lea manatu lau Afioga i le Fofoga Fetalai, a amiotonu ona faia faaiuga i le taimi lenei, e faapena lava ona sologa lelei taeao.

Lau Afioga i le Fofoga Fetalai, o le a ou le tolaulauina auiliili le lipoti lenei a le Komiti i ona vaega uma. Aua o lena ua taatia atu le Lipoti i sui usufono mamalu uma o lenei Maota. Ae na ona ou faamatogi, o le aotelega o sailiiliga faatasi ai ma se faaiuga ua taunuu i ai sailiiliga ma iloiloga a le Komiti i lenei 2 ma le afa vaiaso na galulue ai i lenei galuega.

O le aotelega ma sailiiliga, lau Afioga i le Fofoga Fetalai, o lenei galuega na faasee mai i le Komiti i le aso 4 Me, e pei ona saunoa ai le Fofoga Fetalai o le Maota. O le iloiloga e faatatau lava lea i le faitioga tusitusia aloaia a le Afioga i le sui Palemia, e faasaga i sui usufono o le itumalo faapalota o Lepa, o le Taitai lava lea o le Itu Agai, ma le sui usufono mo le itumalo faapalota mo Faleata 3, ua i ai faatasi foi ma tali tusitusia a sui usufono ua faasaga i ai le faitioga i totonu o sailiiliga a le Komiti.

O le faitioga tusitusia aloaia o lo o taua ai e faapea, ua solia e i laua nei le tulaga aloaia ma faatino uiga le migao i le Palemene ona o faamatalaga na laua lafo. Ae peitai o lo o teena e sui usufono o lo o faasaga i ai faitioga, ma e i ai vaega e ao ai ona faaleaogaina lenei faitioga.

O nisi o mataupu taua na maua e iloiloga ma sailiiliga a le Komiti, o lo o faamatalaina auiliili mai i totonu o le Lipoti a le Komiti i lalo o le Vaega 5, e aofia ai, 5.1. E avea ai o soo se tagata ma sui usufono aloaia o le Palemene. 5.2 Faia pe na le faia foi se faamasinoga. 5.3 O le Maliega o le Harmony Agreement. 5.4 O le taimi e laga ai se mataupu tau tulaga aloaia.

A silasila lenei Maota i tuutuuga o galuega faataoto mai e faatonufofau ai lana iloiloga, e auga e tasi, pe ua faamaonia le aafia ma le solia o tulaga aloaia ma uiga le migao i le Palemene, mai faamatalaga ma gaoioiga na fai e sui usufono nei e toalua.

Ina ua maea ona iloilo auiliili ma tuutuuga o galuega taitasi, ua taunuu ai i se taunuuga e faapea.

Tuutuuga o Galuega 6.1, ua faamaonia le aafia ma le solia o tulaga aloaia a le Palemene ma ua faamaonia foi le solia o aiaiga o le tautoga o le Loto

Faamaoni, Tulafono Tumau 14. Ma le Tulafono Laititi o le Amio Taualoa faa-Palemene, Tulafono Tumau 15.

Tuutuuga o Galuega 6.2, ua faamaonia le aafia ma le faatinoina o uiga le migao i le Palemene.

Tuutuuga o Galuega 6.3, ua aafia le Tulafono o Pule ma Tulaga Aloaia o le Fono Aoaofaitulafono 1960, i leni mataupu. E tusa ma le fuaiupu 21(1)(d).

Tuutuuga o Galuega 6.4 ma le 6.5, o aafiaga faale-tulafono o leni mataupu, o lo o aiaia i totonu o le Tulafono Tumau 187(4), ma le fuaiupu 21(4), ma le (5), o le Tulafono o Pule ma Tulaga Aloaia o le Fono Aoaofaitulafono 1960.

Tuutuuga o Galuega 6.6, le tuuina mai o se faaiuga talafeagai e tusa ai o aafiaga o leni mataupu.

I le maea ai o taualumaga o iloiloga a le Komiti ua faaiugafonoina ai, e fautuaina e le Komiti le Fono Aoaofaitulafono e faapea,

- 1. Ina ia tuueseina ma faamalolo mai galuega a le Palemene Sui Usufono o le Itumalo Palota o Lepa ma le Itumalo Palota o Faleata Numera 3, e amata mai le aso e faamaonia ai e le Fono Aoaofaitulafono le Lipoti a le Komiti o Tulaga Aloaia ma Amio Taualoa, seia i ai se aso.*
- 2. E le agavaa nei sui usufono ua faasalaina, ona maua ni faamanuiaga i totogi ma alauni faa-Palemene e tusa ai ma le Tulafono Tumau 187(5).*

E fautuaina e le Komiti leni Fono Aoaofaitulafono ma le Fofoga Fetalai, ina ia mataituina taualumaga o leni faaiuga, e fua i ai se aso e toe taliu mai ai sui usufono ua faasalaina aemaise mo le agai mo le lumanai.

Lau Afioga i le Fofoga Fetalai, o le aotelega lena o le Lipoti a le Komiti, e i ai le faamoemoe o lena ua taoto atu i totonu o le Lipoti le atoaga ma auiliiliga o Lipoti taitasi. A i ai lava nisi mataupu e fia malamalama ai ma fesiligia le mamalu o le Palemene i leni mataupu, o le a taumafai lava le Taitaifono ma lana Komiti e talitali atu ma faamalamalama nisi o vaega.

Lau Afioga i le Fofoga Fetalai, faafetai ona ua oo mai le faaiuga o sa matou faamatalaga. E i ai le talitonuga, a o le i seu lo matou vaa i fanua, matou te talitonu, e le asa lava se faiva ma se maumau. E le o i ai se atoatoa i le Komiti, ae fia fai sau tala lau Afioga i le Fofoga Fetalai.

O leni Komiti, ou te faafetai ma ou faamalo, o se Komiti e i ai le tofa ma le faautaga, e leai se mataupu e tasi e faia i se manatu o le Taitaifono, e masalo o la e faafofoga le Komiti. E leai foi se mataupu e tasi, e faia itutasi. O le ala lea, a silasila i tulaga e pei ona i ai, e pau leni o le Komiti e loto tasi le tofa ma le faautaga, o lena e faaali ia latou saina. A o nei lava i le taeao sa ou maua ai le faaaliga, ua manatu nisi o sui... ia, ai ona o le puipuia foi o laua foi aiatatau i tulaga e pei ona i ai. Ma ou te talitonu o lo o soifua le Atua, a fai e faapena se agaga o se Komiti i se tagata e tofia ma faamau ma

tuuina i lalo e le Palemene o se sui faatuatuaina, a toe fesui ai loa se mea, ou te talitonu ua le toe talitonuina.

Lau Afioga i le Fofoga Fetalai, o lo o faafofoga Samoa, Samoa e, aemaise e o lo o faafofoga mai i so o se tafa o le lalolagi, o lena se taunuuga, i le moni ma le faamaoni o agaga o le Komiti i le tulaga ua taunuu i ai. E matou te faamalulu atu, o le a sau faafofoga, ia malu ave i fale, e potu lava le tautai ae le atoa ia i vaa.

Ia faamanuia Samoa, faamanuia lau Afioga i le Fofoga Fetalai, faamanuia le Taitai o le Malo, sui Palemia aemaise o Minisita, sui Minisita aemaise o lena Itu, le sui Taitai aemaise foi o le taofia ai o le susuga i le Taitai o le Itu Agai, i nisi o fuafuaga o le tatou faamai. Ia faamanuia le Atua, soifua ma ia manuia.

FOFOGA FETALAI: Ua faamalo faafetai saunoa i lau Afioga i le Taitaifono mo le tolaulauina manino o la outou Lipoti. E i ai foi le talitonuga ua manino le faafofogaaga a lo tatou Maota, malo faafetai.

A o le i faagasolo le tatou galuega, ou te toe faamanatu atu i le mamalu o sui usufono e fia saunoa i le Lipoti lena, ina ia tatou usitaia aiaiga o le Tulafono Tumau 182, e leai se sui usufono e mafai ona saunoa e sili atu na i lo le sefulu minute i so o se felafolafoaiga e faia i se Lipoti mai le Komiti o Tulaga Aloaia ma Amio Taualoa. E sologa lelei la tatou galuega pe a o tatou galulue faatasi.

Ma o le avanoa lena mo sui usufono mamalu e fia saunoa i le Lipoti a le Komiti o Tulaga Aloaia ma Amio Taualoa.

Tulai mai lau Afioga i le sui Taitai o le Itu Agai, o le sui usufono o Anoamaa 2.

Tofa Hon LAUOFO FONOTOE NUAFESILI PIERRE LAUOFO: E faafetai i lau Afioga i le Fofoga Fetalai o le Maota, e masalo o le a ou amata atu ia i le matou Itu.

I lena taeao e tusa ai ma le Lipoti, e faafetai atu foi i le Afioga i le Taitaifono i le tolaulauina o nisi o vaega. Ae o lo o taumafai e tau faitau ina ia maua se atoaga ina ia malamalama i le Lipoti. Ae o le mea taua lea ua aumai manino e le Taitaifono, o le faaiuga po o le latou fautuaga, i se faasalaga talafeagai, reasonable penalty.

O lea la ua faafofoga mai le tatou Maota, masalo lau afioga i le Fofoga Fetalai, e toe foi lava se tala i tua, i le afuafua mai o lena mataupu e mafua mai ni lafoga. A o ni faatalanoaga foi sa faia i luga o le leitio ma luga o upega tafailagi, social media platforms. Sa aumai ai ia lafoga ia, ona faatulai ai lea o moliga, e le o po se lilo o au le isi sa molia. O lea e malamalama le Maota, ae peitai o le iuga e le faamaonia sau...nofosala ai i lafoga foi po o upu sa ou talanoa ai au. Ae o le mea manino, o lafoga ma faatalanoaga uma nei sa talanoa i ai i laua po o sui usufono mamalu ua molia, e agai i le

faamasinoga po o alii foi o le Faamasinoga. O lea la na mafua ai ona alu sao le mataupu i le Faamasinoga, tagofia e le faamasinoga, ona e pei o faaiuga o Faamasinoga ia sa agai i ai saunoaga a sui usufono mamalu, o faaiuga a tatou lava faamasino i Samoa nei. O lea na aumai ai faamasino mai fafo, e toalua faamasino palagi Niu Sila, sa o latou tagofia le mataupu ma fai i ai faaiuga. O lafoga foi ma faatalanoaga na, o le masina o Iulai, Aokuso tausaga na tea nei 2021.

I lau la vaai atu i le mataupu, a matau mai o le vaitaimi lena e le i faatautoina i laua ae avea ma sui usufono o le Palemene, o le taimi lena e le i avea i laua ma sui usufono, o le mafuaaga lena, se i agai atu i ai se folasaga i lenei taeao, e tusa ai ma lenei mataupu. A o lafoga foi e pei ona faatalanoa i lena aso, e i ai lau matau ma le taofi o lou sui usufono, e leai lava ma se upu na agai i le Palemene, e leai lava. E na o upu lava sa agai i le Faamasinoga ma alii o le Faamasinoga. E leai foi se upu na aafia ai se sui usufono mamalu o le Maota lenei, e leai lava se lafoga na agai mai i sui usufono mamalu.

I lou taofi faa-sui usufono, e leai lava se lafoga po o nei upu sa saunoa i ai sui usufono nei, e tuumamaina ai, pe tuumauualoina ai le mamalu o le Palemene, o lou lea taofi. O tulaga ia e tatau ona ou talanoa i ai, ona e pei e faapena lau vaai i le mataupu lenei.

Ina ua taunuu i le faamasinoga, o alii lava o le faamasinoga sa aumaia le faaiuga e pei ona lausilafia, o lea e mafua ai le taeao lenei. O le iuga na aumai e leai se faasalaga, e leai se faasalaga mo i laua nei. Ae manatua, e ave pea lau faamamafa, o lafoga e agai i le faamasinoga, e le o ni lafoga e agai mai i le Maota lenei. O le tulaga la lena, ae faatauaina, na faatauaina e le alii o le faamasinoga le feagaiga lea sa tele ai foi saunoaga ma fetalaiga, le feagaiga foi lea o le faaleleiga. E taua foi ia i latou ma ave i ai le faataua i ina, o lea la ou te faitau atu i le faaiuga a le faamasinoga, e pei o le mafuaaga lena na leai ai se faasalaga, na tuuina mai i lenei mataupu. Na taua e i laua, afioga i alii faamasino, no penalty, no penalty.

Ua maea ai i ina mataupu tau faamasinoga, i lou la taofi, ua iu le toothbrushes of law, ua iu, ua uma, ua maea tulaga tau tulafono ma le sailiga o le amiotonu i luma o le tulafono. Ae peitai ane o le tofa foi ua ae i el afioga i le sui Palemia ua aumai ai lenei mataupu i totonu o le tatou Maota ma faatulai ai le tofiaina o le tatou Komiti, e pei ona i ai le Privilege Committee.

O vaega la ia e lagona ai e lou sui usufono le faanoanoa. Ona ua uma le faamasinoga, lea foi la ua toe oo mai i inei toe faia foi le isi faamasinoga. I lou lava vaai faale-sui usufono ua lua faamasinoga o le mataupu lenei. O lea ou te manatua, o le tasi o faasinoala o le amiotonu e puipuimalu o le tulafono, o lou le tulai lea faalua e tali se moliaga, i se mea e afua mai i se mea e tasi, po o le principle lea e tau o le double jeopardy. O lea la ua faalua ona tulai ia afioga i sui usufono nei, e le gata i luma o le faamasinoga, a o lea foi la ua toe tali i totonu o le Maota, e tusa ai ma tuuaiga i le mea lava e tasi, o le

mataupu lava e tasi. E le ese lafoga na silasila i ai le faamasinoga ma aumai ai lona finagalo, ese lafoga ia ua aumai i le Maota lenei, o lafoga lava e tasi.

E ui i lea, o lea ua taoto le Lipoti a le Komiti, o lea ua aumai foi lo latou finagalo, e faamaonia. Ae pei ona ou fai atu, e ese sou taofi e pei ona ou tauamfai atu i le vaega lea. Aua e le faigofie foi i sui usufono mamalu le tulaga ma le fautuaga ua faataoto mai i le Lipoti. Aua o lea foi la ou te vaai au i le fuaiupu o le Tulafono Tumau e 185 ma le 186, o lo o faataoto mai faataitaiga o amio po o uiga le migao, e leai lava se vaega o le Tulafono Tumau 186, o aafia i le mataupu lenei. O mataupu tau faamasinoga na agai i le faamasinoga. E leai lava se vaega 185 Tulafono Tumau ma le 186 o le Tulafono Tumau o aafia i lenei mataupu. E pei foi ona ou fai atu, o le tulaga lena e i ai. Ou te teena le tulaga o le Lipoti, ou te teena foi le tulaga i le fautuaga o le faasalaga.

Ae le i faaiu atu lau folasaga a o se manatu, a o se motugaafa lau Afioga i le Fofoga Fetalai, e pau lava ia o mea o lea ou te fia pai i ai i le faasalaga lea ua faatulai mai. A silasila i le Tulafono o le Legislative Assembly Powers and Privileges Ordinance 1960, i lona fuaiupu 21(4), ma le tatou Tulafono Tumau 187(4), o lo o manino lava le faaupuga. Afai e faatea i se taimi le tumau ma le Maota, e tatau ona maoti le piriota e faatea ai, it has to be a definite period. E le mafai onai lou lea talitonuga. E le mafai ona fai lea ituaiga fautuaga e pei ona faataoto mai, e amata mai i le aso, faamaonia e le Fono Aoa le Lipoti a le Komiti o Tulaga Aloaia ma Amio Taualoa, seia i ai se aso. O lona uiga e le iloa po o afea, e leai se tapulaa. E le iloa po o afea le aso e maea ai le suspension. Ae a silasila i Tulafono ia ua ou talanoa atu ai, o la e talanoa mai i se piriota maoti, i lona amataga ma lona faaiuga.

Lau Afioga i le Fofoga Fetalai, masalo ai ua uma lau 10 minute. Ia faafetai, agalelei le Atua i le galuega i lenei taeao i lau Afioga faapea lena itu o le Malu, ma lenei itu o le Maota. Ia manuia le Fono.

FOFOGA FETALAI: Ia malo lava le saunoa, faafetai o lea ua folasia lou finagalo, e momoli atu le agaga o le faafetai. O lea e matau atu o lea ua tulai mai le sui usufono mo Vaimauga 3.

Afioga Hon TAPUNUU NIKO LEE HANG (Vaimauga 3): Ia faafetai atu i lau Afioga mo le avanoa. Ua ou manatu e sili ona ma sosoo pea ma le matou Sui Taitai ona e matau atu i le saunoaga a le Afioga ia Lauofo, e pei o lagona foi lea o lea e tusitusia i lau pepa lea. Ae puupuu foi se manatu e faaalai i le Lipoti lea ua i lumamea.

Ae le i faaaogaina le avanoa 10 minute, e muamua ona ou faatulou i le pau o le Maota ua sasao nei, lau Afioga i le Fofoga Fetalai, le Afioga i le Tamaitai Palemia ma le mamalu o le Kapeneta, sui usufono mamalu o Minisita Lagolago aemaise le Itu o lo o Agaia le Malo, Afioga i alii ma tamaitai sui usufono. E faatalofa atu i lenei taeao fou, malo le soifua maua.

E fia faamauina foi le agaga faafetai i le Afioga i le Taitaifono o le Komiti mo le faamatalaina puupuu mai o le Lipoti o le latou Sailiiliga ma le latou Fautuaga. Na pau lava lau Afioga i le Taitaifono, na o le fesili lava e amata ai sau folasaga, po o i ai ni faatulagaga o ni faasalaga i lalo o le tatou Tulafono Tumau e faasala ai ni sui usufono ua solia ni Tulafono a le Palemene. O lau fesili ona ou te vaai atu i le faasalaga e fai lava sina mamafa, ae po o justify la. O le mea foi lea ou te tau matau atu i le tou Lipoti, na o ni saunoaga na fai i luga o le social media ae na agai foi lava i le Faamasinoga, e le i faapea na agai mai i le Palemene. Aua o le isi vaega o le tou Lipoti, e pei ua solia faiga mamalu o le Palemene, ae leai ma se mea o taua ai se... i saunoaga ia e aumai i le Lipoti pei e agai a i o i le Faamasinoga. O lea la ua uma ona fai le Faamasinoga pei ona saunoa Lauofo, ua uma foi la ona iloilo e le Faamasinoga ia... ia e leai se faasalaga. O lou popolega i le Faamasinoga ia e faalua ona fai ae o le mataupu lava e tasi, e pei ua molia faalua le tagata ma faasala faalua. E ui la ina e leai se faasalaga i le Faamasinoga, a o lea ua faasala i le tatou Privileges Committee, ia ona e i ai foi taiala a le tatou Komiti o taitaiina ai le tou galuega, a o le faasalaga lea i lou vaiviga, e fai lava si matuia. O le faasalaga foi lea e sau e suspend indefinitely, e pei foi ona saunoa Lauofo, e tatau ona i ai se tapulaa o le faasalaga, I mean le time period. A na fai se faasalaga faapea pe tasi le vaiaso, ina ia mautinoa ai po o i ai ni a tatou guidelines e fua agai i ai faasalaga a sui usufono mamalu o le Palemene.

A o lau faauigaga o le indefinitely, e le iloa se taimi, e mafai lava ona uma lenei Nofoaiga o faasala lava faapea. Ae manaia pe ana aumai ma sina time period foi lele leaga o lea ua outou molia ua soli le privileges o le Tulafono a le Palemene. Ia o le mea la lena ou te fia faafesili ai i lau Afioga i le Taitaifono, po o i ai ni aiaiga foi ma ni faasalaga e fua i ai le faasalaga, ina ia maoti ai ni faasalaga e aumai i le taimi o le iloiloga o le Lipoti ma tou fautuaga e aumai o le a suspend, ia aumai ma se taimi e suspend ai foi sui usufono mamalu pe a faapea ua molia.

E i ai lava lou talitonuga i faasalaga faapenei, e tatau pea ona silasila totoa le tou Komiti i sui usufono mamalu o le Palemene ua fai si loa i totonu o le Palemene, e tele foi lo latou sao i upufai ma le tele o Tulafono sa tapenaina foi, aemaise le matou Taitai. Ae peitai ane, o lea ua fai le tou faaiuga. Sa ou manatu lava e tatau ona tau fuafua foi lele ia faasalaga, e manaomia foi e le tatou Palemene sui usufono ia e fesoasoani i le tatou galuega. O le galuega a tatou i le taimi lenei e le faigofie, e tele luitau, ua faale-lelei le tamaoaiga, tele le aafiaga i le Koviti-19. E manaomia la e tatou ni sui usufono e lava le tofa ma le faautaga e fesoasoani ai e tau tapena le mea lea ua tulai mai ia tatou. Ia manatua foi le tatou galuega lau Afioga i le Fofoga Fetalai, o le galuega faifaatasi a lo tatou Malo ma matou nei lea e faapea matou te agaia le Malo. A o le uiga o le matou galuega, o le fesoasoani e lagolagosua i le faigamalo ua tulai mai. E pei la e faai ai sau faamatalaga, o lou le fialia la

i le faasalaga, e faamalulu atu i lau Afioga i le Fofoga Fetalai, ou te teena le Lipoti, aemaise le fautuaga e pei... pau foi la le mea e agai i ai sau faamatalaga, o le fautuaga ma le faasalaga. Ia te au lava ia, ua fai foi si leva o i totonu o le Palemene, faatoa ou faalogo lea i se faasalaga faapea. E moni lava sa tutuli sui usufono i fafo, pe 24 itula, a tele lava po o le vaiaso pe le atoa foi se vaiaso, a o le faasalaga lea ua fai lava si... a tau le indefinite, e le iloa po o afea e uma ai. O le mea lea na ou fesili atu ai i lau Afioga, pe i ai ni taiala e fua agai i ai faasalaga a le tatou Privileges Committee, ina ia talafeauga le faasalaga ma le soliga o le Tulafono. Aua ia te au lava ia i lou manatu e faamalulu atu ai i lau Afioga, e fai lava si matuia o le faasalaga. Ana aumai pea ma se timeframe e vaiaso, ia atonu e talia gofie. Aua leaga a faapea o tulaga ia o iuga o sailiiliga foi a le Komiti, ia, e leai se mea matou te faitio ai, ae pau o le mea, se i tau fuafua a tatou faasalaga leaga o sui usufono ia e manaomia tele e tatou.

FOFOGA FETALAI: Ia, se i fai mai sina malologa a le sui usufono mamalu se i tuu atu le avanoa i le Taitaifono. Saunoa lau Afioga i le Taitaifono.

Afioga Hon Valasi Luapitofanua Toogamaga Tafito Selesele: Lau Afioga i le Fofoga Fetalai, ua manaia lava le faalogologo i le tofa, a o mataupu faapenei, o le Maota lenei, e le o se Maota e fia fitifiti i ai se tagata, o le Maota mamalu o le atunuu. O le faaiuga foi lea ua fai, o le fesili la i le sui usufono na o le fai mai e tetee, o le a la sana faasalaga o manao e fai i sui usufono ia? A o lea ua tau atu, e te fiafia la i le soloaiga atoa e alu ai, pe e te fiafia se i vaai pe sui amio? E pei o le agaga lena, ae ua leva foi ona e i totonu o le Palemene, ae te le o malamalama i faasalaga la e tau mai e le Tulafono Tumau, o le suspend ma le reprimand. O le a le uiga o na upu? O le suspend, e leai se taimi faatapulaa. Na o le suspend lava, a o lea la e foliga mai o lea e te tetee ae te le aumaia. O le Lipoti lenei, na o le aumai lava i luma o le Palemene uma le aoga o le Komiti, pule le Palemene. O le fautuaga foi lea e aumai i le Palemene, e pasia e le Maota ae le o se faa... ae pei o le agaga lea, ina ne i meaane ua saga sasa lava faaiuga nei a o faafofoga Samoa, a o lena e i ai vaega. E 2 lava faasalaga na e tau mai e le Tulafono Tumau, na o le aoai ma le suspend. A o le suspend foi, e le faatapulaaina sona taimi.

O lea la, aua e le natia sa iloilo e le Komiti, o isi manatu e le natia, leaga o lea ua tatou talanoa i le mea lenei, 30 masina, 24 masina, 18 masina, lena e alaala mai outou sui usufono, a o le a le mea na taumafai i ai? Ia i ai se... ina ne i e manatu ai o se faiga... ae o lou talitonuga, o le vaai lena a le Komiti, e le o se vaai lata mai le Komiti, e vaaimamao. A sui le amio, o le a le mea o le a e le toe ae mai ai i lea vaiaso? Ae a le suia, taatia ai pea. Ia o le agaga lea, o le faamalamalama lea i lau Afioga ae aua ne i seetia i le... A o le

agaga lena, ne i meaane ua e sasalu sasalu, ae o le agaga... e le i faigata ona fefulisai e le Komiti.

O lea o le a ou faatepa lau Afioga i le mea sa tupu i le Maota i le 1990, sa i ai le sui usufono na tuuaia le Palemia o lena vaitaimi e gaioi se i tulou. Sa faatu le lafo iinei, aumai faamaoniaga, e le i mafai ona aumai ni faamaoniaga. Na faatu lava le lafo i le Maota, e 12 masina, ae na o le upu na tuuaia. O nisi la... tasi lena mea sa vaai i ai le Komiti, o nisi foi o suesuega sa fai, ia, o lena. E suesue atili. E le i faapea la e fou le mea lea. A faapea e fou lau faafofoga i le faasalaga, ia, o le fuata ma lona lou ma le silasila a le Komiti i le mea e tatau ona i ai, ae le o se faasalaga foi lele e fua i lau silasila. Ae ou te iloa e alofa le faasalaga. Ia manuia le aso.

Tofa Hon Lauofo Fonotoe Nuafesili Pierre Lauofo: Lau Afioga i le Fofoga Fetalai...

FOFOGA FETALAI: Ia, masalo... se i fesoasoani atu pea le Nofoa i lau Afioga i le Sui Taitai, leaga o lea na taua foi i le lauga a lau Afioga i le Sui Taitai o lea na taua foi i le lauga a lau Afioga i le Sui Taitai o lea foi na taua e le sui usufono mamalu mo Vaimauga 3. Ia sa le faalavelave lava le Nofoa ae o lea foi ua saunoa malamalama le Taitaifono, e manatu tele i le faafogafoga mai a le atunuu, faapea ai ua i ai se tulaga faapea ua le alofa atu ma le manatu atu ia i laua ua aafia. Ae a silasila i tatou Tulafono ia, e lelei lava lou faitau atua e malamalama ai foi, i le (4) lea pei ona saunoa i ai le Taitai o le Itu Agai, pei o le auga foi lea o le saunoaga a lau Afioga i le sui usufono mamalu. "Afai o so o se sui usufono ua nofosala i le faalemigao i le Fono Aoao, e mafai e le Fono Aoao i se iugafono ona aoaiina sea sui usufono po o le tuueseina o ia mai le galuega a le Fono Aoao mo se vaitaimi, e pei ona ua ia faafinagaloina e tatau ai." O le Palemene lena. Ia a o lea ua saunoa le Afioga i le Taitaifono, ou te le iloa po o lea vaiaso, e faapena. Ae a tuu taimi, 12 masina pei o le mea lea na i ai isi sui usufono, oka oka se umi. E faapena. O le Atua e afio i o outou loto ma outou finagalo, ioe, tatou te vaavaai i le filemu o le Atua ma le alolofa foi i nei sui usufono mamalu. Ioe. E faapena. E tatou te fetuutuunai faapena. O lea ua saunoa le Taitaifono, e le iloa po o lena vaiaso, ia e faapena. A o le uiga lena, o lea e tuu i le tofa ma le uta mamao i le vaaimamao. Ia, o le faamalamalamaga lea a le Nofoa.

Tofa Hon Lauofo Fonotoe Nuafesili Pierre Lauofo: Faafetai lava i lau Afioga i le Fofoga Fetalai. Ia, faafetai i lau Afioga i le Taitaifono, o le manaia ia pe ana aumai la lau fautuaga e toe ae i le vaiaso lea. Ioe. Ae silasila, o le mea lea ou te tulai atu ai, faafetai o lea...

Afioga Hon Valasi Luapitofanua Toogamaga Tafito Selesele: Lau Afioga i le Fofoga Fetalai...

Tofa Hon Lauofo Fonotoe Nuafesili Pierre Lauofo: Se i faamaea atu lava lau Afioga ma le toe...

Afioga Hon Valasi Luapitofanua Toogamaga Tafito Selesele: O le mea e fia faasao, leaga e le mafai ona tuuaunoaina e le Taitaifono leaga o lea e tuuaia ma taumafai e aumai. O lo o e manino pe a e faitau i le Lipoti lena e i ai le fautuaga a le Komiti i se aso ia ma le agai i luma. Leaga e le faapea na o au na faia le Lipoti, o le matua manaia lava, o le mea lena e ala ai ona to lou pulou i sui usufono na e alaala mai ma sui usufono foi nei e i inei, o le tofamamao ma le faautaga. Na i ai tulaga na laa i ai, na mananao isi e 30, manao isi e 24, manao isi i le aofaiga, a o le agaga, afai e sui taeao le amio a Leala, o le a le mea e tuu ai? Aua e te i foi ua faasala atu ae alu toe faasalalau i le lalolagi a? Ia, a o le agaga lena.

Tofa Hon Lauofo Fonotoe Nuafesili Pierre Lauofo: Lau Afioga i le Fofoga Fetalai, e le tau fai atua foi sau tala, e silafia lelei lava e lau Afioga. Ae pei o le alafua lea e aumai, o le agai i luma, a o le faasalaga, e agai i upu na lafo ia Iulai, Aokuso o le tausaga na tea nei, lea sa i luma o le Faamasinoga. A o lea e pei e aumai le saunoaga, faafetai. Fai mai se i mataitu le agai i luma. Ia o lona uiga aua e toe fai foi. Ae pei ona e lauina mai le (4) lea sa ou agai atu ai, a lea e manino lava lena ua e saunoa mai ai, saunoa sao mai lava i le vaega lea, mo se vaitaimi ua finagalo le Fono Aoo. E tatau ona faamaoti le vaitaimi. A silasila foi la i le faaliliuina i le Gagana Peretania, for a period a? For a period la, o le aumai la o se fautuaga fai mai e le iloa se aso e uma ai. Ia pei o le vaega lena o lea e tulai atu ai e fai se manatu.

FOFOGA FETALAI: O lea ua maua. Ia se i tulai mai lau Afioga i le Minisita o Faatoaga.

Susuga Hon Laauli Leuatea Polataivao Fosi (Minisita mo Faatoaga ma Faigafaiva): I le ava ma le faaaloalo e apaapa atu pea i tualumaga e alofa atu i le faafoeina e lau Afioga. O le finagalo lava o le Sui Taitai, o lona lava lena finagalo. O lea foi sa taofiofi lava le tulai atu e fia faasao ma fia faamalamalama le tele o mea na saunoa i ai. A i ai se tagata na tu faa-3, tu faa-4, tu faa-5 i le Faamasinoga i le mataupu e tasi, o au. Faa-10 mai i i i le Maota. O le mea lena e tatau ona faasao o la e faafofoga le atunuu. O le tofa lea ua aumai e le Afioga i le Taitaifono, e fai e le Palemene le iuga. A lea ua saunoa manino le Afioga i le Taitaifono, tou te finagalo la e tuu i ai le 5 tausaga o le Nofoaiga? O le mea lena lea tou te fai mai ai? Liuliu mamao la outou tofa, e le o i inei Tuivalea, o lea e alaala atu, o alofa na o alofa nei. Ae tatou o i le mea lea ua saunoa i ai le Taitaifono. O le a le mea na ala ai ona tatou filifili le Komiti? Ia tatou filifili ma le atoatoa. Ua uma ona saunoa uma sui usufono, O ai la le fue lou ulu ma le fue loulemaga ua toe suia ai finagalo

o sui usufono ia? Ua uma ona saina anapo. Tuutumamao le tofa, o i ina lea matou te apaapa atu ai. O lea ua saunoa le Taitai, toe faafoi mai le mamalu. O ai le Faamasinoga? O ai le Faamasinoga? Faamasinoga a Samoa. Lea e taumafai atu nei e puipui lona mamalu. Ae faapefea ona outou fai mai e ese o ese i? O le pulega tutusa faatauagai a le Malo lea e ala ai ona matou apaapa atu. O le taeao lenei, e le o se taeao faigofie. A o le mea na tupu, e le faigofie. O le ala lea sui usufono mamalu, tuutumamao le tofa, tatou omai i inei e saili le tofa pei ona saunoa i ai le Taitaifono.

O sau fesoasoani atu lea i le mea e fia faasao, leaga o lea tou te saunoa mai i ni mea fou.

FOFOGA FETALAI: Malo faafetai. Se i saunoa mai lau Afioga i le Tamaitai Palemia.

Afioga Hon Fiamē Naomi Mataafa: Lau Afioga i le Fofoga Fetalai o se mea e fia faamalamalama. E le paoina finagalo faaalua o sui usufono aua o le uiga lena o le tatou mataupu o le folasia o finagalo. O se mataupu taua, ae tau lava ina ou faapai atu ma le faaloalo i le laulau i le faaupuga lea seia i ai se aso. Lau Afioga, o se faaupuga lea e masani ai le Maota lenei, seia i ai se aso. E le o se mea fou. Tolopo le Fono a le Palemene seia i ai se aso. O le piriota foi, e mafai ona faamatalaina, seia i ai se aso lau Afioga.

O le mea lea ua lagalaga mai e le Afioga i le Minisita, o le mea lea ou te fefe i ai lau Afioga. A tatou finau i le taimi ma le fua, atonu e leai se mea e afaina ai i le faaali mai o finagalo, ae a tuu i le fua, o le a le umi o le Nofoaiga? Le fua umi lena lau Afioga.

FOFOGA FETALAI: Malo faafetai.

Tofa Lealailepule Rimoni Aiafi: Lau Afioga i le Fofoga Fetalai...

FOFOGA FETALAI: Ia, talu ai o lea ua tatou oo i le tatou taimi malolo...

Tofa Lealailepule Rimoni Aiafi: Ia, talu ai ona o lea na tau lou igoa e le Afioga i le Minisita faamolemole, e vave lava.

FOFOGA FETALAI: Se i tatou omai i le tatou malologa, o lea o le a malolo...

Tofa Lealailepule Rimoni Aiafi: E tasi lava le fuaiupu lau Afioga e le lua.

FOFOGA FETALAI: Ia se i saunoa mai.

Tofa Lealailepule Rimoni Aiafi: Aua o la e ua saunoa mai le Minisita po ua ou sui. Lau Afioga i le Minisita, e te sui loa ou sui. Faafetai.

FOFOGA FETALAI: Ia, talu ai o lea ua tatou...

Afioga Hon Valasi Luapitofanua Toogamaga Tafito Selesele: A o le i o atu i le ti, o uiga lava ia o le sui usufono. Ae sa faapea e tu mai e faatoese, ia ua uma. Ae tautuana ma sui usufono ia e le i sausaunoa, aua e te tetee, ae fai mai sau fofo o le faafitauli. Aua a e tetee, tetee a o lea lava e te... ia e tatau ona tulai e te le tetee, ae faamolemole le tatou Palemene, aua o lea ua i le Palemene le Maota, e le o toe i ai se aia a le Komiti. Ia manuia le aso. Faafetai.

FOFOGA FETALAI: Ia, talu ai o lea ua tatou taunuu i le tatou taimi malolo, ia o le a faataatiaese Galuega a le Fono Aoa mo lana malologa masani.

Na faataatiaese Taualumaga a le Fono Aoa Faitulafono mo lana malologa masani i le itula e 10:48 i le taeao ma toe faaauau i le itula e 11:25 i le taeao.

FOFOGA FETALAI: Ua faamalo le onosai i lo tatou Maota, e i ai le manatu ua matuifau le tautega ma le taligasua i le paia o le Palemene. Ua maua foi se faasiligamalosia e faaauau ai le tatou galuega.

E faataatiaese Taualumaga mo le tatou malologa o le taeao, ua maea saunoa le sui usufono mo le itumalo palota o Vaimauga 3.

Afioga Hon TAPUNUU NIKO LEE HANG: Lau Afioga i le Fofoga Fetalai, pe maua se avanoa.

FOFOGA FETALAI: Ia se i tulai mai... ua maea lou taimi.

Afioga Hon TAPUNUU NIKO LEE HANG: E faamalulu atu i lau Afioga, e na o le 2 minute o lau lauga ae faalavelavea loa le faauilavea, pe maua la sina minute se tasi...

FOFOGA FETALAI: Ia manatua foi o faauilavea e aafia uma lava i lau 10 minute.

Afioga Hon TAPUNUU NIKO LEE HANG: O lea ou te malamalama, o faauilavea na aumai e pei e felaugaai le...

FOFOGA FETALAI: Ia faauma maia lau saunoaga.

Afioga Hon TAPUNUU NIKO LEE HANG: Faafetai mo le avanoa. E momoli le faafetai i lou uso a Minisita, o le Taitaifono foi a le Komiti. E faafetai ua maua foi se malamalamaga i fesili na tuuina atu i lau Afioga. Mo le silafia i lau Afioga, o lea ua malamalama lelei i faasalaga po o le suspend po o le reprimand. A o lea la na ou fesiligia le faasalaga suspend, ou te le fesiligia foi la le tou faaiuga, aua o se mea e tatau ona fai. A solitulafono le tagata ia faasala, a o lau fesili, pe justify le solitulafono lea e fai ma le faasalaga? o lau fesili lena. A faapea o la outou faaiuga lena, e leai se isi e toe faitio i lea tulaga. Ae pau lea o le mea e faaali atu ai sou manatu ou te tete, ona ou te le talia le faaiuga lea o le faasalaga, a o le isi tulaga o la outou Lipoti, ua ou talia uma e 100%. E pau lava lena na ou fia faaali ai se manatu, ou te le taliaina ai le Lipoti, ona o le faasalaga. O lou talitonuga ua fai si matuia. Ma le faaaloalo lava, faafetai mo le avanoa.

FOFOGA FETALAI: Ia malo faafetai. Mo le faasaoina o le tatou taimi, e masalo o lea ua tali le Taitaifono, o le tali foi lena o le vaitaimi lea e pei ona fesiligia e le sui mamalu, e le mafai ona toe suia se tali a le Taitaifono. Mo le fesoasoani atu i le tatou galuega e tausoa faatasi, aemaise o le tatou taimi.

Ia tulai mai le sui usufono o Sagaga 3.

Afioga Hon SALA FATA PINATI (Sagaga 3): E momoli atu le faafetai i lau Afioga i le Fofoga Fetalai. Lau Afioga ou te matau i lenei vaitau ua i ai le lalolagi, o le tele o luitau. Ma e i ai foi le lagona faakerisiano ua faapea ona molimoli mai ai i lenei vaitau, ia le tele o faaaliga o lo o faapea ona aumaia e le Tina Paia ia Maria ma lona alo pele o Iesu. Ou te fia taua lea vaega ona o lea ua savalia nei le 4 masina o faailoa pea vavega tetele ia i lo matou nuu i Leauvaa. O se mea ofoofogia ma le matautia, ma o se feau foi e ao ona tatou manatu i ai, po o le a uiga o ia vavega ua faaali ai le Tina Paia, i le lalolagi o luitau. Ia tatou ave ia Europa i le mea o lo o i ai taua tetele.

O Samoa o se atunuu e faavae i lona amataga maiga i tu ma aga e faavae ai le atunuu lenei, e pulea e matai. E masani a fai fonon tetele a nuu, e i ai lava e e togisala e faapea mai, e faasala le aiga lea...ae fesili lava i le mea o lo o i ai le tofa a alii matutua, po o fea o i ai. O i ina foi e pau i ai ma e lagona ai le leo o le toeaina. E avatu se tala ma se manatu i lenei taeao, ona o le tofa lea fetala'i. O le tofa e fau i luga o le alofa. O faauluuluga, e amata mai i aiga taitoatasi. O le faavae mai o Samoa i le amataga, e faapea le maugagana masani. "O le ala i le pule o le tautua." O le tofa fetala'i, o i e aiga uma i ai mea uma. A sese tai, ia tonu uta, e faapea foi pe a faaletonu mai le tulaga o fonon tetele o itumalo po o nuu. E saili po o fea o i ai le tofa. Ou te le faaleaga

i le Komiti, faafetai, faafetai i le tofa e le faigofie. E faafetai i lo outou silasila totoa ma la outou matau, leaga o la e faafofoga Samoa.

Ona avatu ai lea o sau faamataga i le tofi lea ou te tu atu ai o Gagaemauga 1. E talu ai ua fai suiga fou, o lea ua taua ai matou o Sagaga 3. O le tofa ua faaalua i le Maota nei, ou te talitonu o lo o i ai pea le tofa alofa, e taitaiina ai faaiuga fai a lo tatou Maota. E leai se isi e atoa, e leai foi se isi e sao, aua o le tofi lea o tatou e tofi le tagata ma lona sese.

E pei ona ou taua i vavega tetele ia o lo o faaali pea i Leauvaa i le 4 masina lenei. O lo o i ai le suauu, o le mea moni lava i luma o le Atua, o le Maota lenei o Samoa. A amata le fonu, ona tatou ave lea i luma o le Atua, molimoli i ai manaoga o le atunuu lenei, o tatou foi o taitai o itumalo. O le feau lea ou te taua, masalo o le musumusuga lea a le Agaga o le Atua, omai e asiasi mai ia te au lea. Aua o le mea moni, o fofoga o Maria ma Iesu, o lo o tatafe mai ai le suauu, e oo mai i le aso ma le taimi lenei, o lo o faapena ona maua pea le suauu. Sa i ai le manatu, a tele naua le suauu e maua, o le a ou taumafai e faaoo mai le suauu paia lea, e tofufusia le Maota, ma le suauu. O le molimau ave lea o lo o soifua le Atua. O i tatou uma foi o le faatusa o le Atua.

O nei lava fevesiaiga ma ia tulaga e tulai mai, e le i tofia foi au e lou itumalo e saili ni pati ou te sau ai. E leaga e le o ni faiga pati. A silasila i tatou mau, e te tautua le tatou atunuu, lou Malo. O le ala lea ou te avatu ai le tuualalo. Ou te faamalulu atu i lona ituvai. I lau Afioga i le Palemia, le mamalu i le paia o le Kapeneta ma lona itu o le Maota, ia outou silasila i le Atua ma Lona finagalo. O le feau lea, e mautu ma lelei maopoopo le atunuu lenei, pe a tasi le tofa, e limataitaiina ai i tatou i le agaga o le alofa e faatino ai o tatou tiute.

O lou tulai atu ou te le tulai atu o au o se HRPP, ae ou te tulai atu o au o le sui usufono o le Maota. O le Maota o le faautugatagi e aumai i ai vaivaiga, i totonu o le Maota lenei, e fofoalamea, o fea o i ai le tofa, le tofa faatupu, fale i le Atua outou finagalo.

Lau Afioga i le Fofoga Fetalai, ua iu se faamatalaga, ia manuia le usugafono a Samoa.

FOFOGA FETALAI: Ua faamalo faafetai i lau Afioga Sala, o se tasi foi o sui usufono matua o le Maota. O lea foi ua faafogafoga ma le totoa le paia o le Maota, aemaise foi o le Taitaifono. O lea ua e saunoa faatalosaga, o lea foi ua faafogafoga ma le totoa i le uiga o le talosaga, aumai foi mau. O le mea lea, malo saunoa, faafetai ia te oe foi le toeaina matua mo le saunoaga. O lea e faagasolo pea le tatou galuega, ma faamoemoe pea i le Alii.

O lea ua matau atu ua tulai mai ia le sui usufono o Sagaga 1, Hon Loau Solamalemalo.

Afioga Hon LOAU SOLAMALEMALO KENETI SIO (Sagaga 1): E faafetai i lau Afioga i le Fofoga Fetalai mo le avanoa, e tulai atu ai ma le ava tele e fai foi se sao o le itumalo, e tusa ai foi ma le Lipoti ua opea i le Maota.

E manatu foi o lea ua maea ona palegaaau le taliga o le sua i lau Afioga, aemaise o le Taitai o le Maota ma le la itu faapea foi lenei itu. Ua maua le faasiligamalosi aua le faaauauina foi o tiute ma faiva e pei ona valaauina ai i tatou.

Lau Afioga i le Fofoga Fetalai, e ta liu ae popoe ne i puaina i ala se faamatalaga, aua le lipoiina foi o le Lipoti e pei ona taoto nei. E ui o le Lipoti ua faapena ona taunuu mai i le taeao lenei, o lea foi ua maua le taimi e faitau ma auiliili ai foi. E manatu foi e le o se Lipoti tele i lau lea matau. Ae i ai ona uiga anoa o lo o faapena ona aumaia ai. Ae le i oo la se faamatalaga i le Lipoti, e ao ona momoli le agaga o le faafetai i le Taitaifono ma le Komiti, i tupu ma ee sa faapena ona filitagaga ina ia faapena ona faamaopoopo le Komiti faapitoa lea, e lauliliuina le tulaga e pei ona i ai le tulafono ma toe lipoti mai i le Palemene.

O sa ma faiga ma le paia o le Maota ia nuunuu atu o paia lava mai le vavau e oo i le faavavau.

Lau Afioga i le Fofoga Fetalai, pe a tatou toe to manatu i le amatamataga maia o lenei mataupu, ona ou manatu lea, ou te augata e tautala i ai lau Afioga, i le tele ma le anoanoai o fita na lofia ai si o tatou atunuu, aemaise o le tatou Palemene nei, ina ua tulai mai foi le Faigamalo i le faiga palota i lenei Paeauga XVII. E manatu foi o i ina lea e afuafua mai ai, ma taunuu mai ai foi i le taunuuga e pei ona i ai se faitioga foi ua faapena ona momoli mai i lau Afioga e ala mai i le Palemene, ua afua ai le iloiloga a le Palemene o lenei Lipoti, na faatuina ai le Komiti. O le upu moni lau Afioga i le Fofoga Fetalai, e matau lava ma le totoa i ona vaega e pei ona iloiloina e le Afioga i le Taitaifono ma le paia o le latou Komiti, ua faapena ona taunuu ai i se taunuuga ua aumai ai se latou fautuaga.

O le mea lea e momoli atu ai le faafetai i lau Afioga i le Taitaifono. O le matau foi i le fautuaga e pei ona tuuina mai, ou te toe manatu ai i toeaia na latou asaasaina le gasu o le taeao ma le lavelave, e faapena lau matau i le fautuaga ua tuuina mai. E pei e foliga mai o lo o faapena ona momoli mai ai se feau ina ia faapena ona toe timata ai le upega, fetuunai muniao ma fefulisai faalaaui mamafa le tofa ma le uta a le Maota nei. O le Maota o matai, o le Maota e pulea e matai, o le Fono Aoao a Samoa e faapena ona lipoi ai upu aua le lelei o si o tatou atunuu. O le filiga foi na faapena ona saili i le tai, saili i le vao sui filifilia o le Maota, latou te faapena ona lipoi upu a si o tatou atunuu. O le agaga lena ua faapena ona saofaga mai ai i le Maota lenei. O lupe lava na faia mai le fuifui latou te lipoiina upu fai a si o tatou atunuu. O amioga taualoa po o ni amioga le migao, o tala faatoeaiina, a tatou matau i si o tatou atunuu, e i ai le autogisala, e i ai le auvaesala, e i ai le aufaoololomaau. Ou te talitonu o le agaga foi lea o le Taitaifono ma le paia

o le latou Komiti. O le soli o le tulafono, e le tautala i ai le sui usufono o Sagaga 1, a o lea ua mauiua pe a fua i le suesuega a le Komiti, ua soli le tulafono, ua aafia i le tulafono. O lea la ua faapena ona taatia mai, aua e le faia e le Komiti se faaiuga lau Afioga i le Fofoga Fetalai, o le upu moni lea. O lea ua aumai le latou fautuaga, taatia i le Maota e filitagaga i ai ma aumai le tofa ma le uta, a o le moe ia faapena ona lagomalu ma sologa lelei galuega a le Palemene.

O le agaga foi lea o lou tulai atu i lenei taeao. E matau atu foi ua tau faapena ona ogatasi foi le futia ma le umele. O lea e maua atu, e talitonu le mafaufau o lea e i totonu o le Maota le tofa, ioe, saili i le tai aua le faamoemoe. O le solitulafono ua faapena ona faamaonia e le Komiti. O le mea lea lau afioga i le Fofoga Fetalai o le agaga lea o le tulai atu, o le a se matau mai a lena Itu lau Afioga i le Palemia ma lou auvaa, aua o le upu moni, a tatou o i tulaga faafono, o lena e i ina le numera, e faapena ona faatu ai se lafo. Ae tatalo ma le agaga mauualalo, se i o tatou seu aua le faalogotau a si o tatou atunuu, le tapuaiga a si o tatou atunuu. O le agaga foi lea masalo o la e silafia e le Tamaitai Palemia lou oo atu, ina ia faapena ona faataatiaese ni futia ae alo i luma lona sa o lea ua see, aua le faigamalo, aua le tapuaiga a Samoa, o lo o faapena ona tapuai mai i o tatou faiva.

E pei o le agaga lea lau Afioga i le Fofoga Fetalai, o lea e matau ua saunoa foi nisi o lenei Itu, ma le Afioga i le sui Taitai ma nisi o sui a sui usufono. Ae ou te le teena le Lipoti, faafetai i le tofa lau Afioga i le Taitaifono ma le paia o le Komiti. A lea ua aumai laolao ia lau Afioga i le Fofoga Fetalai. A fai lava o nanei, o lona uiga e faapena ona fai sou finagalo. Ia fonu na i toeaiaina i lena vaiaso o le a le leaga, a o lena e i ina le tofa.

Lau Afioga i le Sao Faapito ma lena itu, ia outou alofagia lo matou faaoololomaau atu. Aua o lo tatou atunuu, e i ai e togisala ae i ai foi le auvaesala, e faaoololomaau aua se fita a o se pagota foi ua faapena ona oo sona le... e faapena. O tatou o matai fai nuu ua tatou masani, e sau lava mai luga le sala, ae uma ane e leai lava se mea e faaoololomaau. O le utaga o le tofa e fau ai Samoa.

Ia agalelei le Atua i lenei aso lau Afioga i le Fofoga Fetalai, ia maua lou malosi. Ia faafetai i lau Afioga i le Taitaifono ma le paia o le Komiti, leaga o lea ou te faalogo atu e pei ua tau nuu le toau mai le amataga ae leai. Ua lava lau matau foi, o le tofa ma le utaga sa faapena ai ona tofia lenei itu, ou te talitonu o lena sa outou auiliili lea tulaga. O lea ua aumai lona aotelega lautele, ou te manatu e taunuu lava i le matagofie. Ma le agaga faaaloalo. Ia manuia le Fonousu, manuia le tapuaiga a Samoa.

FOFOGA FETALAI: Ua faamalo faafetai le tofa, i lau Afioga i le Toetaufanua a le Malietoa, aua foi le sui usufono mamalu mai Sagaga 1, ia malo. O lea ua faafofoga ma le totoa le Palemia ma le Kapeneta aemaise foi

o le Taitaifono, a o lea ua aumai lou faaoololomaau. Ia tatou lafo laia i le Atua, le tofa ua faaali i totonu o le tatou Maota, malo saunoa faatoeaina.

Le paia o lo tatou Maota, o lea ua fou mai le sa o le sui usufono mamalu o Anoamaa 1.

Afioga ALAIASA MOEFAAUOUO MALAGAITUTOGIAI SEPULONA MOANANU (Anoamaa 1): E masalo o le a taoto ia faalaaui mamafa le fitiuta ma le folasa e pei o le upu e fai i le motusa. Aua o lele ua mapu i falematu le paia maualuga o le Palemene o Samoa. Lau Afioga i le Fofoga Fetalai, faapea foi le afio o le Taitai o le Maota lau Afioga i le Tamaitai Palemia. Aemaise le mamalu o le Kapeneta ma le Palemene o Samoa. Ua tau mafaufau pe sii le matou sa pe toe... leaga o lea ua uma atu le saunoaga a le matou Taitai, ae ui i lea o le a taumafai atu pea ia se motugaafa o lenei aso ma le faamoemoe.

O aga e pei ona taua e le Taitaifono o aga faale-nuu, fonotaga faale-nuu, tatou te ioe ma talitonu leaga o lau afioga le paia o lenei Maota, o tatou o tausuu. O tatou o matai e faia tonu o tatou nuu. Ae a le Maota lenei? e leai o le faletele lenei, e tua mai i ai le faleoo. O a lelei o a faaletonu, o i e fai i ai le filiga, o i foi e iloa ai le tofa, o i foi e iloa ai le faautautaga mamao. O lenei la taeao, o aga lava ia faale-nuu ma fonotaga a le nuu, e leai se tala a le pagota e faia, e leai. E na ona sau lava tootuli, toetiiti lava ou tootuli atu loa lau Afioga i le Fofoga Fetalai, leaga e faapena, e na ona tootuli lava faatoese, o au ua ou sese, o au ua ou agasala, ona aumai lea o le tofa. A sala uta tonu tai, a sala tai, tonu uta e faapena le faiga o fuafuaga a lo tatou atunuu.

Lau Afioga i le Taitaifono, o lea ua i i le finagalo o lau Afioga, ma le Komiti na filifilia e lau Afioga i le Fofoga Fetalai. O a mea ua oo i ai la outou suesuega, na ona avatu le matou faafetai ma le faamalo. Ua outou tapena faafafine toaga le faamoemoe, tou te le i faia foi ni itu faavaega faaupufai pe faaituau. O lea ua aumai lo outou finagalo i lumamea, o lea ua silasila i ai le taitai o le Malo, o lea ua silasila i ai le Fofoga Fetalai, o lea ua matou matamata i ai, ia malo fai o le faiva. Ua faafetai le tofa, mamao lava le tofa lea ou te vaai ai i totonu i i. O le a le aotelega o lenei mea, e leai se pule e faia, lafo mai i le Maota i lau Afioga i le Taitai o le Malo, lafo mai i lau Afioga i le Fofoga Fetalai, e aumai ai le atoaga o le faamoemoe. O sao lena o lau faitau i le mataupu lenei. O fea la lea e taoto i ai? O lau Afioga i le Tamaitai Palemia. E na ona matou faatoese atu ma faamaualalo atu, o ou ai ia aua le agai i luma o le sa o Samoa, e tasi lea ou ai. Ia sasaa le tofa, tofa faale-Atua, tofa faatupu. E le tauiso lava lau tupu, e le tau toe faailoa, e pau lea o le matou tatalo ma le loto maualalo lau Afioga le Taitai o le Malo. O a ni futia ua see, o le matou lea tautaulenu i le tatou Maota, tatou o i luma. E tele galuega e sili atu ona taua tatou te o i luma, aua le manuia o Samoa.

Lau Afioga i le Fofoga Fetalai, e leai se agaga tatou te tulituli le amiotonu ma le sao, leaga o lo o soifua le Atua na te silafia mea uma. E na o le pau

lava lea o le mea e i ai le amiotonu, o le faamasinoga lea a le Atua. A o lau Afioga ma le tatou Maota, o upu lava ia o le Tusi Paia, “aua ne i goto le la, o faapena pea ona faapunitia pea lou finagalo i se mea, tatou te o ma tauamo.”

A o le matou tala, alofagia e le Atua lenei aso i le filiga o le tofa ma le faautaga, tapuai mai Samoa, o la e tatalo mai mo ou faiva ma o tatou faiva, ina ia manuia lo tatou faamoemoe. O le matou tala lea ma le agaga faaaloalo. E lafo atu i la outou faaiuga, o fea e fai i ai, a o lea ua matou fai atu, e tasi lea ai o lau Afioga le Taitai o le Malo, e aumai lau tofa faale-Atua e sufi ai mea uma, le pae ma le auli lena e manuia ai Samoa mo le lumanai.

Soifua ma ia manuia, faafetai mo le matou avanoa.

FOFOGA FETALAI: Ua malo tofa, faafetai faauta i le sui usufono mamalu mai Anoamaa 1, o se tasi foi o sui matua o le Maota, malo lava. Ma le talosaga mai, tatou ave lea i uta, tatou faamoemoe pea i le Atua, o le a fesoasoani mai a o faagasolo pea le tatou mataupu.

E matau atu o lea ua tulai mai le sui usufono o Palauli, tulai mai.

Tofa LAGAAIA TIATUAU TUFUGA (Palauli 3): Faafetai i lau Afioga i le Fofoga Fetalai ua tuuina mai se avanoa. E manatu o le taeao ua alu sa faaumutitiu ai i siuolagi lana Afioga i le Fofoga Fetalai, e momoli le faafetai a o le tatou taulaga osi e avae i le Atua e tusa o Lona alofa faasoa. E i ai lenei taeao o lea ua tatou fesilafai i le tupua lenei ma le Maota lenei o Samoa. E i ai foi talatuu ma mau faaleatunuu, o le maimoaga nai le Tia o le Vavau na tafilitai ai le lupe a le tiamalie, ae tafili lupe o le taeao. E i ai le aso ma le fetuunaiga o le saili o le tofa a o le faautaga oooo e molimoli e tatou te saili le mea sili. O fuluula na mo Samoa nei ma a taeao ma i e lua, aua sona saolotoga, aua sona filemu, a o le fealofaniga o le paega ma alaafaga.

O paia la o taeao ma le aso ma le Maota lenei, e leai, e talitonu lava le faamoemoe, e alalasi Maota ma tupua o Samoa, ona faitau lea, ou te le tatua o Malo pe toe tapue muliomalo, pe le matau laulautasi pe ou te faitau i le vaitaulua, pei o le fetalaiga i le gataifale, leaga e leai lava se tautai na te toe sosofa le faalao o le taiao. A fua foi i le Maota lenei, o paia o Samoa e taoto i le Maota lenei. Sa ou tautala ai foi, e mafua ona o le manatu o le faamoemoe, ia filemu le Palemene o Samoa ma ia fealofani. O le mea lea sa manaomia, leaga o le Maota o le Faautugatagi, a o le Maota na utu ai le toto masaa. O le Maota foi na fafatu ai e le autulatoa ma le aufueloloa titi aua se saolotoga o Samoa. A lea ua tatou aeae i faleseu, ae saa i maa o malie, eva i lagitau. O le ala foi lea ua mafua ai ona fesootai le atunuu, sootauau ma atunuu o le lalolagi. E mafua i se a? Ua gase taua ae tu le Malo o le Atua, ua mafua ai ona tatou fesilafai i le fofoga ava ma le avafatafata. A faitau foi i le amata maiga o le Palemene a Samoa, o, e ese a le filemu, toa le tai. O le tofa lena o le vaatele e toa i ai le auaumalu pe a mavae matagivale, a o le

faautaga oooo sa saili i ai se manuia o Samoa. Ua a nei? Paga lea, ua faafogafoga tapuai Samoa ae fetauai le Palemene. E le o ni mea ia e faia i totonu o le Maota o Samoa, ioe. Ua felafoai ai upu e ogaoga, upu e le fetau. Ua faatino ai amioga e le lelei ua faasausili. Ae le se Maota tatou te le i omai e faaali ai se fia lelei po o se malosi o se isi, e leai. Na tofia tatou e Samoa tatou te omai e taitai le atunuu. Taitai faapefea? O le alofa, faamaoni ma le amiotonu. E leai lava la se vevesi o le a maua? A o le mea ua tulai mai, paga lea, talofa ia Samoa ma lana faafogafoga? Ia, e faamalulu Samoa i lau faafogafoga ne i sipa se lamaga ona gase lea o malolo, a o se pati ne i sala a o se tualogo ma le lauseoso, o a ni faaletonu o le Palemene, o le agaga moni lea. E auma le atola na molia i tauga? E lepeti ai le filemu, e maumau ai le nofo fealofani o Samoa, ioe. Leaga a fagailupe le la ona mapuitiga lea o le ata. A mapuitiga le ata, a, paga lea, e auma le toe agi o le la'i? E auma? Ua galala, ua matelaina, ua maosiosia ma mafatia, faafogafoga tapuai Samoa po o le a se mea o le a tatou faia mo a taeao ma i e lua? A o le mea ua tupu i le Palemene a Samoa, a, paga lea, ua felauai ma felautoai, o upu ua fesiliai, ua faasausili, leai se mea e maua ai.

O le tatalo foi i le tatou Palemene, e matau atu pei e fagota i le sao, o a fa au? Momoli mai i le atuofa matou te teu i le uu logologo, tatou feiloai faatasi, saili se manuia o Samoa. O a foi ni fatia ua alu, o le fautuaga lava ma le tuualalo, tagi a le fafine o le faaitu lea ma fai ane, a paga lea lou au, onosai, taofi le fua e le isi, valaau a tatou le talia upu ia, ia paga lea, e ae fua o tatou faiva, e ae fua. A o la e faatali Samoa po o a taimi e faatino ai ia atinae ma ia mea lelei mo se tamaoaiga ma le lumanai mo a taeao.

O le mea lea e avatu ai le fautuaga i le tatou... ia o lea e manaia o le faalogologo i saunoaga ua aumai, ae ua alu aso, o le a le mea na le ave ai le tuualalo lea? E ese le manaia. Le tuualalo lea e maua ai le filemu ma le fealofani, tatou te le toe tepa i tua. Ia, o le agaga moni o le tatalo lea ua avatu, o a fa au, momoli maia le tofa ma le faautaga tatou o ai, leaga... Faafetai mo le lagolagoina o le Tulafono, faafetai i le Afioga i le Taitaifono ma le Komiti. O le Tulafono foi lea ua taofia ai ma noatia ai tatou i amioga le taupulea i totonu o le Maota lenei. E sa, aua le aumaia i ai ni amioga le mafaufau i totonu o le Maota lenei. Ave i ai a tatou amioga faaaloalo leaga o la e faafogafoga mai Samoa. Silasila mai Samoa po o faapei ona faatino o tatou tiute na aumai ai tatou, ae tatou te le i omai e faaali ai so tatou fialelei po o se malosi po o se fia atamai o se isi. Leai, e saili i luma o le Atua le faamoemoe.

Ua uma foi le leo o Palauli. Agalelei mai le Atua. O a ni faafitauli, lafo i le auau o fisaga o matagi. E le faigofie le tatou galuega, ae faamoemoe i le tatou galulue faatasi.

O le isi mea lea ou te tilotilo i ai a saunoa le Fofoga Fetalai o e finagalo i ai saunoa mai i le ioe, e ioe lava na o matou alii ae tou nofonofa lava, a o le mea tatou ioe faatasi, tatou galulue faatasi ona mautu lea ma lelei le tatou

faamoemoe. E leai ni Itu Agai o i totonu o le Maota lenei, e tasi lava tatou ona manuia lea o le faamoemoe. Agalelei mai le Atua. Faafetai i lau Afioga i le Fofoga Fetalai, foai le tofa, foai lou malosi, aua lau taitaiga ma le tausiga o le Maota.

Ia alofagia foi le Afioga i le Tamaitai Palemia ma le Kapeneta...

Afioga Alaiasa Moefaauouo Malagaitutogiai Sepulona Moananu: Lau Afioga i le Fofoga Fetalai...

Tofa LAGAAIA TIATUAU TUFUGA: Ia i ai le alofa o le Atua ma ana faamanuiaga. Ia alofagia foi le tatou Palemene. Le tapuaiga a Samoa, ia agalelei le Atua. Faafetai foi i lou itumalo ma le latou tapuaiga ma faamanuiaga. Tatou feiloai nanei. Fa soifua, manuia le tatou Fono.

FOFOGA FETALAI: Malo fetalai i lau Tofa Lagaia, le Matua mai le itumalo o Palauli Nu.3, malo foi le faauta, malo foi le tofamamao. Le silasila foi i le mamalu ma le tatou Palemene, ia malo foi le faaso. Ia o lea foi ua faafofoga mai lea Itu, ia o le uiga lava lea o le tatou Maota Fono nei e faapena ona faaso, o tatou o matai tausiaiga, tausinu. Ia o le agaga lena ia maua pea e i tatou le galulue faatasi ma le fealofani.

O le mea lea, ou te tau matau atu o tau tulai mai lau Afioga pe i ai se mea o...

Afioga Alaiasa Moefaauouo Malagaitutogiai Sepulona Moananu: Ioe lau Afioga i le Fofoga Fetalai, ua ususi a foi faamanu o savili le sa o le faautaga a Palauli, e pei o lea ua alualu lava e pei ua faatonu mai matou matou te ioe faatasi i le mea e manao i ai. Ou te faamalulu atu Palauli, leai e pule lava Anoamaa po o fea e ioe i ai pe leai. Ia ma le agaga faaaloalo.

FOFOGA FETALAI: Ia, e talitonu foi o oe o se tasi Matua o le Maota. Ou te talitonu foi, e leai, o uiga lava o tala a Palauli, o lena e i ina le tofa ma le moemamao. O le mea lea, ia malo faafetai.

O lea ua matau atu o ua tulai mai le sui usufono mo Falealupo, ia tulai mai lau Afioga i le sui usufono mamalu.

Afioga FUIONO TENINA CRICHTON (Falealupo): Faafetai mo le avanoa i lau Afioga i le Fofoga Fetalai, aemaise foi le paia lasilasi o le Maota, aua lau Afioga i le Tamaitai Palemia ma le Sui Palemia. Ia, le Afioga i le Fofoga Fetalai aua le galuega tau amata ma le galuega o le a faai. Ae se i taumafai atu ia se leo o lenei itumalo o Falealupo, aua le Tulafono ua aumai nei po o le iloiloga a le Komiti aua le faamoemoe o le tulaga aloaia ua tatou tapena ma tatou oo atu i ai.

E amata lava ona amata mai a tatou Fono e pei ona maua i se tasi o saunoaga a le la Itu, o lenei lava e tauailapalapala lava le atunuu. Ioe. E le sese ia upu. O matou foi nei e fou mai le Maota, sa matou omai faapea ai o i ai ni tofa lelei e taitaiina ai i matou nei faatoa omai, a o le a le mea lea ua vaai atu nei i ai? Ola, ola, se ua na o le mataga lenei Palemene. Ua avea lava tulaga o polokiki ma tulaga ua ogaoga ai le tausiga o le Maota i ona upu filemu e faatonutonufolau ai mo le lumanai, aua Samoa ma ona lelei mo a taeao. Talofa, talofa i tulaga ua tatou i ai i le Maota lenei, ona o amioga ma mea ua tutupu i totonu o le Fonousu a Samoa, ua iloa mai ai le tulaga e faapaole ona aumai i totonu i tulaga aloaia o le Fono Aoaio Faitulafono.

O lenei taeao, e moni lava le tala e fai i le gataifale o matou, sa ou alu e sue se i'a i le taeao e anovai, aua le taliga o le sua, talofa, ua asia le sami, ua na o le sapatu motupa i vasa o lo o eva ai. Ou liliu mai e tausaili se figota e tali ai le sua, talofa, ua na o atigi figota ua leai ni momoga, ona o le mea ua tupu, ua liusuavaia le ute o le figota sa tali ai le laalaai, a o le lalaoa o le mataai o tautai o Samoa, e pei o le taeao lenei ma le aso. O se aso e matagofie, ae ua ala ona faapea, ona o le tulaga ua tatou i ai tonu lava, o lea ou te vaai i le pepa lenei, o le faigofie ia. Ana faapea ua malilie mai lea Itu i le Tulafono, e le iloa pe toe omai taeao. A o le mea lea ua tilotilo i ai o lo o fai pea fai pea le tatalo ma le tetee, ia e talitonu, ai o le a tuai ai ona omai toeaia. A o le manaia ia o le pepa lea, i le maea ai o taualumaga o iloiloga a le Komiti ua faaiugafonoina ai, e fautuaina le Fono Aoaio Faitulafono e faapea: Ina ia tuueseina ma faamalolo mai galuega a le Palemene sui usufono o le Itumalo Palota o Lepa ma le Itumalo Palota o Faleata Nu.3 e amata mai i le aso e faamaonia ai e le Fono Aoaio le Lipoti a le Komiti o Tulaga Aloaia ma Amioga Taualoa seia i ai se aso. O le matagofie ia o lenei mea.

Faafetai i le tofa i lau Afioga i le Taitaifono o le Komiti. E malamalama lava le aumaiga o le mataupu. Ua ou iloa foi o lenei Maota e tumu i Aoaio Fesoasoani, e tumu i le aufai tofi i le lotu. E tatou te talitonu, o nei lava o taeao lena, o taeao i e lua, e tilotilo ma faamoemoe mo se lelei o si o tatou atunuu. I lena Itu aemaise o le Malo o lo o tulai mai, tatou opogi faatasi le fuafuaga mo mea lelei o le tatou atunuu, ae soia ia. Se i o tatou alo ese ia mai mea faaituau ua faigata ai fuafuaga o mea nei o lo o fuafua pea. O lea foi ua vaai atu o lea o le a tala taeao le tai \$200,000 a lea itumalo ma lea itumalo, a o lea lava e faapenei. Oo atu ia Iuni velo mai i totonu ma le \$1miliona a le itumalo, a o lenei lava e faapenei. Ia o le mea lena e fai atu ai, aua o itu lava a tagata o itumalo o lea e tetee, i lou lava talitonuga i lau Afioga i le Fofoga Fetalai ma le mamalu o le Maota, aua ne i avea i ai se mea o mea ia, o faamaoniga ia o mea tatou te tilotilo i ai, mo le lelei o le tatou atunuu a taeao. Faafetai i le faafogafoga mai a atunuu e mamao aua Samoa o potopoto ai, aemaise o le sau lava mai Aleipata seia paia Falealupo, o paia ia o lea e i totonu o le fale lenei i le aso lenei. O le aufaitofa, o le aufaitonu, o le aufilimealelei aua se taumafataga o Samoa mo a taeao seia

oo lava i le taimi o faaiuga o lenei Nofoaiga, o tumau lo outou fealofani. Na pau lava lea o le mea na tapatapa mai ai Iesu ina ua tietie i le nofoaafi, ua ola afi o le nofoaafi o le a malaga i le lagi ae toe tapa mai lava, “E le o ni ou soo outou pe a outou le fealofani.”

Ia le paia e o le tatou Maota, ia maua tatou i le fegalegaleai, feoeoeai. A o le Tulafono ua aumai nei, ia e le auese ai se taofi, e alofa i lenei foi uso, ia Lealailepule ma le Afioga ia Tuilaepa. Se o tagata iloa o le tatou Palemene, ae leaga ua soli le Faavae. Manuia le Fono.

FOFOGA FETALAI: Malo faafetai, malo foi le faauta i le sui usufono mamalu mai o i le tulimanu i Falealupo. Malo faafetai o lea foi ua faafofoga ma le totoa, ia, o lea foi e molimoli mai ai ma le fautuaga ia tatou maua le fealofani. Malo fetalai, malo foi saunoa.

O lea ua matau atu o lea ua tulai mai le sui usufono mo Salega 1, lau Afioga Fepuleai, o lou avanoa lenei.

Afioga FEPULEAI FAASAVALU FAIMATA SUA (Salega 1): Faafetai i le avanoa i lau Afioga i le Fofoga Fetalai, ua mafai foi ona maua se avanoa e tulai atu ai lenei sui usufono e fia fai foi se lagona o lenei itumalo po o lenei usugafono e tusa ma le faaiuga a le Komiti na filifilia e le Palemene e taumafai e suesueina lenei faafitauli vaeane le afio i lau Afioga i le Tamaitai Palemia ma lau Kapeneta, tainane o sui usufono mamalu o Afioga i sui usufono o le Palemene nei. Ia tainane foi o le la Itu i le afio o le Afioga i le Sui Taitai ma le mamalu o le usugafono a le Itu Agai, a o se faalogologo malamalama foi a Ofisa Sili o Pulega o Matagaluega ma le mamalu o le Matagaluega o le Fono Faitulafono a Samoa.

Ia, o le taeao lenei, e taua i lenei sui usufono mai Salega 1, o le taua ia te au o lenei taeao, fai mai le manatu o le tupu tamaitai tafaifa, ae le i oo i le tulaga lea ae na alua tu i Salafai se i laga le toilalo, Fai mai lana tala i le ulugalii lea, “Omai tatou o e tau le taua, a o sa ia o le taua, le lua laau lea e te lua tau ai, aua ne i lua sopo mai i lau itu ne i lua lavea i lau laau, ou te le sopolaa foi i le lua itu ne i ou afaina i le lua laau.” Paga lea, ua sopolaa upu ma tala a le Palemene i le isi itu i le isi itu, ua foliga mai ua mamafa saunoaga. O lona uiga, ua le mulimulitai i aulape o le taua, le Tulafono Tumau a le Maota. O le a lea Tulafono? O amioga taualoa ma le vafealoaloai. E leai se usugafono, e leai foi se sui usufono e le i tuu lona aao i luga o le Tusi Paia ma tauto i le Atua o Samoa, ou te tautino atu ia te Oe ma le faamaoni i lana tautinoga o le loto faamaoni. A o le tulai mai o lenei mataupu, e lagona le vaivai o le itumalo o Salega 1, ua le fua se tapu. O upu ma tala tatou te le toe foi i tua. E i ai le upu faa-Samoa, lafo i nuu le aina. Ae i ai foi le muagagana faapea, e faamagalo ae le galo. A mamafa ni saunoaga ma ni fetalai, e i ai tua o patatua i totonu o faiganuu, e leai lava se isi o tatou pei ona molimau nisi o sui usufono mamalu tatou te saofafai i pou o

faaaloaloga a aiga i totonu o afioaga. A aumai le tagata agasala, ona ave lea i ai o le fautuaga ma ave i ai le aoaiga. A mamafa le aoaiga, e muliai ua magalo le sala. Ae a faataetaealuga le fautuaga, tau mai i ina e le matai, ona o loto e tumau le faasalaga. O le talitonuga o Salega, e le mamafa sau tala. O lona uiga, ua ou iloa foi le taunuuga o lau tautalaga i le afiafi lenei po o le taeao lenei.

Faafetai i lau Afioga i le Taitaifono ma lau Komiti mamalu, faafetai Lautafi, leaga o le Pule, o le tofa ia Asiata, Satupaitea. A o lea ou te tu atu o Tuisalega, ou te tu mai le isi itu o le ta itumalo. Faafetai Faimalo. I lau matau i le Lipoti, ua tutufaatasi Gagaifo ma Gagaae e lagolago le Lipoti lea. Faafetai Siumu, lou itumalo e ala i lau sui usufono, lau Afioga Tuuu. Faafetai le Sui Taitaifono, Faleata, lau Fetalaiaga Ale. O lo outou sainilima i le Lipoti, ua lava lea e fai ma ou talitonuga ua outou talia le faaiuga. Ae i ai le fesili e tatau ona ou fesili ai; fai mai le fesili lea ou te nofo ma au, o le a se taua o le mataupu lea na suesueina e le Komiti mamalu? Na ou manatua lava le matai o lou aiga po o lou nuu i Salafai, aua le afioaga o Tapaau ma Salelologa, fai mai lana saunoaga na ou matamata ai i le TV, aua le tuufaua.

Lau Afioga i le Fofoga Fetalai, o lona sou lagona, o amioga ma uiga o lau tuualalo, aua le tuufaua amioga ia. O le isi fesili, o le a la se fofo? Aua a tatou sua atu, tulou, sua mai, laga atu, laga mai, ae leai se fofo, e ui la le mai. O le fofo a Salega, ia fua se tapu i le tatou vafealoaloai, ia fua se tapu. O upu ia a toeaiina pe a oo ina aoai se alo ma se fanau i totonu o le nuu, fua se tapu, ia iloa le va o le tama i lona tuafafine. O upu ua lafo ma gagana, e le faigofie. O le tuualalo a Salega i le tatou Maota Fono, e tauala i lau Afioga i le Fofoga Fetalai, aua le tuufaua amio faapea, ae fua se tapu. Ae fai mai le igoa o le fanua o le afioaga o Tapaau ma Salelologa, lea na maua mai i le saunoaga a le sui usufono mo Falealupo o Galegale, a faaumi, o Fegalegaleai.

A o le uiga o le fanua lea, aumai le fanua lea tatou nonofo ai i le aso lenei, ia tatou fegalegaleai, ia tatou fealofani, ae fua se tapu mo Samoa ma a taeao. Manuia le Fono lau Afioga i le Fofoga Fetalai.

FOFOGA FETALAI: Malo faafetai, malo foi le tofa, malo foi le saunoa i le sui usufono mamalu mai Salega 1, malo lava faasoa mai i le tulaga foi o le tatou Lipoti o lo o talanoaina i totonu o le tatou Palemene.

Ae faamalulu atu i le sui usufono ua leva ona maua atu, e faamalulu atu i le sui usufono mo Aana Alofi Nu.2 lau Afioga Aiono, ia o lou avanoa lenei. E faamalulu atu o lea faatoa maua atu, ae o le avanoa lenei e saunoa ai lau Afioga.

Afioga AIONO TILE GAFA (Aana Alofi 2): Faafetai tele i lau Afioga i le Fofoga Fetalai, ua leva lava ona taumafai atu ae sa faaaloalo lava i lou finagalo aua le taitaiga o le tatou galuega. E momoli atu le agaga faafetai. Ou te tulai ma le ava, e tautala foi ma le migao i le Maota o Samoa aua le

Palemene mamalu, e fia fai foi sina upu, puupuu lava se manatu lau Afioga, o la e foi e faafofoga tapuai si o matou itumalo. Sa ou fia sosoo i le Afioga ia Sala, ae peitai, o lo o i ina le faasoa, ae faafetai tele i lau Afioga. O le mataupu i le aso ma le tulaga o le Lipoti, ia, e le toe tele se leo. Ae ou te faatulou lava i le paia o le Maota. E faamalulu atu, o le Maota o Samoa, o le Maota e lauiula ae pouitoa pei o ia upu o le atunuu. I le faafofoga tapuai foi a lo tatou atunuu mai mauga maualuluga ma tulaga faaaloogia o le tatou atunuu aua Le Ao o le Malo ma... seia oo lava i se toe tagata, alo ma fanau.

Ae muamua ona ou faapea atu lau Afioga e tusa ma le Lipoti a le Komiti, faafetai tele i lau Afioga i le Taitaifono, faafetai mo le Lipoti, faafetai mo le galuega. Sa ou mafaufau lau Afioga i le Fofoga Fetalai i le fasi fuaiupu lava lea i le taeao a le Afioga i le Taitaifono, malie atoa lou loto, e alofa le faaiuga, e alofa le faaiuga. Sa ou mafaufau i ai, afai o le saunoaga lea a le Afioga i le Taitaifono o lea ua taoto mai i lau Afioga ma le Palemene, o lou fiafiaga lena ma le agaga faafetai. Ae le i faalateleina sou manatu, le Palemene o Samoa, e tele lava saunoaga matagofie o lenei aso ma lenei taeao, o le maota e tulutuluitao, o le maota e lauiula ae pouitoa. O ou fatafola ma ou fata tapuai, o la e tapuai Samoa ma faafofoga. Ioe. Malo faafetai. O le maota o matai e saili ma vaili ai le tofa ma le faautautaga aua se manuia auiluma o le tatou atunuu, o lupe na faia i le fuifui, na tofofi mai i tatou e o tatou itumalo, ae agiga ai le finagalo o le Atua i Lona tusiaao mo i tatou aua Samoa ma ona upufai mo se manuia.

O le mataupu lea ua aliali mai e tusa ma le galuega a le Komiti, e le o se mataupu foi e faigofie, leaga e moni lava, e tatau lava ona tatou mulimulitai i tulaga aloaia ma tulaga e puipui ai le mamalu o le tatou Palemene, ae i ai lava le gagana, e le iloa e le tagata lona sese, e i ai lava le taimi e lape ai. A saosasoa le manatu ma lagona, ona aveia lea ma mea e sese ai le alumaga o feau ma galuega.

Ae aveia ia lenei avanoa i le tapuaiga a lo matou nuu foi ma lo matou itumalo e ao foi ona avatu se agaga faamaualalo i lena talaga i le paia o lau Afioga i le Taitai o le Maota, lau Afioga i le Fofoga Fetalai ma le paia o le Kapeneta ma lena Itu, ia, e faamalulu atu, afai foi ua sala uta, ia tonu tai. O le tatou galuega e faavae i le Atua. O le Maota lenei, e ese le manaia o ona upu e agiga i luma, i a outou saunoaga ma finagalo faaalia o le tatou galuega. Ae o le loto faamagalalo lava ia e ese le faigata. Ina ua fai e Iakopo le mea tele lava i lona uso o Esau, fao le tofi, fao le manuia ona sola lea i Patanarama i nuu ese e nofo ai, tele tausaga, na tulai lava Esau i Kanana alu i ai, alu i ai e aumai lona uso. Fai mai le upu a Iakopo i le alu atu a lona uso, se e pei ua ou vaai atu, a ou vaai atu i ou foliga, pei ua ou vaai atu i fofoga o le Atua, ioe. Aisea? O le loto faamagalalo. O mea tetele na folafola na te maua, ioe, lea ua leai se mea. Ae na tuanai lava ma tiai na lagona ae alu e aumai, aumai lona uso e fai le aiga, nonofo.

Lau Afioga i le Fofoga Fetalai, e le tele sau tala, ae na o le faaleo o le agaga faamaualalo aua nei sui usufono o le Palemene i lenei Itu. Afai foi o le a la outou faitau i tausaga ma taimi ua tuanai i galuega foi, e leai. A fai lava ua sese, ua sese, ae tatou fefaamagaloi, tatou maua le agaga o le Atua, ioe. Tatou alo i luma le tatou sa. Lau Afioga i le Tamaitai Palemia lau Afioga i le Taitai o le Maota, lau Afioga i le Tamaitai Palemia muamua o le tatou atunuu, e tele nei luitau ua feagai ma lau Afioga, ioe. Ae manatu o lau Afioga o le tagata o le Alii, o le tagata o le Atua. O lau Afioga o le pae ma le auli, ia sao ma uli le tatou folauga, aua lou tulai mai, aua lou taimi, o le tatou atunuu la e tapuai mai, tatalo i le afaigaluega aua le tatou galuega. Le paia o le Kapeneta, ia fale i le fale o le Atua la outou tofa, ioe. O ai ia mo le lumanai, o ai ia o le tatou Palemene aua lenei vaitau o lukaluka ma afatia le tatou folauga, o tulaga e aliali mai.

Ia, o se matou tala lea lau Afioga i le Fofoga Fetalai, o se matou tala lea. E le faaloaloavale so matou leo, ae tau ia ina ia alofagia le tatou faigamalaga, alofagia e le Atua le tatou galuega, ina ia agalelei mai ma aumai Lona filemu mo i tatou tatou te galulue ma faatino ai le tatou auaunaga aua le tapuaiga a si o tatou atunuu, aua le lumanai ma sona manuia.

Faafetai i lau Afioga i le Fofoga Fetalai, manuia ou faiva, manuia foi lena talaga i lau Afioga i le Tamaitai Palemia ma le Sui Palemia ma le paia o le Kapeneta, ia, le paia o lena itu o le tatou Maota, e faapea foi lenei Itu i le Sui Taitaifono ma sui usufono mamalu o le tatou Maota. Faafetai, ia manuia le Fono.

FOFOGA FETALAI: Ua faamalo saunoa i lau Afioga i le sui usufono mamalu lau Afioga Aiono mai Aana Alofi Nu.2, malo le tofa, faafetai foi mo le saunoaga, o lea ua opea i le Maota, aua lava le tauavameaina o le tatou mataupu, aua se taunuuga lelei ma le toamalie ia maua ai pea le tatou fealofani. Malo le tofa.

Ia o lea ua matau atu o lea foi ua fou mai le sa o Safata 1 lau Afioga i le sui usufono mamalu.

Afioga LEANA RONNIE POSINI (Safata 1): Lau Afioga i le Fofoga Fetalai aemaise foi le mamalu o lenei Maota, i le paia o le Palemia, le Kapeneta ma Minisita Lagolago aemaise foi o lenei Itu. Ia, ae ou te talitonu e tau faaali foi se manatu o lenei itumalo i le Lipoti ua taatia i lumamea nei.

Lau Afioga i le Fofoga Fetalai, i totonu o le Palemene lenei ma lona Faavae, ou te toe tau tomanatu i taimi ua sola, e faia tatou faaiuga, e tolu lava mea e fua i ai faaiuga a le tatou Palemene, o tatou o matai, e fua i le tatou tu ma le aganuu.

Lua, e faavae foi tatou, e faavae foi a tatou faaiuga o tatou o le Malo Kerisiano.

Lona tolu, e fua foi a tatou faaiuga i lalo o le Tulafono. A o lau matau i le Paeaiga lenei lau Afioga i le Fofoga Fetalai mai le amataga o le Paeaiga lenei, o lau lea matau, ua leai se aganuu, ua leai se faakerisiano, a ua tatou o lava e tulituliloa le Tulafono. O le mea lena o lea ou te matau i totonu o le Paeaiga lenei ma le Palemene lenei, leai se aganuu, leai se kerisiano, ae na o le Tulafono lava lea ua agai i ai le tatou Palemene.

Aua o le mea moni lava lau Afioga i le Fofoga Fetalai, o le tele ia o tagata e faaali mai o latou manatu, ua le fia faalogologo lava i Fono a le tatou Palemene, tatou te fetolaulauai, a tatou saunoa nei i le Suafa o le Alii ma tautau le alii, a o mea e tino mai, ua matua mamao lava le mea lea e tino mai ma le tatou tautau o le faakerisiano ma le aganuu. O le ala lea e taufai ai sou manatu lau Afioga i le Fofoga Fetalai, o le a ou agai pea i le Tulafono lea ua... leaga o lau matau, ua leai se tatou aganuu, leai se faakerisiano i totonu o le Palemene lenei.

Lau Afioga i le Fofoga Fetalai, ona ou oo mai lea i le faaiuga o le Faamasinoga lea na fai i le mataupu lenei. Lau Afioga i le Fofoga Fetalai, e matua manino lava le faaiuga a le Faamasinoga lea na aumai, e leai se faasalaga, e leai se faasalaga. Ae a fua foi i mea na tutupu, lea foi na taua e le isi sui usufono po o le Afioga i le Minisita, na tuli i fafo e le Fofoga Fetalai, tuli ese ma le Fono. O fea na sulu i ai? Na agai i le Faamasinoga. O le a le tali a le Faamasinoga? Toe foi i ai. Toe foi i le Palemene. O lea la ua manino le faaiuga a le Faamasinoga, e leai se sala, a o lea foi ua toe aaitui le Palemene i se faaiuga ua faia e le Palemene lenei, a o lea ua uma, o lea ua silafia e lau Afioga i le Fofoga Fetalai, e oo lava i le Faavae o le tatou atunuu lea na fai i ai le faaiuga a le Faamasinoga. E leai se isi e toe toloa ma toe aaitui atu i le Faamasinoga. A o lau faitau i le mea lea ua faatino nei, e pei foi ua...

FOFOGA FETALAI: Ia e lelei lou fesoasoani atu i le sui usufono mamalu, ona o lea e pei ua agai lau saunoaga agai i tulaga pei ua taua ai foi le Faamasinoga. Ia tatou faaeteete foi i le tulaga lea i le taua o le Faamasinoga. Masalo o lea e manino lava le saunoaga a le Taitaifono ma le Lipoti, e le feaiaai mea ia e lua, e ese lava le Faamasinoga ia Solitulafono ma Faamasinoga e pei ona i ai le Faamasinoga lea, e ese foi le vaavaai a le Palemene latou ia, o lo outou mamalu, e i ai la le mataupu lenei, o lea ua fitoitonu lava iinei i le Palemene lenei mataupu. O le ala lea e lelei foi le vave piiama atu a o saunoa le sui usufono mamalu, o lea ua manino, e tele foi saunoaga a lena Itu o lea e manino mai a latou saunoaga i le tulaga lea.

E pei o le mea lea ou te fesoasoani atu ai i le sui usufono mamalu leaga o lea e faafogafoga le mamalu o le atunuu, aemaise foi le faafogafoga mai a le Faamasinoga. Tuuaia, o la e malamalama le Faamasinoga, a o le faafogafoga mai a le atunuu ne i te i ua faaseseina ai le latou faafogafoga mai. A o le agaga lava ia, o le Palemene lava ia ma ana fuafuaga, o le Komiti foi lea na

faatino nei, o le Komiti lava ia a le Palemene ia, e le o aiaina lava le Faamasinoga. Ia, mo le silafia e le sui usufono mamalu. O le fesoasoani atu lea mo lau saunoaga.

Se i tulai mai lau Afioga i le Minisita o Faatoaga.

Susuga Hon Laauli Leuatea Polataivao Fosi: Lau Afioga i le Fofoga Fetalai, e leai se agaga e faalavelavea le saunoaga a le sui usufono, ae leaga na ona ou faatepa leaga o lea e mau tatou faamaumauga. O lau tuualalo i le sui usufono, leaga o lea pei o le a e sai mai iinei ua leai se tofa a le Maota ona o le itu lenei. O lau tuualalo, mafaufau lelei, mafaufau po o ai na mafua ai mea nei. O le a le mea lea tatou te talanoa ai nei? O ai le mafuaaga e ala ai upu lea tatou te talanoa ai i le taeao lenei? Na i ai se faakerisiano po o se avafatafata ina ua ou saofai mai o ae fai le faaiuga e faasatauro au? Na outou manatu i mea na? O le mea lea, faeteete. Afai o tu ma aga ia o lenei e tupu ai le taeao lenei, fai le tuualalo. A lea e fai atu le Taitaifono, fua se tapu, fai le tuualalo i ina i le tou Taitai, leaga o i ina lea e mafua ai mea ia. Na matou fai atu ea o le a? A o le tou saunoa mai lea faapea ua leai se tofa, ua leai se faakerisiano ua leai se aganuu, o ai na mafua ai? O a tatou upu i le Nofoaiga lea na sau nei? Le gagana, le gagana sa apaapa atu ai. E ese le le milia faauu o upu, ese le le mafaufau i le Maota.

O le mea lenei, fuafua mai o lea e matau atu lava, leaga o lea o le a tau le pua ma lafo mai. A lea ua saunoa, o lea ua ou fai atu faalua, o lea ua saunoa le Taitaifono, o le gualofa ia e silafia e le Atua, a o lea lava tou te agai mai e tau mai lava le pua ma lafo mai. A lea matou te fai atu, e le malaese i ina, malaese iinei. O le tuualalo lenei. A o le nofoa lenei e te saofai ai, na saofai ai le sui usufono na tulai e faasatauro au. O le a le mea na oo i ai? O le agaga lenei, e fautua atu.

FOFOGA FETALAI: Ia, ou te iloa o lea ua saunoa le Afioga i le Minisita. O le tatou felogonai...

Afioga LEAANA RONNIE POSINI: Lau Afioga i le Fofoga Fetalai...

FOFOGA FETALAI: Onosai mai se i fai le tala a le Nofoa. Ia soa foi le mea o le tofa faa-toeaina ma le tofamamao ma tatou manatu faaali. E pei ona saunoa lea Itu, se o lea e tausaili le gualofa aua lenei mataupu. E pei o le ala lenei o lea ou te manatu foi le sui usufono mamalu, o lea ua e taua ma ua e faapea ua le amanaia le faakerisiano ma le aganuu. Ia o fea ea o tatou saili ai o lea lava tatou te saili i le kerisiano ma le aganuu. Ae manatu, manaia le saunoaga a le sui usufono matua mai Aana Alofi 2, faapea o le a lua sosoo o le a manaia. Ia ou te le tau fai atu na tulaga, o le alofa molipo aua le tatou mataupu ma...

Se i tulai mai lau Afioga i le Minisita o Galuega se i fesoasoani mai.

Tofa Hon Olo Fiti Afoa Vaai: Lau Afioga i le Fofoga Fetalai e manaia lava le faalogologo foi i le tulaga ua oo i ai le saunoaga a le Afioga i le sui usufono. A o le fesili la ou te fia malamalama ai, o le a le tulaga ua i ai lona finagalo, a faapea o le a fai le tatou faakerisiano, o le a tuu Tulafono? Tulafono Tumau a le Maota, Tulafono Faatemokarasi, Tulafono Faavae o lo o limataitaiina ai le Palemene ma Tulafono uma a le atunuu? Pe o le a fai foi la le faaleaganuu ae taatia Tulafono nei? A o Tulafono ia o lea e solia e sui usufono ia e mafua ai ona i ai le aso.

Ia e pei o lou tulai atu lena ma le faaaloalo lau Afioga.

Tofa Lealailepule Rimoni Aiafi (Faleata 3): Lau Afioga i le Fofoga Fetalai...

Afioga Hon Valasi Luapitofanua Toogamaga Tafito Selesele: Lau Afioga i le Fofoga Fetalai mo le faasaoina o le taimi...

FOFOGA FETALAI: Ia se i tulai mai le Taitaifono e fesoasoani mai foi i le tatou mataupu.

Afioga Hon Valasi Luapitofanua Toogamaga Tafito Selesele: Leaga o le Komiti e ona le pepa. Na pau o le mea e faamanatu atu i le sui usufono, o le tatou Tulafono na fau nei lava, a o le Tulafono a le Atua na aumai e taitai ai le lalolagi, ae na fesui ai e tagata, a. O lea la ou te fautua atu, e oo lava i le Atua na fau ana Tulafono ia savali ai le tagata i le amiotonu. E le mafai ona tatou faatalaloa faapea pe a leai ni Tulafono. E leai foi se isi i luga o le Tulafono, po o le tupu po o le a lava. E le faapea la o le a avea le tou faapea mai o le tou Taitai ona fefe ai lea o le Tulafono. E leai, e aoga tele le mea lenei e aoina ai lou sui usufono ia savali i le lelei. Ia, o le agaga lea. E oo lava i le Atua na fau ana Tulafono.

Tofa Lealailepule Rimoni Aiafi: Lau Afioga i le Fofoga Fetalai...

FOFOGA FETALAI: Ia, o se faauilavea i le sui usufono o lo o saunoa po o se....

Tofa Lealailepule Rimoni Aiafi: Leai, leaga lau Afioga, o lea lava e nofonofa ma taputapu saunoaga a sui usufono mamalu, leaga o lea e saunoa le Afioga i le Minisita i Tulafono ma mea na ma faia i totonu o le Palemene lenei. Lau Afioga, leai o le mea e fia faamanino, e le i faia e maua ni mea i totonu o le Palemene lenei, leaga o lea e tau mai pea o ma uiga na fai i le Palemene lenei. O mea na fai i fafo i le Faamasinoga, e leai se mea na ma lafoa i le Palemene lenei. Leai na ona fesoasoani atu i lau Afioga, ae...

FOFOGA FETALAI: Ia, o lea ua maua atu lou finagalo, atonu e i ai se taimi ona maua foi lea o lou avanoa e te saunoa ai.

Se i tulai mai lau Afioga i le Taitaifono.

Afioga Hon Valasi Luapitofanua Toogamaga Tafito Selesele: Lau Afioga i le Fofoga Fetalai, ia leaga o lea lava e aumai e le sui usufono mamalu. Ou te faatepa lava le sui usufono mamalu, aua o lea e oo lava i lana molimau na fai i luma o le Komiti, fai mai e le o se Faamasinoga, na o se iloiloga. O lea lava sa finau. Ae a le tala a le latou Loia na fai i luma o le matou Komiti? O ai na fai mai e leai se Faamasinoga? O lea ua na pepeloa ma olegia le Komiti. E tasi lena mea matautia, o lea e fai atu sao ae pepelo lava, se i tulou.

Lona lua, o mea ia na molia ai i le Tulafono i le Faamasinoga, o mea patino ia lea e tauvalea ai le Palemene, lea e afaina ai le Palemene. Ua uma la le Faamasinoga, e le aumaia foi ni faaiuga na fai e le Faamasinoga e fau ai faaiuga a le Palemene. O ana lafoga ma ana saunoaga ma faaleaga i le Palemia lea ua i ai nei ma le Malo, o la e maumau uma lava i mea sa avatu e iloilo ai le... Afai la o lea lau Afioga, taumafai ia le sui usufono ana faapea e salamo, ia ou te iloa e... a o lea lava e aumai le agaga o le faatautee i le mea lea, i lou talitonuga, ia afai e i ai se aso, ia tailo i ai. A o le alofa lea na avatu ai. Leaga o lea e silafia e sui usufono sa faatu mai le tai 30 masina, 24 masina, ae sa nanau lava e i ai se taimi, leaga e tatau lava ona fai se sala, e le tatau ona tuuaunoaina faapenei. E le faapea ua iloga i le Palemene ua umi lona taimi ona fefe ai lea o le Tulafono. Ia fai se aoaiga ma ia sololelei ai tatou faigaupu i totonu o le... leaga o le mea lava lea o lea e tupu, o le a avea ai ma le le mafaufau i le Maota, se i tulou.

Tofa Hon Olo Fiti Afoa Vaai: Lau Afioga i le Fofoga Fetalai o le mea e fia faasao.

FOFOGA FETALAI: E i ai se isi mataupu lau Afioga i le Minisita o Galuega?

Tofa Hon Olo Fiti Afoa Vaai: Ia, ona o lea ua laga mai e ese le Faamasinoga ese iinei. O le upu moni lau Afioga i le Fofoga Fetalai, o galuega faa-Faamasinoga, e taiala i Tulafono e fai atu e le Palemene, ae manino lava le tulaga o le Tautoga o le Loto Faamaoni, ia faaaloalo i Tulafono a le Palemene.

O lou toe tulai atu lea e faasao le sui usufono.

Tofa Lealailepule Rimoni Aiafi: Lau Afioga, leaga o lea ua mamafa le saunoaga a le Taitaifono fai mai ua ou pepelo i le Komiti. O le tala a le matou Loia, o le civil case, e leai se Faamasinoga na o e fai ni molimau, o le latou

lava lena faaiuga na fai i affidavit na avatu, o le tala foi a si matou... e leai se Faamasinoga, leaga o le civil case e le o se criminal case.

FOFOGA FETALAI: Ia, e manatu le sui usufono mamalu...

Tofa Lealailepule Rimoni Aiafi: Lau Afioga, ou te le fefe, ou te tautino atu i lau Afioga, ou te le fefe i le mea moni... le mea sao.

FOFOGA FETALAI: Le sui usufono mamalu, alaala mai lalo...

Afioga Hon Valasi Luapitofanua Toogamaga Tafito Selesele: Lau Afioga i le Fofoga Fetalai, se i avatu lava lau tala lea...

FOFOGA FETALAI: Ou te manatu lau Afioga i le Minisita, o lea ua manino lou finagalo faaalua...

Afioga Hon Valasi Luapitofanua Toogamaga Tafito Selesele: O lea e molimau le Komiti e toa-9 le Komiti, o ana saunoaga lava ia o lea e ave pea ave pea, e le o se Faamasinoga. A lea ua manino i le tautinoga a le latou Loia, o ai na fai mai e le o se Faamasinoga? O upu ia, afai e manaomia ou te aumaia le minute o le matou fono ma molimau. O lea ou te fai atu ai, o le matua pepelo lava o mea ia, pepelo i le Komiti, o le pepelo foi lena i le Palemene.

FOFOGA FETALAI: Malie lau Afioga i le Minisita. Malie le Afioga i le sui usufono mamalu. E faamalulu atu i lau Afioga i le Minisita. Le sui usufono mamalu, e i ai le manatu lau Afioga i le sui usufono mamalu, alaala mai i lalo se i fai atu le tala a le Nofoa e filemu ai le tatou galuega. Ou te talitonu foi o lea ua fesopoai faamatalaga, a o le tulaga o lea e faatali le sui usufono mamalu lea e sausaunoa. O le mea lea ou te faamalulu atu i lau Afioga i le sui usufono mamalu faapea foi lau Afioga i le Minisita, se i faaaauu pea le saunoaga a le sui usufono lea, ona tatou taunuu... e i ai lava le taimi o lau Afioga i le sui usufono mamalu ia ona faamalamalama lea o ia tulaga uma.

Tulai mai le sui usufono mamalu, faauma mai lau saunoaga.

Afioga LEANA RONNIE POSINI: Lau Afioga i le Fofoga Fetalai, ia e tele lava le ava atu i lau Afioga, ae pei o lea e tau matau ua matua ese lava le mea ua agai i ai saunoaga a Minisita ia e tutulai mai, ua toe laga i tua le mataupu i tua, o la e ua taua lona taimi i le Paeaiga lea talu ai. Ia o lena lava e te silafia lea na te i lava e tulai e faamavae a o lea e le i faia le fautuaga a le tatou Palemene i lea Paeaiga. O lena foi e manino mea i lau Afioga, ia a o lena ua e toe lagalaga mai lena mataupu o lea e tau agai sau tala i le...

Susuga Hon Laauli Leuatea Polataivao Fosi: Lau Afioga i le Fofoga Fetalai o se mea e fia faamalamalama.

FOFOGA FETALAI: Se i tulai mai lava lau Afioga i le Minisita mo se saunoaga.

Susuga Hon Laauli Leuatea Polataivao Fosi: Na ou le manao ta te oo i le itu lea, leaga tatou te oo ai i nisi tulaga. Na ala ona ou faamavae, ua leai se isi alofaga i le mea na outou fafau. Na ala ona ou faamavae, ua ou iloa ua fafau le mea e faauma ai lou avanoa faa-sui usufono o le Palemene. O le mea lene na ala ai ona ou tulai, o le tautinoga lene o le amiotonu. Ou te le faia i le faaiuga, e fai e lou itumalo lou faaiuga. O le ala lene o lea ou te apaapa atu lava, a i ai ni outou alofa i le mea lea e tau fuafua atu, o lea ua saunoa atu ai le Taitaifono, tuutumamao le tofa, o lea ou te apaapa atu lava. A o mea na e te tau saunoa mai ai, ia, e silafia e le Atua le mau mea eseese na ala ai ona tulai ese le Sao Faapito, tulai ese Leatinuu ma ou alu ese. Aisea? O mea na tou te le o malamalama i totonu o le tatou Vaega na tatou i ai, ia lea na apaapa atu, i na malamalama ia. O le fautuaga lene i le sui usufono mamalu.

Tofa Hon Lauofo Fonotoe Nuafesili Pierre Lauofo: Lau Afioga i le Fofoga Fetalai, leai leaga e i ai le lafoga faamolemole...

FOFOGA FETALAI: Ia, e manatu le... Lau Afioga i le Sui Taitai ua uma lou taimi.

Tofa Hon Lauofo Fonotoe Nuafesili Pierre Lauofo: Ioe, leaga e fai si mamafa o le upu lea na lafo e le Afioga i le Minisita.

FOFOGA FETALAI: Ia se i saunoa faapuupuu mai lau saunoaga.

Tofa Hon Lauofo Fonotoe Nuafesili Pierre Lauofo: Fai mai o mea na fafau, a o lea e silafia e leai ni faamaoniga o ni mea na fafau na aumai luma o le Maota. Ia, e fai si mamafa aua leaga o lea foi e lafo mai ae tuuaia ai lenei Itu ia po o le Vaega foi sa i ai.

O le mea lea o lea ou te tulai atu ai e faasao lea vaega e leai ni mea na fafau.

FOFOGA FETALAI: Ia, malo. Ia faafetai o lea ua maua atu lou finagalo. Ia, tatou maua ia i le agaga o le fefaamagaloai i lenei mea.

Afioga Hon Loau Solamalemalo Keneti Sio: Ioe lau Afioga i le Fofoga Fetalai...

FOFOGA FETALAI: Se i tulai mai lau Afioga Loau.

Afioga Hon Loau Solamalemalo Keneti Sio: Faafetai. Ioe, o le agaga foi lena e pei ona saunoa atu le Sui Taitai o lenei Vaega, ona o la e aumai le saunoaga a le Afioga i le Minisita i lona nauna lautele, mea na outou fafau, a o lenei e le o malamalama foi i ai matou nei, po o le a tonu le mea la e... Ne i te i ua e fesiligia lau Afioga. Ae lelei ona saunoa sao, ia ma tuu le avanoa i le Afioga i le sui usufono e fai ai lana saunoaga faamolemole.

FOFOGA FETALAI: Se i tulai mai lau Afioga i le Minisita.

Susuga Hon Laauli Leuatea Polataivao Fosi: Lau Afioga i le Fofoga Fetalai, ou te asuasua atu vaimalu i puega ina ne i tetele tafega ona selefutia lea o Vaisigano. Malilie sui usufono, o lea e faasaga tonu lava lau tala i le tasi lea sui usufono sa i ai foi i faufauga ia na ou fai atu ai, e oo foi i le Sui Taitai o le Itu Agai, sa i ai foi ma ia. O le upu sao lena, e le toe alo lava se upu.

Tofa Hon Lauofo Fonotoe Nuafesili Pierre Lauofo: Lau Afioga i le Fofoga Fetalai, e fai si matuia o ia tuuaiga faapea.

Susuga Hon Laauli Leuatea Polataivao Fosi: O le mea lena e faamalulu atu i sui usufono mamalu uma o le Maota, e mama outou, e mama outou...

Tofa Hon Lauofo Fonotoe Nuafesili Pierre Lauofo: Ia aumai la se faamaoniga o ia faufauga ua saunoa i ai le sui usufono.

Susuga Hon Laauli Leuatea Polataivao Fosi: E le tau avatua ni faamaumauga lau Afioga.

Tofa Hon Lauofo Fonotoe Nuafesili Pierre Lauofo: O au sa tofi e le Palemene ou te saofai i totonu o le Komiti lea, na mafua ai ona ou alu i totonu o le Komiti ae leai ni mea na faufau. A o lea ou te molimau atu, ia tailo i ai i nisi sui usufono sa i ai i totonu a o au lava ia e leai se mea na faufau lau Afioga. O le mea e fia faasao.

Susuga Hon Laauli Leuatea Polataivao Fosi: Ua foi sou manatu, o le a faamaui lea mataupu na ona ou oo lava i ai o le taumafai e apaapa atu. O la e silafia e le Atua le mea na fai ia te au ma le mataupu na fai, o faatonuga uma na fai atu ia outou e faasatauro au.

FOFOGA FETALAI: Faafetai. Malo lava le onosai.

Tofa Hon Lauofo Fonotoe Nuafesili Pierre Lauofo: Afai o le tulaga lea, saunoa mai la suafa o i latou na fai faufauga ia, aua o lea ou te tautino atu, o au sa i le Komiti, e leai ni mea faapena sa ou faia e au ia.

FOFOGA FETALAI: Ia, malie ia lau Afioga i le Sui Taitai, o lena ua e tautino mai, o le a la se isi mea i tala atu o lau tautinoga lena ua tautino mai? Malie ia, o lena ua...

Tofa Hon Lauofo Fonotoe Nuafesili Pierre Lauofo: E le o i i isi sui usufono mamalu nai le Komiti.

FOFOGA FETALAI: Ia tulai mai lau Afioga i le sui usufono mamalu, se faauma maia lau saunoaga ua umi ai le tatou Fono se.

Afioga LEAANA RONNIE POSINI: Lau Afioga i le Fofoga Fetalai, se o le lagalaga fua e le Minisita o mea ua tuanai, a o le mataupu lea e talanoa le tatou Lipoti lea e aumai, ae leaga ua e taua lou igoa na ou faufau. Se i suesue ifo i faamaumauga pe na ou lauga i le aso lea? Se o le mea lena, aua e te... ua malosi le mea o le pepelo lea e fai, ou te le i lauga ou te le i faufau foi. E tatau lau Afioga i le Fofoga Fetalai leaga e tiga tuuaiga ia. Faapea na ou lauga atu i le aso na fai ai le mea lea? O tou lafoga pepelo ia lea e fai soo.

Tofa Hon Olo Fiti Afoa Vaai: Lau Afioga i le Fofoga Fetalai, ua leva ona uma le 10 minute o le sui usufono.

FOFOGA FETALAI: Ia, e i ai le manatu o lea ua...

Susuga Hon Laauli Leuatea Polataivao Fosi: Lau Afioga faafoi mai sau upu pe afai e tetena le finagalo, e te le o popole, ae e te le tautala sao. Sui la le upu.

FOFOGA FETALAI: Faafetai.

Afioga LEAANA RONNIE POSINI: Lau Afioga, se aveese ia saunoaga faapea, a o lea mea o le le tautala sao. Afai o lea foi te pepelo mai, o lea ou te fai atu leaga o lea e te lagalaga mai mea ia, a o le Lipoti lea e talanoa i ai.

FOFOGA FETALAI: E faamalulu atu i le sui usufono. Ia, o lea ua maua atu le agaga o le sui usufono...

Afioga LEAANA RONNIE POSINI: Se taatia ia le pepelo soo.

FOFOGA FETALAI: E i ai le manatu, ia o lea foi ua faauma mai e le Minisita, ia, se o tatou e maua i le fefaamagaloi, e faapena ona tausii le tatou Palemene i le mamalu. O le mea lea, ia faauma maia lau saunoaga.

Afioga LEANA RONNIE POSINI: Ia, lau Afioga i le Fofoga Fetalai, e avatu foi malu i puega i lau Afioga i matou tala, ua matua sese lava le mea lea ua agai i ai ona o le lagalaga mai. O le ala lea o le faamalulu atu i lau Afioga.

FOFOGA FETALAI: Ua ta maluluina lava.

Afioga LEANA RONNIE POSINI: Ia, faafetai tele. Ma e oo lava se tala i le faaleleiga lea na fai. Uma le faaleleiga lea na fai, tusitusia ou faitau foi i le faaleleiga, o ta faapea lava lea o ita, e le toe i ai se isi mea e tupu faapea. A o lea ua toe lagalaga mai, a o lea ua matau atu e le o afio mai le Sui Palemia, a o ia lea e laga le mataupu. Talosia ia ia toe malosi mai, leaga o lea ua ou faapea ua faagasegase le Afioga i le Sui Palemia na amata ai nei mea.

Lau Afioga i le Fofoga Fetalai...

Afioga Hon Valasi Luapitofanua Toogamaga Tafito Selesele: Lau Afioga i le Fofoga Fetalai, leaga o lea ua taua le mea...

FOFOGA FETALAI: Ia saunoa mai lau Afioga i le Minisita.

Afioga Hon Valasi Luapitofanua Toogamaga Tafito Selesele: O lea e manino lava le faamaninoga o le tatou Lipoti, harmony agreement. O le feagaiga lea e lagalaga e le sui usufono, e le i oo mai lona malosi i le Palemene. A le aoga... sa aoga le harmony agreement. La e i totonu o le faaiuga, ana leai le harmony agreement, e falepuipui Tuilaepa ma Leala. La e i totonu. O le ala lea o lou fai atu, e ese lava le feagaiga sa fai ona o le Faamasinoga, i le avega i tua o tagi, ese le... e le o oo mai la le malosi o le mea lena i i le Palemene. Ma e le feagai le Palemene ma se feagaiga a ni Vaega Faaupufai. O le agaga lena, ae aua le toe tautaua aua o le mea lena. A na leai le harmony agreement, faapenei o la e i Tanumalala Lealailepule ma... O la e sipela mai e le faaiuga.

Tofa Lealailepule Rimoni Aiafi: Lau Afioga i le Fofoga Fetalai, ae le o oe lena e tataua ona e falepuipui.

FOFOGA FETALAI: Lau Afioga i le Fofoga Fetalai, pei ua le mafaufau le Minisita, a. Ua tele le faaletonu o... O lea ua saunoa mai na o matou ae faapefea latou pe ana taunuu latou cases ia na fai?

Susuga Hon Laauli Leuatea Polataivao Fosi: Lau Afioga i le Fofoga Fetalai, e tautala lava ma le faaaloalo, ua fai lava si le mafaufau o le sui usufono lea. Ua fai lava si le mafaufau, tuutumamao le tofa, o lea e taufai atu le aso. Fuafua mai o lea e fuafua atu.

Lau Afioga i le Fofoga Fetalai, ou te faatuina atu le lafo, *Ia talia loa le Lipoti.*

E le i tuuina atu se fesili i le lafo.

FOFOGA FETALAI: Ia, se i tulai mai lau Afioga i le Palemia.

Afioga Hon Fiamē Naomi Mataafa: Lau Afioga i le Fofoga Fetalai, atonu ua matauina e le Maota le tatou Paeaiga lenēi, e faatauina e le Faigamalo le manino o le faasoa, tatala mai o le faitofa a sui usufono mamalu o le Palemene. O se tasi lenēi o mataupu taua e pei ona ou fai atu foi le tala i le taimi ua muamua. E faamalulu atu i Afioga i Minisita o le Kapeneta, aua le avea foi le siisii o tatou mataupu e taomia ai le taua o le mataupu lenēi. Pe feeseeseai so outou finagalo ma se taofi o lenēi Itu, ia, pe o sui taitoatasi, mo au lava ia lau Afioga i le Fofoga Fetalai, a i ai se aoga o le fautuaga a le Komiti, ia tuu mai pea i luma o le Palemene lenēi le mataupu lea. O le mea lena e taua ai ia te au se i i ai se aso, ona e le uma nei, e le uma taeao, e le uma i le vaiaso lea, ae tuu mai pea i luma o tatou, tatou te vaavaai i ai po o le a le moni o le mea lea, le taua o le taualoa ma le tausi o le mamalu o le Palemene.

Ia, lau Afioga, e i ai foi o le natura lea o lo outou itupa, e siisii loa, ona vave lea o le ita, ae taofiofi mai le faitofa. E le o le felautoai le mea lea e manaomia, a ia manino le fatu o le mataupu, o le tausiga o le mamalu o le Palemene. Lo tatou aiga Kapeneta, ia lava le onosai, lavapapale. O lea ua momoli mai le aso ma le taeao tatou te filifili ai i le mataupu lenēi, e ui e faasino i le toatasi po o le toalua, ae i ai le upu foi lea, “o au nei, a o oe taeao.” Lau Afioga i le Fofoga Fetalai, faaauau ia le tatou fono, se i faauma le lauga a Safata.

FOFOGA FETALAI: Ia malo faafetai, atonu o lea ua manino le saunoaga a le Taitai o le Malo, le afioga i le Tamaitai Palemia. O le agaga foi lena o le Nofoa, o lea lava e tuuavanoa atu i lo outou mamalu, ona e taua le mataupu e pei ona lumamea nei.

O le mea lea, faauma maia lau Afioga i le sui usufono mamalu mai Safata ua uma lou taimi.

Afioga LEAANA RONNIE POSINI: Lau Afioga i le Fofoga Fetalai, e momoli atu le agaga faafetai i le saunoaga a le Palemia. E leai e le taotaomia foi o matou manatu e ala i le Lipoti, ae tau matau atu, e pei ua tee le uluga i

le Kapeneta, ae faauma atu, e tele lava na i mea faale-tulafono lea ou te talanoa i ai. O le isi mea lea ou te taua lau Afioga, e tutupu mea nei, e le i aloaia le avea o le sui o Lepa ma Faleata e fai ma sui usufono. O le mea manino lava lene i le tulafono. A fai ua tatou o i le tulafono, e le i faipule ia Tuilaepa ma Leala, a o lea ua fai i ai le tatou faaiuga. E le i faipule e le i aloaia, a foi lea na tatou finau ai.

Afioga Hon Valasi Luapitofanua Toogamaga Tafito Selesele: Lau Afioga i le Fofoga Fetalai, e le tuua le mea lea.

FOFOGA FETALAI: E leaga o lea ua e taua le tulaga lea, e leaga e ogaoga foi le tuuaiga.

Afioga Hon Valasi Luapitofanua Toogamaga Tafito Selesele: O le fesili i le sui usufono o lo o saunoa, o anafea na amata ai ona pay Tuilaepa ma Lealailepule? O le warrant na ave e saina Le Ao o le Malo, ua avea o faipule, o lene. E ese le tauto aloaia, o le saofai i totonu o le Maota. Ae a silasila lelei i le mea lea na... tatou te o lava i le aso na faatauto ai. E leaga e i ai tulafono o mea ia, ae faamanino atu ma faamalie i le sui usufono, e leai o lo o manino lava, aemaise foi le Afioga i le sui usufono o Lepa ma le sui usufono o Faleata, na muamua lava declare e Le Ao o le Malo, aua e le i i ai ni latou palota. A silasila la i le taimi na tau ai o le sui usufono, o lene, aemaise foi o lene sa tauave i le taimi lene le caretaker a le Malo, o lene na te uua le power ma le tofi a Samoa. O le faamalamalamaga lene.

FOFOGA FETALAI: Ae manatu foi atonu o lea ua saunoa manino le Afioga i le Taitaifono. Ma ou te talitonu foi e tasi lene mea na aafia mai i le saunoaga a le sui Taitai. Ona o le itu lava lea e faapea o le aso o le faatautoga. E lelei foi le fesoasoani atu o le Nofoa, e lelei e malamalama ai. O le aso 24 o Me, o lea sa tolaulau uma ai outou suafa uma, i le aso na tuu e tataua ona tatala ai le tatou Palemene. A o lea na matou nonofo i le faleie ma tolaulau uma ai lava outou suafa, o outou o sui usufono o le Palemene. O i ina foi na folasia ai e le Nofoa tulaga la ia taualoa o le Palemene. E pei o le tulaga lene, e fesoasoani atu foi i le sui usufono mamalu, leaga o lea foi sa taua e le sui Taitai, ne i te i ua faanuminumi le itu lea, o lea foi e faafogafoga le atunuu, o le itu lene ua uma ona folasia e au nei i luma o le Palemene, i le aso 24 o Me, ia le tulaga lea tau aloaia o le Palemene.

Tulai mai le sui usufono e faauma mai lau saunoaga.

Afioga LEAANA RONNIE POSINI: Ua faafetai o lea ua...e pei o le lagona lea, leaga o lea ou te tulimatai le tatou faatautoga, aua na ona tolaulau, ae le i avea ma sui usufono i le faatautoga. O lea ua taua e le Taitaifono, o lea ua manino, manino lelei lava lau saunoaga. Ua ala ona toe faafoi i tua

ona o le sese o le mea lea na fai, ae o lea na matou finau e sao le mea lea na matou finau ai, lea na ala ai ona toe ave i tua le mea lea na saina mai e Le Ao o le Malo. Ae o le tulaga na i ai i le taimi lena, e le o matou ni sui usufono.

FOFOGA FETALAI: Ou te faamalie atu i le sui usufono, e le faafinauina lou taofi ma le faaiuga a le Nofoa ua avatu. O le mea lea, o lea ua ou faamalie atu ia te oe le sui usufono mamalu. O le faaiuga ma le tulaga lena ua oo i ai. O le tele ia o faamaumauga ia, a lau uma atu, ona alu ai lea o le tatou taimi. Ae malie ia, o lea ua avatu le faaiuga a le Nofoa, ma o le faaiuga lava lena e le mafai ona toe suia.

Tofa Hon Lauofo Fonotoe Nuafesili Pierre Lauofo: Lau Afioga i le Fofoga Fetalai, e leai na ona faapea atu o se tala, e le faia se faafinauga, e sao lelei lau Afioga. Ae afai o lena e sao le taimi lea na avea ai matou ma sui usufono, sa le tatau la ona taofia matou i fafo, i le aso lea na matou omai ai tatou te usufono faatasi, faatauto matou, ia silasila la i ai. O fea la o taoto ai le sao o nei mea. Ia e tau ina ou faapena atu.

FOFOGA FETALAI: O le measili lava, o lea ua malamalama foi le sui Taitai i le tulaga lea e i ai.

Afioga Hon Fiamē Naomi Mataafa: E sao lelei lava le sui Taitai, sa tatau ona omai i le aso 24 Me tatou te faatauto faatasi.

FOFOGA FETALAI: E talu ai o lea ua tatou taunuu i le taimi e manava ai le tatou galuega...

Afioga LEAANA RONNIE POSINI: Lau Afioga i le Fofoga Fetalai, o le a faauma atu loa, ne i te i foi ua foi mai taeao, ua ou toe faaauau ma toe amata. O lea o le a faauma atu lau Afioga.

FOFOGA FETALAI: Ua uma le taimi o le sui usufono mamalu. E le toe i ai se isi ou avanoa, ua uma lou taimi.

Afioga LEAANA RONNIE POSINI: Lau Afioga i le Fofoga Fetalai, e usitai tele i lau Afioga, ae ou te matua teena lava le Lipoti ma le fautuaga a le Komiti ua faataatia nei i le tatou Palemene, ma le agaga faaaloalo.

FOFOGA FETALAI: Ou te tapa lau Afioga i le Taitai o le Maota mo se lafo.

LAFO MO LE FAAAUAUINA O ITULA FONO

Afioga Hon FIAME NAOMI MATAAFA: Faafetai i lau Afioga i le Fofoga Fetalai, ou te tulai atu, e i ai se galuega taua ua faatulaga mo iloiloga a le Kapeneta mo le aso a taeao. Ou te tulai atu ai ma le faaaloalo e faatu le lafo, *Ina ia faataatiaese Tulafono Tumau 32(1), e avanoa ai le faaaauau o le tatou galuega o lo o tagofia nei i le aoauli nei pe a maea le tatou malologa puupuu, pe a ta le itula e 1:00 i le aoauli nei. O lona uiga lau Afioga, ina ia faaaauau le tatou mataupu i le maea ai o le malologa.*

Faaluaina e le Minisita mo Faatoaga ma Faigafaiva ma le Minisita mo Galuega, Felauaiga ma Atinae Eseese.

Na faamaonia le lafo.

FOFOGA FETALAI: O le a faataatiaese Taulumaga o le Fono Aoao Faitulafono mo lana malologa 15 minute, ona tatou toe faaaauau ai lea. Mo le silafia, ua tapena le tatou taumafataga tatou te talisua ai i lenei aoauli.

Na faataatia ese Taulumaga a le Fono Aoao Faitulafono mo lana malologa i le itula e 1:04 i le afiafi ma toe faaaauau ai i le itula e 1:45 i le afiafi.

FOFOGA FETALAI: Ou te faasilasila atu, ua toe amatalia nei Taulumaga o le Fono Aoao Faitulafono. I le toe talii mai ai mo le faaaauaina o le tatou galuega, e i ai le manatu ua maua se faasiligamalosi i le paia o lo tatou Maota. Ua maea paleauau foi le taliga o le sua, faamalo faafetai i le tatou Ofisa mo le tapenaga.

E faataatiaese a tatou Taulumaga ua maea saunoa le sui usufono mo Safata 1, o le avanoa lenei mo se isi sui usufono e fia saunoa.

Ua matau atu ua fou mai le sa o le sui mamalu mai Vaimauga 1, lau Afioga Sulamanaia.

Afioga SULAMANAIA FETAIAI TAUILIILI TUIVASA (Vaimauga 1): E masalo o lea ua fai se sao o lenei itumalo. E momoli le agaga faafetai i lau Afioga i le Fofoga Fetalai, o lea ua maea ona paleauau le taliga o le sua i le Maota nei, i lena tala na atoa i le Afioga i le Tamaitai Palemia ma le Kapeneta, Minisita Lagolago, e faapea foi i lenei Itu i le afio atu o le Afioga i le sui Taitai ma sui mamalu o le Palemene.

E muamua ona faatalofa atu i lenei itula, i le afio a lau Afioga i le Fofoga Fetalai. E matau lava ma le totoa ia fonotaga a le atunuu e le faigofie, le

tulaga ua i ai le tatou fonu. E momoli lava le agaga faafetai a lenei itumalo i lau Afioga i le Fofoga Fetalai, lavalavapapale ma le totoa aua le taitaiina o le Nofoa o le atunuu. Ia agalelei le Atua i lau Afioga, maua foi tala i le faagasegase foi i le sui Fofoga Fetalai, ia agalelei le Atua ia taulu, taulu faafoisia le malosi aua le valaauina ma le lagolagosua i lau Afioga i le Fofoga Fetalai.

E faatalofa foi lenei itumalo i lau Afioga i le Tamaitai Palemia, le Afioga i le Saofaapito, lau Afioga Fiamē Naomi Mataafa, faapea foi le afio o alii ma tamaitai Minisita, le Kapeneta ae tainane Minisita Lagolago. Ia liliu mai i lenei itu, e faatalofa foi ma ofo alofa atu i le sui Taitai aemaise o le afio o alii ma tamaitai sui usufono o le Palemene o Samoa.

E tulai lava lenei itumalo e fai se sao, ona o le taua o le Lipoti a le Komiti ua opea nei i Maota. E momoli ai le agaga faafetai a lenei itumalo i lau afioga i le Taitaifono, e faapea foi le sui Taitaifono ma sui mamalu o le Komiti na tofofi e le Palemene lenei o Samoa, latou te soalaupuleina lenei mataupu. O lenei ua aumai i le taeao lenei, faafetai foi ua ave i ai le faamuamua a le Palemene i le tulaga o lenei Lipoti, e momoli ai le agaga faafetai a lenei itumalo.

Ae vaai lava ma le totoa foi lenei itumalo, e faamalo o lea foi ua maua ua saini uma le Komiti. Ia faafetai i le autasi ma le tofa sa musumusuina ai outou.

Ae o le tulai o lenei sui usufono e avatu se motugaafa, a silasila lava i le faafoega mai o lenei mataupu, e le faigofie. O se mataupu sa fanau mai i se faaleleiga, ia po o se feiloaiga foi a le Taitai o lenei itu ma le afioga i le Tamaitai Palemia ma lena itu, ina ia faagalo mea ua tuanai, ae agai i luma Samoa, e ala ia i tatou ua avea o Taitai, lea na fanau ai lenei leleiga ma tuuina atu i le faamasinoga. A manatu la lenei itumalo i le mea ua toe lagalaga ai le Maota lenei, e lagona ai le faanoanoa, tulou lava le la itu o le Maota i le Palemia ma le Kapeneta. E lagona le faanoanoa o le sui usufono, i le sui Palemia, mafua i se a? o ia lea e ona le tagi lea, o ia e ona le tagi a le sui Palemia, e faatatau i le iuga lea na fai e le faamasinoga i le Taitai ma le Failautusi o lenei Itu. E lagona ai le faanoanoa e pei e le amanaia le feagaiga ma le maliega sa fanau mai i le Afioga i le Palemia ma le Taitai o lenei Itu. O le popolega lena i lenei itumalo.

Susuga Hon Laauli Leuatea Polataivao Fosi: Lau Afioga i le Fofoga Fetalai...

FOFOGA FETALAI: Se i tuu atu le avanoa i le faauilavea a le Afioga i le Minisita.

Susuga Hon Laauli Leuatea Polataivao Fosi: O le tausisia lava o le mamalu o tatou Tulafono Tumau, e le o alala atu le Afioga i le sui Palemia

e tali atu. E a pe a malie le sui usufono, e saunoa sao pea i nisi o tulaga, taofiofia ona e le mafai ona tali atu le e le o saofai i le faamoemoe. O le tatalo lena.

FOFOGA FETALAI: Lau Afioga i le sui usufono, e masalo o lea ua maua mai, ona o lea e le o saofai mai le sui Palemia.

Afioga SULAMANAIA FETAIAI TAUILILI TUIVASA: E malamalama lelei i ai le sui usufono. O lea ou te talanoa i le tagata e ona le faasea lea. E pei o le agaga lena o lea sa tau ai, e le o se faasea a le FAST pe o se faasea a le Palemia, o le faasea a le sui usufono lea. O lea e ala ai ona fanau le mea lea i le taeao lenei. Ae ui i lea o le a ou see ese.

O le tulaga ma le maualuga o le Palemene lenei o Samoa, e tumatila lava i le lalolagi, e mafua i se a? O le tofa mamao ma le faautaga loloto na tofofi ai i tatou e o tatou itumalo, tatou te omai e soalaupule ma fai tulafono i totonu o le Maota lenei. O le mea foi lena e lagona ai le agaga faafetai i le Lipoti a le Komiti. E ese le matau ma le vaai a lenei itumalo. O lea ua aumai le Lipoti a le Komiti e fua i le tofa ma le faautautaga a le Palemene lenei. E le o i ai se aulape e faapea e fia masina, e leai. O lea ua aumai se i tofotofo ai, o le a le tofa o le a le faautautaga o le Maota lenei, e fai i ai le faaiuga, o le fiafiaga lena o lenei sui usufono. O lenei la taeao, ma lau Afioga i le Fofoga Fetalai ma lena itu, e manatu lava le sui usufono, o mea ua tuanai sa le tatau lava ona tatou le toe vaai i ai. O lea foi ua fai lava le iuga o le faamasinoga. A tatou silasila foi i le iuga lea na fua mai i ai le iuga a le faamasinoga i le Taitai ma le Failautusi, o la e fai mai, o le faataua lava o le Taitai ma lenei sui, ua ala ai ona le oo i se isi ooooga. O lona uiga, ua maea. O lona uiga ua faataua e le faamasinoga le tautua foi a lenei tamalii, tulou, Tuilaepa. Ua faataua foi e le Faamasinoga, o i ina lea e fanau mai ai le iuga. Ae o le toe fofogaina e le Palemene lenei, o le fiafiaga la o le sui usufono lenei, o lea ua leai se faaiuga ae aumai e a? E tofotofo le tofa ma le faautautaga, faafetai i lau Afioga i le Taitaifono, aemaise foi o le sui Taitaifono ma sui uma o le Komiti. O le Palemene lenei, o lo o i ai le tofa ma le faautautaga na tofofi ai i tatou e si o tatou atunuu. E le toe oo lava se manatu o le sui usufono i le tulaga na fuafua mai ai, ae o le agaga ia maua le nofo fealofani. O le a le nofo fealofani? Ia faatunai mea ua tuanai ae alo i luma le sa. E leaga o lea e tapuaia o tatou faiva. O lea e tapuaia, o le Maota lenei, e i ai le taimi tatou te tuua ai. E i ai taimi tatou te le toe omai ai, ae afifio mai le itumalo ma e suia tatou, vaai i ni faaiuga na fai i le aso lenei.

O le faamatie la ma le tulaga ua i ai le Palemene, e momoli le agaga faafetai. Ae o le faaiuga foi ua aumai, o le tatalo lava a lenei itumalo, tatou faagalo mea ua tuanai. E pei lava ona ou vaai lou ia sui usufono i le Lipoti, o lea e aumai se i tofotofoina le tofa. A o le tatalo a Vaimauga, o le a se lape foi i lenei itu ma se auunaga ua le tau tamalii, ia e faatoese atu ma faamaualalo

atu, o la e tapuaia o tatou faiva e si o tatou atunuu. O le faaiuga e fai nei e manuia ai Samoa, aemaise foi se i silasila foi i lenei foi tama matua i lana tautua foi i si o tatou atunuu, i lana tautua lava lea. A o lea e vaai atu i lenei taeao, e pei o le agaga lena o lea e taumolimoli atu ai i le feagaiga na osia e le Afioga i le Tamaitai Palemia ma lenei itu, a ua uma lava ua uma i le faamasinoga. Ae o le toe aumai i totonu o le Palemene lenei, e augata lava le sui usufono o Vaimauga. O le a? Tau ma sui. Ae faafetai i le faaiuga a le Komiti, o lo o i ai le avanoa, lea la ua tatalo atu lenei itumalo, o lea lava ua tau a le ta, ua tau a le ta ua aumai le faaiuga, ia tatou lafoai i le Atua.

Lau afioga i le Taitaifono, faafetai i le sao o le tagata na tofofi. O le Komiti lea na tofofi, e le o se Komiti a le FAST po o se Komiti a le HRPP, o le Komiti a le Palemene, e i ai uma le faatuatuaga o le Palemene lenei ma le Maota lenei. O lenei la itula lau Afioga e i le Fofoga Fetalai, e le tele se sao o lenei itumalo, ae na ona matou faaoololomaau, tapuaia o tatou faiva e si o tatou atunuu. O la foi e faatali le Faamasinoga ia, pe tua ma ni a. A faapea ua maua le loto faamagalalo, o le agaga lena o le taeao lenei, na ona avatu i malu i puega, o le a se silasila, o le a se aga a lenei Itu, ia leai o le matou lava agaga tatou galulue faatasi. O lena ua ia te outou le tulai i le taitaiga o le tatou sa. E oo mai lava i le taeao lenei, e lagona fialia foi, faafetai o lea ua toe vaai atu sulu o le tino i le Afioga i le Minisita o Felauaiga, aemaise foi o le la itu i le Minisita Lagolago ia Manuleleua. O lea foi ua atoa atu, o lea ua afio mai Tapunuu, ia viia le Atua, pe sa outou o lava e tafafao, ae faafetai lava o lea ua outou taunuu i fanua. Ma ua toe atoa ai Nofoa o le Maota lenei, viia le Atua.

O le matou tatalo i lau Afioga i le Fofoga Fetalai, maua le toa, o aso faapenei e le faigofie. Ae amuia lau Afioga i le Palemia ma lena itu o lo o i ai se itu malosi, o lo o i ai se Itu Agai malosi. Ae o lenei taeao e tau matau atu ua le maua foi le toa e lena itu, se e avatu o matou manatu, avatu a matou tuualalo, pe lelei pe leaga o le malosi ma le ki ma le tatala lena ia te outou. A ia sae ifo lava lo tatou vaa, o la e i ai ma le Itu Agai i totonu, o la e i ai ma le sui usufono o Vaimauga. Aua e i ai le taimi tatou te le o ai, a o la e mau lava i faamaumauga, o i latou ia na faia le faaiuga, e tuli ai le Taitai ma le sui o Faleata. O le a le agaga, o le loto faamagalalo i le taeao lenei.

Lau Afioga i le Fofoga Fetalai, a paopapa se faamatalaga a le Vaimauga, foi mai, a o le agaga lena lau Afioga i le Tamaitai Palemia, ia faafetai ua e tulai mai, o lou ai lena, o oe o lou faalupega o le Afioga foi i le augafaapae o le Maota, e te faalauleleia mea ua faapena ona le manaia i totonu o le Maota lenei.

O le matou tala lena, ia manuia lau Afioga i le Fofoga Fetalai, toega o lenei aso i sui usufono, ia manuia i tatou ona o le suafa o Iesu.

FOFOGA FETALAI: Ua malo saunoa i le Afioga i le sui usufono mamalu o Vaimauga 1. O lea lava ua faaiu foi le saunoaga o le tatalo lava,

malo faafetai o le agaga lena o lenei aso. Ia tatou faamoemoe pea i le Atua e maua ai lo tatou fesoasoani.

O le sui lea, e i ai se mea...ua maea ona e saunoa.

Afioga Hon Tapunuu Niko Lee Hang: O lea lava lau Afioga, o se mea e fia faasao i le lauga a lou uso lea mai Vaimauga 1.

FOFOGA FETALAI: Ou te le o maua atu faamolemole.

Afioga Hon Tapunuu Niko Lee Hang: E fia faasao i le lauga lea na fai nei, leaga o la e pea mai lou itumalo.

FOFOGA FETALAI: Ia saunoa.

Afioga Hon Tapunuu Niko Lee Hang: O lena e te silafia sa ou sii mai, a o le saunoaga na ou alu e tafao, o la e faafofoga mai, ne i faapea e sao sa ou tafao. Sa ou sii mai o lena e te silafia, ma lou faaaloalo lava.

FOFOGA FETALAI: Ia faafetai,

Afioga SULAMANAIA FETAIAI TAUILILI TUIVASA: Lau Afioga i le Fofoga Fetalai e leai, e faamalulu atu i si ou sui usufono, a fai e matua le Vaimauga lea e tautala, ae faatatau lau tala i le aualii la e i o, afioga i Minisita la e i o, o Olo ma nisi. Ia manuia le Fono.

FOFOGA FETALAI: Malo, e talitonu lava o mea o suaga lava a toeaiaina e faapena. Ae faafetai i le agaga faaaloalo aemaise o tatou fetufaaiga, malo saunoa faafetai.

E matau atu o lea ua fou mai le sa o Falelatai ma Samatau. Tulai mai le sui usufono mamalu.

Afioga LUPEMATASILA GALUMALEMANA TOLOGATA TOGIA TILE LEIA (Falelatai ma Samatau): E faafetai i lau Afioga i le Fofoga Fetalai mo le avanoa foi o lenei itumalo o Falelatai ma Samatau e taumafai atu ai se manatu i le Lipoti ua i luma o le Laulau-a-Fono a le Palemene. E manatu o lea ua matuifau i le taliga o le sua i lau Afioga i le Fofoga Fetalai faapea foi le Afioga i le Palemia ma le paia maualuga i lenei Palemene. E i ai foi le talitonuga, tatou te vaa e tasi i le viiga ma le faafetai i le Atua, e pei ona avea ai lau afioga i le Fofoga Fetalai ma o tatou Ositaulaga sili, i le taeao ua tuanai.

Ae ou te manatu o paia ma mamalu maualuga o lenei Palemene, tainane foi o le tapuaiga a si o tatou atunuu ma le aufaitatalo o le a faataalolo. E manatu i le utiuti o le taimi e sefulu minute, e pei ona tuuina mai e sui usufono taitasi.

Lau Afioga i le Fofoga Fetalai, sa faalogologo lava ma faasolo foi le vaavaai i le Lipoti, e ui e puupuu se taimi o lo o tuu mai e vaavaai i ai lenei Palemene i le Lipoti. Ae momoli atu le agaga faafetai tele i lau afioga i le Taitaifono ma le Komiti sa nafa ma le iloiloga o lenei mataupu. E ui foi e le i mulimulitaia le tofiaina o le Afioga i le Taitaifono e tusa ma le Tulafono Tumau, ae manatu o le a le afaina lea. O le mea taua o lea ua aumai le Lipoti mo le lauliliuina e le tatou Palemene. E talitonu lava, a o tatou toe o nei e...

Afioga Hon Valasi Luapitofanua Toogamaga Tafito Selesele: Lau Afioga i le Fofoga Fetalai, e le mafai ona tuua le mea lea leaga e taua.

FOFOGA FETALAI: Se i tulai mai ia Lau afioga i le Taitaifono.

Afioga Hon Valasi Luapitofanua Toogamaga Tafito Selesele: E pei o se tuuaiga foi lea ua le mulimulitaia ia le Tulafono Tumau. E pei o le agaga lea e tulai atu ai. Pe o le a le uiga o lana faaupuga? Ae o lea lava sa mulimulitai le tulaga o le Tulafono Tumau. Ia ne i mea foi ua i ai ni finauga, ae o le agaga lena. O le mea e fia faasao.

FOFOGA FETALAI: Ia ou te iloa o lea ua faafofoga mai lau afioga i le sui usufono mamalu. Ia na alualu lava i le amataga ae o lea ua toe faaiu ae o lea e te lagolagoina ia le Taitaifono, faaauau le saunoaga.

Afioga LUPEMATASILA GALUMALEMANA TOLOGATA TOGIA TILE LEIA: Ia e pei o le vaega lena o lea sa taumafai atu ai. E leai se agaga e faaleaogaina le galuega a le afioga i le Taitaifono ma le maualuga o le Komiti. Ae na ona ou faamaaloiuofe atu, o na e manino ia le Tulafono Tumau 177, e le agavaa le Palemia ma le Taitai o le Itu Agai i le tulaga o le Taitaifono.

FOFOGA FETALAI: Ia o le mea la lea ou te tau fia fesoasoani atu ai i le sui usufono mamalu. E leai se malosi o le sui usufono mamalu e na te faauigaina ai Tulafono Tumau e na o le Fofoga Fetalai. Ma o le faaiuga foi a le Fofoga Fetalai lea na tofia ai le Taitaifono.

Ia faaauau lau saunoaga.

Afioga LUPEMATASILA GALUMALEMANA TOLOGATA TOGIA TILE LEIA: Ia faafetai, o le mea sili lea ua manino le saunoaga a lau afioga i le Fofoga Fetalai i le vaega lea. Ae e pei ona fai atu se tala, ia e leai e na ona faamaaloiuofe ia aua le silafia e lenei Palemene ia aemaise o Samoa o lo o faafogafoga mai.

E manatu ia lenei itumalo o Falelatai ma Samatau, a tatou foi i tua e vaavaai i le fita ma le faigata, o le amataga mai o lenei Paeaiga, i le tausailia o se

Malo, e le faigofie le ala na o tatou asa mai ai. E fai foi o le taumafai o lena itu i lau afioga i le Palemia ma le Vaega Faaupufai a le FAST, ae faapena foi le Taitai ma lenei Vaega. E i ai la le manatu, aua a o tatou o nei e auiliili faamatalaga foi sa fai e lena vaega aemaise foi o lenei vaega, ou te manatu e le maua ai i ina so tatou nonofo filemu.

Ae o le agaga maualuga e vaavaai i ai lenei itumalo, o le a se mea e mafai ona maua ai le fealofani o le Palemene lenei? Ma o tatou galulue faatasi aua le agai i le lumanai mo se manuia o Samoa. O lo o tapuaia outou faiva alofilima ia ma se matou taumafai atu. E pei lava ona fai atu o le a le toe taina lava i tua se faamatalaga i vevesi sa o tatou tulai mai ai.

Ae o le tala i le itulagi lea, e sese oe, sese oe, sese oe, ae aupito sili atu ona sese au. E faapena se lagona o le itumalo lenei. O a ni futia ua sola, tatou faagalalo ma faatea i nuu le aina, ae alo i luma lo tatou sa aua se manuia o Samoa. O le tele ia o galuega tetele o lo o faatalitali mai i lo tatou Malo, ma lenei Palemene aua le atinaeina manuia o lo tatou atunuu.

Ona faapea lea o se faamatalaga, lau afioga i le Tamaitai Palemia, o lau afioga lava o lo o i ai le ki ma le tatala o le mataupu lenei. E malie lava le vaavaai i le fautuaga a le Taitaifono ma le Komiti. O lea ua tuuina mai ia le latou fautuaga i le mamalu o le Palemene lenei e tusa ai ma le Tulafono Tumau. A o le tautaualemau a lenei itumalo o Falelatai ma Samatau lau afioga i le Palemia, o le fesili lava ou te fia fesili ai au ia, o le a se ai o le faigamalo ma se tauleleia o le faigamalo i se faaiuga e faia i le mataupu lenei?

A silasila foi i le afioga ia Tuilaepa, ia faapea foi le fetalaiga ia Lealailipule, e le fesiligia lo latou sao taua i le taumafaiga mai o le tatou Malo. O le a le tulaga lea ua i ai nei? O le tulaga maualuga ua oo i ai Samoa, e le gata i le Pasefika, ae faapea foi i le lalolagi atoa.

O le mea lea ou te tatalo atu ai ma le agaga faamaualalo, e le umi se lauga a Falelatai ma Samatau, a o le agaga lea e taumafai atu. A toe tomanatu atu, i lena Paeaiuga ua mavae atu, ia o lea foi sa tulai mai faafitauli faapenei. O le a le mea sa matauina? O lea lava sa faatu le lafo e le afioga i le Sao Faapito, e ui i se fautuaga a le Komiti na aumai e faasaga i se tasi o sui usufono, faamalolo mo le 3 masina, ae na faatu lava e lau afioga i le Palemia le lafo, ina ia aua ne i faatinoina ia le faatulai ese mo le 3 masina, a ia fai se aoaiga, reprimand.

E faapena se vaavaai a le itumalo lenei, ia fai se ai...

FOFOGA FETALAI: Ia...

Afioga Hon Fiame Naomi Mataafa: Lau afioga i le Fofoga Fetalai...

FOFOGA FETALAI: Onosai mai le sui usufono, tulai mai le afioga i le Palemia.

Afioga Hon Fiame Naomi Mataafa: Sa le fia faalavelave i le saunoaga a le sui usufono mamalu, ae ona o lea e fai ma taua lou igoa ma tapa mai au, ia ma aumai le faataitaiga ai o le mataupu lea na faasino i le afioga i le Minisita o Faatoaga. E eseese mamao lava mataupu. O le moliaga o le Minisita, ua na aumai ia ni faamaumauga e le moni. Ae o le faamaumauga o le tau o afi. E ese le tele o le taua o lena mea.

O le mataupu lenei, contempt of court, contempt of Parliament e ala i amio ma solia o tulaga aloaia a le Palemene. E eseese mamao mea. Ma e lelei le saunoa mai pea o le sui usufono ia, i le mataupu. E le o le tali o le mataupu lenei o a tatou upu ma tala ia na fai i tulaga ua mavae.

O le mataupu, o le avea o upu ma tala ma gaioga ma amioga na fai ua solia ai le tulaga aloaia ma amio taualoa a le Palemene. O le mataupu lena, e le o se mea e tatou te talanoa ai fua po o ai na faia le tala anafea o ai na toe talifuaitau. Tatou talanoa pe sao le lipoti ua faamaonia.

FOFOGA FETALAI: Ia ou te iloa o lea ua manino le saunoaga a le Palemia lau afioga i le sui usufono mamalu, leaga o lea ua taua mea ua tuanai. Ia o le Nofoaiga foi lea na tea nei e le i i ai lau afioga i le sui usufono mamalu. Ia e pei o le mea lena o lea e tau tei atu ai foi le Nofoa. O le mea lea, saunoa manino i le tulaga o le tatou mataupu lea e i luma nei o le Palemene, ia ma aumai se talosaga. O tulaga faapena i lo tatou vafealoaloi. Ia ma le agaga faaaloalo lau afioga i le sui usufono mamalu.

Afioga LUPEMATASILA GALUMALEMANA TOLOGATA TOGIA TILE LEIA: Faafetai tele i lau afioga i le Fofoga Fetalai. E avatu foi malu i puega i le finagalo o le afioga i le Tamaitai Palemia. Ia e leai o lea lava sa taumafai atu se faamatalaga e tau faapulapula ai nisi o vaega, ia atonu lava e i ai se e aiga ma le mataupu o lo o tau faatino nei.

Ae ou te manatua i lou loto le tala a le Tupu o Tavita ma le Tupu foi o Saulo, ina ua tofia e le Atua ia Tavita e avea ma tupu, o le tele ia o avanoa na maua e le tupu o Tavita e faaoo ai le oti ia Saulo. Ae fai mai le mau a Tavita, e le mafai ona oo lou lima i le na faauuina e le Atua.

O se manatu vaivai o lenei itumalo o Falelatai ma Samatau, lau afioga i le Tamaitai Palemia, a toe tomanatu i le saunoaga a le taitai o lenei itu, sa ou faapea o i ina e maua ai ia so tatou fealofani ma se tasi e agai ai i luma ia le tatou galuega.

O le Malo lena, ae o le a matou faasaga e agai le Malo. E ui i so matou naunau i lena taimi, e faaleo fua ia lo matou aiatatau, e tusa ai foi ma le Tulafono, ae na faamaui lava i tua, faasolomuli se manatu, ae tuu atu le Malo. O le agaga lena o lea e taumafai atu ai ia lenei itumalo, o fea a saga fai i ai ia lenei mataupu? O lea ua uma ona faalelei, o lea ua ave foi i tua ia tagi sa faasaga i lena itu. E matautia foi ma ogaoga ia tagi sa faasaga i lena

itu, fea o i ai? O lea ua faasolomuli, o le agaga maualuga ia maua e tatou le agaga o le galulue faatasi.

E matou te avatu malu i puega i le afioga i le Palemia ma lena itu. O le a foi sa outou faafogafoga mai i nisi taimi i se matou taulagalaga atu, o le galuega lava lena faavaega faaupufai. Ae o le agaga maualuga lava, ia manuia Samoa.

O le mea lea lau afioga i le Fofoga Fetalai, faapea lau afioga i le Palemia ma le Kapeneta ma lenei Palemene, o le tuualalo lena ma le talosaga lena a lenei itumalo o Falelatai ma Samatau. A i ai ni ou alofaaga, ia fou Sina i futu. Ioe, a i ai ni ou alofaaga, ia fou Sina i futu. O le tatalo lea ma le talosaga le mau a lenei itumalo.

E faamalulu atu, pe afai e paopapa se faamatalaga i la outou faafogoga a ua le tuua lava i tua se manatu o lenei itumalo, e avatu i lumamea ma le talitonuga, e vaatele i ina. E tele le tofa ma le faautaga i ina, ia e mafai ai ona o tatou silasila i le Atua ma Lana amiotonu, ia ma se faaiuga e maua ai lo tatou nonofo fealofani.

Ia manuia tele lau afioga i le Fofoga Fetalai, ia faapea foi le afioga i le Palemia ma le Kapeneta, o Minisita Lagolago ia faapea foi sui usufono mamalu o lenei Palemene, ae o matou ola i le alofa o le Atua.

FOFOGA FETALAI: Malo faafetai, malo saunoa o lea foi ua agia i le Maota ia lou finagalo faaalua, ia faafetai mo lou sao. O lea foi e faafogafoga mai ia le Taitaifono ma le mamalu o le Komiti ma le Palemene, ia tatou agai pea i luma ma o tatou faasoa, ia pe o le a lava le taunuuga e aumai e le Atua.

Ia o lea foi ua avanoa le... ia ou te matau atu o lea ua fou mai le sa o le sui usufono mamalu mai Sagaga 2. Ia tulai mai Tuisamau.

Susuga MAULOLO TAVITA AMOSA (Sagaga 2): Faafetai mo le avanoa lau afioga i le Fofoga Fetalai, se i taumafai atu foi se vaivaiga o lenei itumalo o Sagaga 2.

E manatu ua logoi logoa le faafogoga a Samoa, i le latou faafogoga tapuai i lenei fono taua. O se fono ou te faaigoaina e ese le tele o le oa, le tofa ma le utaga ua fefaasoai aua le agai i luma. Ua manino le lipoti ua taatia mai ua saina uma e latou e toa 9. Ua manino foi ia saunoaga i le Maota lenei, finauga a itu e lua o e latou te lagolagoina le lipoti ma e latou te teena le lipoti ua aumai.

O le a ou le toe agai la e toe asa ia le ogasami lea, manino ma malamalama ia le Maota lenei. E talitonu o lea foi e faapea ia le faafogoga tapuai a le atunuu. Ae e ese lava se lagona na ou savalivali mai ma au i le taeao nei e uiga i le mataupu lenei. Peitai, i le faalogologo i aai o finagalo ua faaalua i lenei aso atoa, pe ua atagia ai se tulaga e matau ai le mea o taoto ai ia le faamuli o atu aua se ia o le faiva e ae ma le tautai o le gataifale lele e saili manuia. E tau fetuunai malie ai muniao le naalua aliiseu ma tau faavasega le

loloto o le tofa ma le utaga ua faafofoga i ai le Maota le Fonousu ma Samoa i lenei aso atoa.

O le matau lea a le sui usufono o Sagaga 2, ua tau fatufatu ai se titi aua laei o le Palemene aemaise lau afioga i le Fofoga Fetalai, afioga i le Tamaitai Palemia ma lena itu o le Malo tainane foi le Itu Agai. E toeitiiti lava a leai se sui usufono e na te laga le upu lea, o le Maota lenei e i ai le tofa ma le utaga o lo o faatalitali i ai le atunuu.

O nisi foi o saunoaga ua fai lava si mafamafa. Na oo i totonu o le Maota lenei ma le manatu o le tofa loloto ae saili mai se i tulou le upu e to i le gagana i figota ua na o atigifigota. O le faalogologo lea i lagona o nisi o sui fou aemaise lava matou nei e fou mai i le Maota lenei. E fesili mulimai ia muamai.

Ae pei o le aoauli nei lava na maua ai se lagona e faapea, aemaise ina ua tulai le afioga i le Tamaitai Palemia ma faatoatoa finagalo o le la itu i le toe taulagalaga. Faafetai i lau afioga i le Tamaitai Palemia e le tau selu atu, i le tofa e pei o Malae e alala ai le afioga i le Minisita o Aoga o faatoatoa. O lea ua toe fisaga ai le folauga o le sa o le Fonousu a Samoa.

O le fesili lea ua tulai mai, o le a se tofa ma se utaga e tatou te to ai se matupalapala o Samoa aua le faamanatuina o lona 60 tausaga o lona tutoatasi? What are we going to celebrate? E manaia ia o le saunoaga i le tatalaina o le Logo lea sa fai. O le agaga o tatou tuua na tauasaina mai le tutoatasi o Samoa ina ia manuia le atunuu nei ma e lua. O le fesili lena ia i tatou uma. O le a so tatou sao i le Paeaiga aua le faamanatuina i le masina o lumanai nei o le Tutoatasi o Samoa?

E tofa lava tatou ma le tali, ae ou te manatu o le tofa ma le utaga loloto lena. Pe a mafai ona tuufaatasi ia outou finagalo ma o tatou loto e tatou taumafai e saili le vaifofo. Afai tatou te talia le lipoti ua aumai, o le fesili e fesili ifo ai, e muta ai i inei lea mataupu? Saunoa le afioga i le Tamaitai Palemia ma le manino o le mataupu lenei e le uma i le aso. E le uma taeao e le uma i le la vaiaso, o le tatalo faatauanau a le sui usufono o Sagaga 2, faamolemole tatou faia se tonu i le aso e muta ai ma amene lenei mataupu.

O le ai lena o lau afioga i le Fofoga Fetalai. O le ai lena o lau afioga i le Tamaitai Palemia. E le o se upu avane ai, afai ua saunoa nisi o sui usufono ua le fia faalogo mai le atunuu i a tatou Fono, ae o ai a tatou sai i ai? E tatou te sai ifo lava tatou ia tatou.

E manaia le igoa o le fanua ua aumai, o le fanua Fegalegaleai. E manaia ia, pe a fai ma o tatou taumafai e faatino. O le uiga lena o lau faamatalaga e ese lava se lagona na ou savalivali mai ma au, ese se lagona i le ituaso lenei. O le tofa ma le utaga lena. O le tofa foi ma le utaga e masani ona o tatou faapea i faiganuu lelei, o le tatou Tulafono e faapea o ai le tama lea? O ai le matai lea? E tatou te fesilisili i ai o le a le uiga? O i ina tulaga masani o le tofa fefulisai e fua le tapu i ai latou ua aafia. E le o se tulaga faapea e atagia ai se faaituau pe o le a, a o le tofa lena.

I lou foi lagona vaivai, o Tulafono Tumau, ua na o se taiala e taitai ai le tofa ma le utaga i le Maota leni. A o lona faatinoga, o na e i ina le tofa ma tatou le utaga. E le o le tagata mo le Sapati, ae o le Sapati mo le tagata i lou lava lona vaivaiga. E talitonu lava le sui usufono o leni itumalo, e le i faia Tulafono Tumau, e le i faia le Palemene mo Tulafono Tumau. A o Tulafono Tumau ua faataoto o ni taiala e limataitaiina ai le tofa ma le utaga.

Ua aumai le togisala e pei ona malie i le saunoaga mai i le sui usufono mai Sagaga 1, o le taimi leni o la e faatali i Samoa. E le sili foi le tai i lo le tapuai. Po o le a se vaesala faaleaganuu, faakerisiano, faatamalii e oo i ai le sufuga o le tofa ma le utaga i le aso leni, ae o le fesili lona, e faauma atu ai lea o sau faamatalaga lau afioga i le Fofoga Fetalai, mamalu o leni Palemene i le afio o le afioga i le Tamaitai Palemia, le Kapeneta, le Malo ma sui usufono uma, afai e tatou te talia le lipoti, e le uma le mataupu leni.

Ioe, o uiga lava ia faaletagata soifua. Ae a tatou onosai, fegalegaleai, tatou faatuatua i le Atua Samoa ua tasi, e fesoasoani mai i so tatou vaivai ma so tatou mafatia i aso faapenei, tatou faamuta ia leni mataupu i le aso. O le faaiuga lea ua aumai, o le faasalaga ua au, e pala le maa, ae e le pala le tala. O le upu moni e le i lava lea? Ia ae na ona taatia atu, matou faia le faiva o le faufautua ma agai lona itu o le Malo, ma fatufatu lo tatou titi aua Samoa nei ma a taeao.

Faamagalo se upu ua le tautamalii i le faafofoga a leni Palemene aemaise foi o le faafofoga a Samoa. Ia maua le tofa i lau afioga i le Fofoga Fetalai. Malo foi le onosai i lafoga foi i nisi o ituaso, ia e faapena foi uiga o le soifuaga, maua le tofa paia i lau afioga le Tamaitai Palemia faapea le Kapeneta ma lona itu o le tatou Palemene. Soifua.

FOFOGA FETALAI: Ia malo faafetai le faaso, faafetai foi le tanoa ma le saunoaga pau. O lea foi ua manino foi lou finagalo aemaise foi o le fautuaga, malo faafetai o lea ua maua e lo tatou Maota. Ia tatou faamoemoe pea i le fesoasoani mai o le agaga o le Alii ia aua lava ia le tatou mataupu.

Ia o lea ua matau atu o lea ua fou mai le sa o le tamaitai, Sui Tamaitai mai o i Alataua i Sisifo. Ia tulai maia lau Afioaga i le Sui Usufono mamalu.

Afioga ALIIMALEMANU MOTI MOMOEMAUSU ALOFA TUUAU (Sui o Tamaitai Alataua Sisifo): Ia e muamua ona faatalofa atu i lau afioga i le Fofoga Fetalai ona faatoa tulai lea i leni Paeaiga, ia aemaise ia le afioga i le Tamaitai Palemia ma le mamalu o le Palemene, ona o le tulaga ua aumai ai e lau afioga ia le faataatia maia o le lipoti ina ia ave i ai le faamuamua. Ia o le a taoto se tala i lou itumalo o Alataua i Sisifo, aemaise le paia ma le mamalu o tina ma tamaitai e ona le latou Nofoa lea ua ou pale mai ai. Ia sau se taimi ona tuu atu lea o so outou matupalapala.

Ia o lea ua taoto le lipoti ma fautuaga ona ua avea upu ma tala na fai ua solia ai tulaga taualoa a le Palemene. Ou te talitonu po o a ni manatu o leni

itu e avatu, e le mafai ona toe suia ai ia le lipoti tusitusia ua uma ona faataatia e le Komiti.

Ae aoga mea e tutupu, e matua aoga lava le taeao lenei, e matimati ai le lumanai. E pei ona maua i nisi o saunoaga le tulaga ua i ai le tatou Palemene i lafoga ma faaupuga e fai. O se lagona lena faatina ua i ai lenei taeao. Ua aoga le taeao lenei mo i tatou uma lava. E ui o le tulaga ua i ai le lipoti o mea na fai i fafo atu o le Maota, ae o tatou o taitai. E taimua tatou, fai i tatou ma faataitaiga o la e tapuai mai ia lo tatou atunuu.

A o lou tulai atu, ia e le o toe po se lilo i le faalupega o matou, o tina ma tamaitai o Samoa. O lea sa outou saunoa ai o le pae ma le auli. O lau faaoololomaau atu lena, o a fa i lena itu o le Maota, o outou o matou tuagane, vaeatu tofi o itumalo. Se i o tatou toe mafaufau lava i tua, tatou mafaufau i tua i le feagaiga na sainia e le afioga i le Tamaitai Palemia faapea le afioga ia Tuilaepa. O lo la maliega i le agaga faakerisiano, na o la taumafai ai, se i fofo le faafitauli ua tupu i totonu o le tatou Palemene.

Ia ae peitai ua ese le tulaga ua oo i ai ina ua faapepa ma ua avatu i le Faamasinoga. E le toe i ai la se tala e oo i ai. E pau le mea e na ona toe faamanatu, faamanatu i ai tatou o taitai aemaise le amanaia ma le faataua o maliega a o tatou taitai a itu e lua, ia fai lena ma vaifofo. Fai lena ma vaifofo i lenei ituaso o le le mautonu, faavae i le agaga kerisiano, ma le aganuu ina ia maua ai le filemu o le Atua i totonu o le Maota lenei.

Tatou mafaufau i galuega sa fai, le soifua lafoai o le afioga ia Tuilaepa, i le fia sefulu tausaga sa tautua ai o le tatou Palemia. E i ai ona sese, e leai se isi e atoatoa. E faapea foi ia le tofa ia Leala. Ua o tatou masani uma lava ia Leala. Ae aoga le aso lenei Leala. O lenei lava e taufofo atu le mataupu, ae vaai atu e te le mafai lava ona e maua le toafilemu. Ae avea le aso lenei ma upu ua fai atu, ia aemaise tama ia ua fai atu ia tala ia te oe. Fai ma fautuaga e matimati ai le agai i luma. Tatou vaai agai i luma, avea ia le ositulaga ua faia e Tuilaepa ma Leala i lenei aso e faamuta ai nei mea. Ta fia saofai lava i se Palemene e fealofani, fefaamagaloi, tatou agai i luma. O la e vaai mai le atunuu.

Lau afioga i le Tamaitai Palemia, malie lou finagalo, tofa malie ma uta malie, o a fa oe? Liuliu ia lou finagalo, o oe, o au, o taua o le pae ma le auli o le Maota lenei.

Ia ou te talitonu o le a foi le leo o Alataua, o a foi ni lagona, ia ma le maligi o loimata i lenei itula, o lagona lena o le ootia ma lata tatalo, le tatou Palemene faamolemole, faagata ia i i nei mea, tatou agai i luma. O lea o le a matou sagai atu, tatou galulue faatasi aua le manuia o si o tatou atunuu.

O le a foi le leo, alofagia e le Atua lau Afioga i le Fofoga Fetalai, lau Afioga i le Tamaitai Palemia, ia e maua le tofa ma le faautautaga, a outou Afioga i le Kapeneta, la outou galuega lagolagosua, ia outou maua le tofa loloto ma le tofa mai le Atua e maua ai le faapalepale. O Afioga i sui usufono o le Palemene ia manuia le usugafono. Ia manuia le tapuai mai o Samoa, soifua.

FOFOGA FETALAI: Ia ua faamalo saunoa, tanoa foi i lau Afioga i le sui usufono mamalu, o le tulaga faatina ma tamaitai faufautua e pei ona e saunoa, malo faafetai. E faafetai i lou tiute, e te le o alo lava i lou tiute o lea lava ua faataatia i lumamea i le Maota lou finagalo faaalua. Ia malo lava faasoa, faafetai foi fesoasoani mai, o lo o faafofoga pea le Atua i le tatou mataupu ma le tatou feagai ai foi ma lenei Lipoti. Ia tatou tatalo pea mo le toamalie ma le filemu e aumai le Atua, aua lava lenei mataupu ua i lumamea.

O lea ua matau atu ua fou mai le sa o le itumalo o Vaimauga 2. O lau tofa Lenatai Victor Faafoi Tamapua.

Tofa LENATAI VICTOR FAAFOI TAMAPUA (Vaimauga 2): E momoli atu le faamalo ma le faafetai i lau Afioga i le Fofoga Fetalai e tusa foi ma le avanoa ua maua foi e lenei sui usufono, e tusa ai ma le Lipoti e pei ona folasia i lumafono o le tatou Maota nei. Ae muamua ona ou faatalofa atu i lau Afioga i lenei itula o le aso, aemaise foi le afio o le Afioga i le Tamaitai Palemia, afioga i Minisita, Minisita Lagolago, lenei itu o le Malu, afio le sui Taitai aemaise foi o sui usufono mamalu o le Fonousu a lo tatou atunuu.

Lau Afioga i le Fofoga Fetalai, sa taumafai lava e tatope le faitauina o lenei Lipoti ona o le taimi puupuu e pei ona tuuina mai.

Ae fia faaleo le agaga faafetai i le Taitaifono, aemaise foi o sui mamalu o le Komiti i le galuega sa faapena ona faatino. Ina ua taunuu mai i le taeao lau Afioga, sa tatalo mai lava po o fea o le a agai i ai foi le tatou mataupu i lenei taeao. Ina ua e siitia lau Afioga i le Fofoga o le Maota le viiga ma le faamanu i le taeao analeila, sa ou lagonaina le pai mai o le mafanafana o le aao o le Atua. Sa ou maua foi le filemu, viia le agalelei o le Atua. Ae ina ua fai faasilasilaga a lau Afioga i nisi o mataupu, o i ina sa oo mai ai foi le vaivai o le loto. Ina ua e saunoa mai lau Afioga o lo o faapena ona i ai foi le isi faasea, e pei o le faasea lea ua alu lenei aso o tatou talanoaina, ae ua taatia galuega aua le agai i luma o le tatou Faigamalo aemaise o le tatou atunuu. E pei o se lagona vaivai lena ua maua, ae pei o le a tatou tauaimaa. E mafua mai, o le Lipoti lea po o le faasea muamua e pei ona tuuina mai i totonu o le Maota nei.

Ae ui i lea lau Afioga, sa agai tonu se vaai a lou nei tagata, e tusa ai o tuutuuga o galuega sa faapena ona tuuina atu i le Taitaifono ma le Komiti. Ina ua ou vaai i le vaega 6, sa lagona foi le le faamalieina o lou nei sui usufono, ona e foliga mai i le vaega lea, sa tuuina atu le faamoemoe i lau afioga i le Tamaitai Palemia ma le Maota nei, e latou te faia uma mai, e faamalieina uma mai ia tuutuuga o galuega, ona toe lipoti mai lea i le Maota nei. Ona aumai lea o se latou fautuuga e faapena ona faavave ai, e faigofie ai foi le tatou mataupu. Ae paga lea, e le o le auala foi lea o le Atua, i lau matau, po o le tulaga lena sa tuai ai foi na avatu se manatu o lou nei sui usufono. Ou te faafetai ai foi i le faaiuga lea ua aumai e le Komiti lea. O lea

ua toe maua ai le avanoa o lau Afioga ma le Maota nei, e latou te faia le faasalaga tatau e uiga i le Lipoti lea e pei ona tuuina mai e le Komiti. E faafetai foi o lea ua maua foi le avanoa o lou nei sui usufono, e avatu ai foi se manatu e uiga i le faasalaga e tatau ona tuu atu ia i laua o lo o faapena ona faasaga i ai le Lipoti lenei.

O lau afioga e pei ona avatu foi i le taimi muamua, o lo o i ai isi faasea e lua, na ua i luma o lau Afioga le Fofoga Fetalai. O le faaiuga o le a tatou faia i le aso, e i ai lou talitonuga a lou nei sui usufono, o le precedent lena o lea o le a set mo isi faasea o lo o faapena ona tauaaoina e le lau Afioga e pei ona e faasilasila mai i le taeao analeila, aemaise o le vaiaso ua tuana'i. O le uiga o lau faamatalaga, a faapea e finagalo lau Afioga e toe fai foi se isi Komiti, toe fai foi isi suesuega, ona toe omai foi lea i le Maota sui mamalu, alu ai foi le tatou taimi, alu ai foi le aso, alu ai foi le malosi, alu ai foi ma tupe. E tele le tupe lea ua alu i nei mataupu o lo o tatou talanoaina lau Afioga. O se tuualalo lea, ae avatu i lau Afioga aemaise foi le Minisita o le Maota Fono, le Afioga i le Tamaitai Palemia i se faaiuga o le a faapena ona tasi i ai le Maota i le aso lenei, ia tatou vaai mamao, ma tatou tilotilo ma tatou vaai alofa i lo tatou atunuu, o lo o faapena ona tapuai mai. Ma ia tatou vaai, o le precedent lena o lea o le a set ai tatou i le aso, mo isi foi faasea e pei ona i ai i lau Afioga i le Fofoga Fetalai.

Ia agalelei le Atua i lau Afioga i le Fofoga Fetalai, aemaise le Tamaitai Palemia, Minisita, ma sui usufono uma o le Maota nei, ia maua le filemu mai ia te Ia. Ia manuia tele Tualumaga o lo o totoe o le tatou Fono, faafetai.

FOFOGA FETALAI: Ua malo saunoa i lau Afioga i le sui usufono mamalu mai Vaimauga 2, malo faafetai. E taua foi lou finagalo i le tele o mataupu ua faatoai mai iinei, o lea lava e faamoemoe atu lava ia outou afioga, aua e mafua mai lava o i ina. Ae a faapea tatou te galulue faatasi, e faapena ona tuuitiitia ai. Ae le mafai foi ona teena e le Fofoga Fetalai outou finagalo e faatoai mai i luga nei i le laulau. O le mea lea, tatou tau fai tatalo, manaia foi le fautuaga mo le agai i luma, aemaise le faasaoina o taimi taua o le tatou Palemene.

Lau Afioga i le sui usufono mai Faasaleleaga 5.

Afioga PESETA VAIFOU TEVAGAENA (Faasaleleaga 5): E momoli atu le faamalo ma le faafetai o lenei sui usufono i lau Afioga i le Fofoga Fetalai. Ia faamalo foi tapuai i lena itu o le Malo. E manatu foi lenei itu o le aso, o le taimi foi faapenei e le faigofie, aemaise o taimi ua filogia i tatou i le musumusuga a lo tatou Tama oi le Lagi. E manatu lou nei sui usufono lau afioga, o lea ua tulei saunoa nisi o sui o lenei itu o le Malu, i lenei lava faaiuga o le mataupu lenei, e pei ona tulai mai i se tasi foi o le Taitai o lenei itu, faapea le sui usufono nei.

E avea foi lenei avanoa e momoli ai lau faafetai i lau Afioga i le Taitaifono aemaise o la outou Komiti. Ma e talitonu lava lou sui usufono, so o se tofiga ma mataupu e tofofi i ai i tatou, e ao lava ona tatou faatauaina, leaga o lea ua filifilia i tatou e o tatou itumalo. E tatou te molimolia le mamalu ma le amiotonu ma tulaga lelei i le silasila mai ma le maimoa mai, ma taputapu mai foi lo tatou atunuu, ia i tatou o taitai.

Lau Afioga i le Fofoga Fetalai, sa umi lava se taimi o ou mafaufau i le tulaga ua taunuu i ai le taunuuga o le Lipoti lenei. Ona ou manatu lava lea i tulaga o tupu i totonu o tatou afioaga. A oo ina talanoa ia nuu ma afioaga, e saili gata lava le amiotonu, ma e le tuli foi i se sao. Ua tatou matau i totonu o pulega o nuu ma afioaga, pe sao pe sese, e faia lava faaiuga a nuu ma afioaga. E oo foi la i totonu o le Palemene lenei, e i ai lava le tatou avafatafata ma le tulaga faaaloalo aemaise lena itu o le Malo ma lenei foi itu o le Malo. I lau vaavaai ma lau faitau i le Lipoti, maumau e lava le Lipoti pe a na i ai lava sina avanoa se i fesiligia ai le Taitai foi o lenei Itu, i tulaga e pei ona i ai nei foi tuuaiga. Ae peitai o lea ua matau atu i le Lipoti, e le o i ai se...atonu foi o lea ua faamalieina lou sui usufono, ua uma ona saunoa le Tamaitai Palemia i le taimi ua sola. Ae pe i o le lagona lena sa i lou sui usufono, sa ou manatu lava ia atoa lelei le Lipoti a le Komiti, i tali a i latou po o i laua o lea ua aafia i lenei tuuaiga.

Ma ua ou manatua ai lava lau lauga na fai i le Paeaiga lea na tea nei, o lau lauga na fai, e faatatau lea i lo tatou Alii. O le taimi foi ua taitai mai Iesu i totonu o le faamasinoga, o le a fai i ai le faasalaga, ma e leai lava se tali. Alalaga tagata Iutaia, faasatauro, faasatauro, ae talofa, talofa, na fai lava e le faamasino sili ia Pilato le faaiuga, ua faalogo le faamasino sili i tagata ae ua le silasila i sana faaiuga talafeagai.

Afioga Hon Valasi Luapitofanua Toogamaga Tafito Selesele: Laua Afioga i le Fofoga Fetalai o le mea e fia faasao.

FOFOGA FETALAI: E manatu le sui usufono se i tuu atu i le Taitaifono ona toe faauma ai lea o lau saunoaga.

Afioga Hon Valasi Luapitofanua Toogamaga Tafito Selesele: Sa ou fia faalogo lava i le folasaga manaia a le sui usufono, e oo lava ia Iesu ua oo i ai. A o le tuuaiga lea faapea e le i i ai se avanoa o le Taitai o le Itu Agai, e fia faasao atu i le sui usufono. E muamua o lo o i ai lana tusitusiga o lo o saina ai i laua, o lana tali mai. Sa taumafai foi le Komiti ina ia maua se fesootaiga i le vaiaso lea na toesea ai le Taitai o le Itu Agai i atunuu mamao. Ae na alualu lava maua, o lea sa zoom mai luga i Niu Sila, i totonu o faletalimalo sa alala ai. Na umi lava se matou faatalanoaga, masalo pe a ma le 3 itula o matou talanoa i auala faaonoponei. O lea la e faasao atu, faamolemole, e le i i ai lava se vaipanoa e le i oo i ai saililiga a le Komiti.

O lea e molimau uma le Komiti e toaiva, sa o matou talanoa. E pau lava lena o le molimau na umi na matou talanoa. E 3 itula pe ova atu, o le faasaoga lea.

FOFOGA FETALAI: Ou te iloa o lea ua manino lea tulaga lau Afioga i le sui usufono. E le i i ai lava se tulaga e le i oooo i ai le tatou Komiti. O lea ua manino le saunoaga a le Taitaifono.

Se i tulai mai lau Afioga i le sui usufono.

Afioga PESETA VAIFOU TEVAGAENA: Ia faafetai i lau afioga i le Taitaifono, e faamalulu atu foi, ae pei o lea e agai lau mau lea e avatu, ona o lea ou te faitau i le Lipoti. E maumau pe ana faapea o mea ia e saunoa i ai le Taitaifono o lea e i totonu o le Lipoti, semanu ou te le tau avatua. E pei o le agaga lena, o lea ua ou malamalama, faafetai foi o lea faatoa aumai nei e le Taitaifono, ae le o i totonu o le Lipoti lea lau Afioga i le Fofoga Fetalai.

Ona ou manatu lea lau Afioga.

Afioga Hon Valasi Luapitofanua Toogamaga Tafito Selesele: Lau Afioga i le Fofoga Fetalai, e le mafai ona tuua le mea lea leaga e taua.

FOFOGA FETALAI: Tulai mai lau Afioga i le Taitaifono....

Afioga Hon VALASI LUAPITOFANUA TOOGAMAGA TAFITO SELESELE: O le molimau lava ia e agai atu e fai lana molimau. A o lea ua uma ona faapepa lana...o lea sa manino mai lava, o lena e i totonu o le Lipoti. O mau la a molimau, e fua i ai le faamasinoga a le Komiti, ia ae o lo o tele lava pepa, a faapipii atu nei mea o le pepa, ou te iloa e faapenei le mafafia. A fai la e te toaga e faitau, e mafai ona lau atu. Ae o le agaga o le Komiti, e leai se vaipanoa e le i oo i ai ana sailiiliga. O le tali atu lea ma le faaaloalo.

FOFOGA FETALAI: Ou te iloa ua faamalieina lou finagalo, lau Afioga i le sui usufono mamalu.

Afioga PESETA VAIFOU TEVAGAENA: Lau Afioga ta te le finau i lea tulaga. Ae a sue mai le faaiuga a le Komiti, aumai uma mea, aumai uma ona malamalama lea.

Tofa Hon Olo Fiti Afoa Vaai: Lau Afioga i le Fofoga Fetalai.

FOFOGA FETALAI: Lau Afioga i le Minisita o Galuega.

Tofa Hon Olo Fiti Afoa Vaai: O le Paeaiga na tea nei, lau Afioga i le Fofoga Fetalai, e ese le valalata o le mafutaga a le Taitai o le Itu Agai ma le afioga i le sui usufono. A o lea ou te tau faalogologo atu, o lea e tuufesili, e le o malamalama po o le a le tulaga la e i ai le Taitai o le Itu Agai. Na e alu ea e asi le toeaina pe leai? Po o lea lava e te faifaimea atu lava i i, ae e te le o alu e asi, fai ma e alu e asi.

FOFOGA FETALAI: Ia tulai maia lau Afioga i le sui usufono, e faauma mai lau saunoaga.

Afioga PESETA VAIFOU TEVAGAENA: Lau Afioga, a mea foi a outou tulafono na faatatope nei, ua faasa ona toe fai lenei fitu aso. Ua leva ona ou fia alu e asi lau toeaina, a o la outou tulafono lea ua le mafai ai ona matou o e asi le toeaina. Lau Afioga i le Fofoga Fetalai, o le taua ia ia te au o le faaiuga ua aumai i le taimi lenei, ona o lea ua tatou tulata i se aso sili lea ona taua i totonu o si o tatou atunuu.

E momoli foi lau faafetai i le Afioga i le Palemia ma le Kapeneta, faafetai foi i le faalogologo atu i le taua o le tapenaga foi mo le faamamaluina o le...ona ou manatu lava lea o au, ua aumai tonu lava lenei Lipoti i le taimi o se aso fialia, o se aso fialia lea a si o tatou atunuu. E tatou te fialia uma ai ma o tatou Taitai, tatou te toe manatua ai o tatou Taitai ua taoto mai tiasa. Tatou te manatua ai mea lelei, galuega lelei sa faia e o tatou tuua, aemaise lo tatou saolotoga lele. Amuia foi i tatou i lenei vaitau, o lea ua tatou feola mai, ua tatou faamanatuina lenei 60 tausaga, o le agaga fialia lea i lou nei sui usufono.

Ae paga lea lau Afioga i le Fofoga Fetalai, pe a toe manatu atu nei i lenei Lipoti, a o le a se faaiuga o le a faia e lau Afioga i le Taitai o lenei Itu, faapea foi le sui usufono nei, e leai lava so matou loto e faia lau Afioga i le Fofoga Fetalai. A ou vaavaai atu foi i le TV, i le manaia o le igoa lele, le i ai logo foi lea, o le manaia ia o le, folau ma le faatuatua. A folau loa le sa ma le faatuatua, e le mafai ona tatou maua le faatuatua pe a o tatou le maua le loto faamagalalo. O le mea lea lau Afioga i le Fofoga Fetalai, e leai po o le a foi so matou naunautaiga po o se matou tuualalo, o lena e i ina le tofa i lau Afioga. E talitonu foi o lau Afioga o le uluai pou o malo o le ului taeao o le Talalelei. E faapea foi i le Afioga i le sui Palemia e ana le mataupu, o se tasi foi o taeao o le fetu pupula o le Talalelei. E talitonu lava e pei foi ona saunoa se tasi o sui usufono, o mataupu lava faapenei, o mataupu lava e mafai ona fofolamea i ai lenei Maota. O se tofa i lena itu o se faautaga i lenei itu, e faapena se tatalo a lenei itumalo. A o le agaga o lou nei sui usufono, ia maua pea le nofo lelei ma le nofo fealofani e lo tatou Maota.

E momoli lau faafetai i le tele foi o le taimi na galulue ai la outou Komiti, lau Afioga i le Taitaifono, ia e le faigofie le faatinoia foi o tiute. O le agaga fialia lea i lou nei sui usufono. A o lau tatalo, tatou tuu i luma o le Atua lo

tatou faamoemoe lau Afioga i le Fofoga Fetalai. Aua po o a lava mea tatou te naunau e faatino i le lalolagi lenei tatou te ola ai, ou te talitonu... O le taua ia ia te au o le tou vaega faaupufai, Faatuatua i le Atua Samoa ua Tasi.

FOFOGA FETALAI: Ua maea le taimi o le sui usufono.

Afioga PESETA VAIFOU TEVAGAENA: O le mea lea lau Afioga i le Fofoga Fetalai, ia manatua le Atua e toatasi.

Susuga Hon Laauli Leuatea Polataivao Fosi: Lau Afioga i le Fofoga Fetalai...

FOFOGA FETALAI: Ia se i fai mai sau malologa, tulai mai lau Afioga i le Minisita o Faatoaga.

Susuga Hon Laauli Leuatea Polataivao Fosi: Sa leai lava se agaga e faalavelave i le saunoaga a le sui usufono mamalu. Aua e tasi lea sui usufono matua o lea e totoa i le Maota, sa matou auai faatasi foi i le Paeaiga lea na uma nei. E pei o lea ua faanonoi mai ma augani mai, o matou e leai se loto faamagalo. O le mea muamua lena ua ou manatu e tatau ona faamalamalama. Ua ou musu foi ou te faalavelave i le saunoaga a le sui usufono tamaitai i le Alataua. Se e silafia e le Atua le alofa, o lea e taumafai atu nei le Afioga i le Taitaifono. E na ona ou faamanatu atu lava, le faaiuga o le tatou Paeaiga lea na i ai nei. O le a le lafo na faatu ia i matou e toafa, sa outou faanonoi faapea e fai se laveai mo matou? Na ona ou faamanatu atu, e a le aso na ou tulai mai na o au, ina ua tuli Olo tuli Leatinuu, fia maua se taimi se i fai se upu. Na i ai se isi na laveai? E leai ma se isi, ae fai lava le mea na fai. Ina ne i matau mai le atunuu, ia o lea ua lafo mai nei le uluulu o le laau o matou e le loto faamagalo. Oka se anoanoai o le aano lea na saunoa i ai le Taitaifono. Ia tuutumamao le tofa i uiga o upu a le Taitaifono ma lana Lipoti. A lena, e pei ona ou fai atu muamua, ni a fa a outou pe ana faatu atu le lafo, ae tau atu le taimi o le Nofoaiga atoa. O le a sa outou tali e fai mai? O lea ua saunoa mai nei ma lau mai, o le tou taimi lenei. O le a le mea na fai na o matou nonofo ai i fafo i le faleie, ae loka le falefono. O i na amata mai ai mea nei. O le mea lea, malilie sui usufono, seu le manu ma tagai i le galu, tau le pua ma sei, aua le tau le pua ma lafo mai. E leaga o lea foi matou te nonofo ma tilotilo atu i le mea na mafua ai nei mea uma.

O lau fesoasoani atu lea, ne i outou manatu mai, matou te le o manatu atu, e silafia e le Atua. A o ai ia ua tutupu ai ia mea? O a outou tu lava ma aga lea, o le faamasinoga. O le upu foi lea o le tou saunoa i le feagaiga, tulou le feagaiga. Lea ua saunoa atu a na faatino le mea lena e le faia, o lena ua outou iloa le mea e oo i ai. A o le mea lea e fai atu, ia fua se tapu, tatou mataitu ma tilotilo. A lea ua saunoa atu le Taitaifono, taatia maia laia, ae malilie sui

usufono, ua tasi ae afa le finagalo, o le Komiti, o le tali lea mai le Atua. O lau fesoasoani atu lea.

FOFOGA FETALAI: Ia faafetai. Ou te iloa o lea foi ua manino le saunoaga a le Minisita, e fesoasoani foi i le sui matua. Le sui usufono mamalu faauma maia lau saunoaga ua maea lou taimi.

Afioga PESETA VAIFOU TEVAGAENA: Ia, e manatu foi ua uma foi le lauga a lenei itumalo. ae pei o le agaga lena e taoto atu, o le matou foi tuualalo. Leai, e leai se agaga e faaolomaau pe aaitui foi i se tulaga ua i ai lenei mataupu. Ae pei na avatu se matou tuualalo ina ia maua pea le toafilemu o lenei mataupu, e le gata i lena itu o le Malu, ae faapea foi i lenei itu. A o le matou tatalo, ia fesoasoani mai pea le Atua e le gata foi i se faaiuga ua tapenaina e lau Afioga i le Fofoga Fetalai, ae tatalo i le Alii ia fesoasoani mai i lena itu o le Malu, ia faapea foi lenei itu o le Palemene. Ia soifua ma ia manuia, manuia le tapuaiga a lou itumalo.

FOFOGA FETALAI: Ua malo saunoa i lau Afioga i le sui usufono mai Faasaleleaga 5. O lea lava ua maua atu e le Taitaifono ma le Komiti ma le tatou Palemene lou finagalo ma le faaoloolomaau. Ae manatu, ou te iloa, ou te tapa lau Afioga i le sui usufono mamalu o Faleata 3. Aua e tatau ona tuu atu pea se avanoa i lau Afioga mo sau saunoaga, a o le i tuuina atu le mataupu i le Taitaifono.

Tofa LEALAILEPULE RIMONI AIAFI: I le ava tele e tatau ai e tulai atu ai ma le faaaloalo e fai se manatu e tusa ai o le mataupu. E faafetai i lau afioga i le Taitaifono, lau Afioga i le Fofoga Fetalai mo le avanoa.

E leai foi se manatu e faaumi se faamatalaga. E muamua e momoli le faafetai i le Afioga i le Taitaifono ma le mamalu o le Komiti i le Lipoti ua tuuina mai, e faatatau i le Taitai o lenei itu, ma lou foi tagata. O le talitonuga lava ia, a fai lava o le faaiuga lea na musumusaina outou e le Agaga o le Atua e fai, e le toe faatautee lou manatu. Aua po o a iuga tatou te faia, ma faaiuga i totonu o le Palemene, so o se mea lava tatou te faia, tatou te fesili lava i le Atua po o le a lana faaiuga, lana musumusuga. A fai o le tulaga lea, ia e le faatautee lenei sui usufono e talia.

E faigata foi ona ou soona tautala, ona e le na o au lea e agai i ai le Lipoti. O le ala lea sa i ai le manatu, se i oo mai le Taitai o lenei itu, e fai atu foi sana faamatalaga ma sana saunoaga, e le gata foi i lea, a o le sui usufono o le e ana le mataupu sa faatoai mai mo maua. Ae ui i lea, o lea ua saunoa le Afioga i le Fofoga Fetalai ma faamalamalama ia itu, e momoli atu ai le faafetai i le Taitaifono ma le Komiti.

E faafetai foi i sui usufono mamalu sa saunoa i lenei mataupu, o e sa lagoalagoina i maua, o upu lava a le atunuu, o uo lava i aso uma, a o le uso

i aso vale. A fai foi o a ni saunoaga ua oo mai, ia e leai, o aso faapenei, tatou te fesili ai i le Atua i Lona filemu, tatou te le toe sailia le sao, ae tatou te fesili lava i ai i Lona agalelei ma Lana amiotonu.

E tasi lava le auga lea e saunoa i ai le paia ma le mamalu o lenei Palemene, o le tausia o le mamalu o le Palemene o Samoa, o le tausia o le mamalu. Ina ua matou feiloai ma le Komiti, o le vaega muamua lava lea sa ou tautala i ai. O le a se silafia a le Komiti i lenei mea ua fai? E maua ai so tatou filemu, e maua ai se ai mo Samoa? O lou lava lea vaivaiga ma lou manatu. Ae ui i lea, e le toe ta tele i tua se manatu.

E i ai se tasi o atunuu sa i ai se tagata tautaua e iloa faitau le mea e agai i ai le matagi, e iloa faitau ia ao o le lagi, ma so o se manu. E fealuai e mafai ona ia faia vavega. Sa aami e le tupu e fia feiloai i ai, ona ua aave mai tala o lona tomai. Ona nofonofo lea o le tupu, ona fesili lea, ua maoae lou atamai. Ae ia e matea mai, o lea ou te uuina le manulele lea i lou lima. Ia e mate mai po o ola po o mate? Ua nofonofo le alii poto lea ua le iloa faavasega, aua a fai atu nei o lo o mate, ae le iloa po o ola. A fai atu foi o ola, ae mafai ona tape e le tupu le manu. Ona nofonofo lea o le alii ma faapea, “lau afioga i le Tupu, o le tali o lau fesili o lo o i ou aao, o lo o i ou aao le ola ma le oti o le manu.” O lona ua i o outou aao le Palemene. Na pau lava lea, e toe foi lava se manatu i le tatou feagaiga lea na osia, ona o lea e aumai manino lava e le Faamasinoga. O lea ua saunoa le Afioga i le Taitaifono faapea mai, ana le faia semeamanu e faleapuipui le Afioga i le matou Taitai po o au nei. Lau Afioga, e tasi ae foi atu, o lo o ia te au le faaiuga, ou te masalo foi o la e ia te ia. Ae fai mai le faaupuga a le Faamasinoga, e ono oo i le falepuipui le Taitai, e ono oo pe ana faapea e faaauau. Ae peitai, talu ai o vaega nei e tolu, ua le mafai ai ona faia se faaiuga. Vaega muamua, e le fesiligia e le Faamasinoga le tautua a Tuilaepa ia Samoa. E le fesiligia.

Lona lua, ua maea ona faatoese, ua maea ona faatoese i le Faamasinoga. E i ai ma le isi vaega lona tolu lau Afioga. O le uiga o lau tala lea sa ou talanoa ai foi i le Komiti, taatia ese au ia, ma e silasila le Atua, o au foi ia e le o se tagata mama. A i ai se finagalo o le Komiti, ia outou alofagia le toeaina lea, vaeane le Afioga i le Taitai. Lea ua manino lava le... o papalagi na faia le Faamasinoga lau Afioga, o papalagi na faia le Faamasinoga. Lea ua manino lava, o le a le faasalaina oe. Ia na fai le... a o lea ua e faatoese. O le a le faasalaina oe i lau tautua ia Samoa, ua 40 tausaga. O le fesili, o lea o le a tai 20 o matou tausaga, ia, e i ai se aleu i totonu o le Palemene? Ae a pe a tatou alolofa ia manatua le Afioga ia Tuilaepa, aua o lau tatalo lea lau Afioga i le Taitaifono ma le Palemene, a i ai ni outou alofa, Tuilaepa lona. Ou te faatoese atu foi. Lau Afioga, ua uma ona ma faatoese. O le a le isi mea e sili atu i lo le faatoesega? Afai foi o lo outou finagalo ma te toe faatoese atu i i, ou te faatoese atu e ave ai ma sui o maua ma le Taitai, ou te faatoese atu. Ona e pei ona saunoa nisi o sui usufono, o le taimi lea o le vavao o sailigamalo, ne i te i ua tau le pua ma lafo mai, ae ou te le faamasinoina atua

lena Itu. O lea foi la ua saunoa mai lau Afioga i le tele o nisi o faasea ua avatu, lau Afioga, e mamao lava ma o matou mafaufau ia faasea, e mamao. E le tau i ai. Ae pei ua ala ona toe mafaufau i ai ona o le tulaga lea. Aua sa i ai lava le manatu ma le talitonuga, o la e manino lava le faaupuga o le maliega lau Afioga, e manino lava, manino lava, mo se filemu o Samoa ma le agai i luma, se filemu o Samoa. Po o fea e fai i ai, a o i o le Maota o faugatia a Samoa, o lupe na fai mai le fuifui, ae faavae i le a? E faavae i le faavaepapa o le Atua. O le Atua o le a? O le Atua o le alofa, le Atua o le alofa.

Ia, e pei lava ona ou talanoa atu, e le toe faasilia sau upu. A fai o le finagalo lea o le Komiti, e faamalulu atu ma faatoese atu i le tatou Palemene, e avea ai ma sui o le Afioga i le Taitai. Ma le tatalo, aua ne i galo ia te outou Tuilaepa, aua ne i galo ia te outou.

Ia, Samoa aemaise le itumalo o Faleata 3, o se taimi tatou feiloai, e faamalulu atu i le tulaga ua i ai le tatou Palemene ma le tulaga foi, o le a lava le faasalaga o le a fai mai, ou te talia ma le faafetai lau Afioga, talia ma le fiafia. Afai foi e mafai ona ou avea uma ma faasalaga ma le Afioga ia Tuilaepa, o lau tatalo lea, ou te gafatia ona ave na o au, ae ia outou alofagia si toeaina, alofagia Tuilaepa. Pau lea o le tatalo atu. Ia manuia le tatou Fono manuia le faafofogaaga a Samoa. Faafetai.

FOFOGA FETALAI: Malo faafetai saunoa.

Ia se i tulai mai lau Afioga i le Tamaitai Palemia.

Afioga Hon FIAME NAOMI MATAAFA: Lau Afioga i le Fofoga Fetalai, faafetai mo le avanoa e fai ai se manatu e tusa ai ma le mataupu o lo o i luga o le Laulau-a-Fono a le Palemene. Ua faalogologo lava ma le totoa i le folasaga a le Taitaifono, ia ma faapena ona folasia mai le vaega o le Lipoti aemaise se fautuaga ua tuuina mai e fai i ai se filifiliga a le Palemene. Ua faalogologo foi ma le totoa i le saunoa mai o sui usufono mamalu o le Palemene, lea ua tualuga i le saunoaga a le sui usufono mo Faleata 3, o se tasi o lo o faasino i ai le tatou mataupu lenei.

Lau Afioga i le Fofoga Fetalai, sa faasolo foi lou mafaufau pe umi se tala pe puupuu se tala. Ae i le taua o lenei mataupu mo le agai i luma, pei foi ona outou saunoa mai, ia atonu e ao lava ona fofola le tatou fala ma o tatou talanoa.

O le mataupu lenei, e faasino i le solia o tulaga aloaia ma amio taualoa a le Palemene, e ui o lo o tautalagia le faaiuga a le Faamasinoga i le solia foi o le mamalu o le Faamasinoga, ae e ao ona muamua ona ou faapea atu ma le faaaloalo lau Afioga i le Fofoga Fetalai ma le mamalu o le Palemene, e eseese malae. Ua faagasolo le Faamasinoga ua fai lana faaiuga o le mataupu lenei, o le mataupu a le Palemene. Pe fesootai ona ua avea nisi o moliaga ua atagia ai le le talafeagai o le amio po o upu ua lafo e sui usufono o le Maota

lena, e gata lava i ina, ae le aumaia foi le faaiuga a le Faamasinoga e fai ai le faaiuga a le Palemene, e manino lava le tatou mataupu, pe ua solia tulaga aloaia ma amio taualoa a le Palemene. O le a le tali lea ua aumai e le Lipoti a le Komiti? Ioe, ua solia. O lea la ua agai i ai le tatou faasoia i lenei aso, po o a aulape, o lena.

Lau Afioga i le Fofoga Fetalai, ou te fia tautala puupuu i le harmony agreement po o le maliega. E ao ona ou faamanino, o lenei maliega, na fai i le va o Vaega Faaupufai e lua ma saina ai maua ma Tuilaepa o Taitai. O lea maliega, o se maliega faaletulafono i mataupu o le Tulafono, le Faamasinoga. Na faatino ia faagasologa o le maliega, ave i tua tagi o mataupu tau palota, mataupu tau palota i le faasologa lona lua o tatou palota laiti. O tagi sa faasaga ia te au, o le afioga ia Laauli ma le Afioga ia Leatinuu i lalo o public prosecutions, ia ma faapea foi ona malilie mai le la Itu e aveese a latou tagi mo le contempt of court, le solia o tulaga aloaia o le Faamasinoga, aveese e matou. O moliaga ia sa faasaga i le la Itu. Na ave le manao o Itu e lua sa tauave e Loia i le mataupu o le contempt of court ua i ai le maliega lea e faasolomuli mai le mataupu lea, ae tali mai le Faamasinoga, e le talia, e faaauau pea e le Faamasinoga.

O le uiga la o lau faamatalaga lau Afioga i le Fofoga Fetalai, na faatino tulaga o le maliega. O le finagalo o le Faamasinoga e faaauau le Faamasinoga, o le mea lena a le Faamasinoga, ae na fai le galuega ma le gaoioiga a le Itu lenei e tauala atu i a matou Loia tuufaatasi ma Loia a lena Itu, faasolomuli le mataupu o le contempt. O le mea muamua lena.

I le ma le isi lau Afioga i le Fofoga Fetalai, ia manino, o lea maliega e mo mataupu sa i luma o le Tulafono, mataupu tau palota. Na aumai i pepa o le tali a le Taitai o le Itu Agai ma le Afioga i le sui usufono o Faleata 3, faapipii mai ai le kopi o le maliega lea. O lea maliega, e le o le maliega lena lea e faapipii mai i le faaiuga a le Faamasinoga. O le pepa lea e faapipii mai i le faaiuga a le Faamasinoga, na o se aotelega i le agaga o le tausiga o le filemu, a o aiaiga o le maliega lea na faapipii mai i le pepa lea na aumai e Tuilaepa ma Lealailepule mo le Komiti. O lona uiga, o se maliega na fai i le matou va, o lea ua tatala atu e tauala mai i le tali a sui usufono i le mataupu lenei.

Sa matou tausia le confidentiality o le maliega lenei, a o lea la ua i tua, ma ua silafia. Ua tele foi upu ma tala ua fai i ai i le maliega lea. Ou te fia tautala lau Afioga i le agaga lea e aumai e faavae i luga o le tausiga o le filemu. Lau Afioga i le Fofoga Fetalai ma le mamalu o le Palemene, ua taunuu le faamoemoe lena i mea tau palota. Aua e a? A na leai le maliega lea, e lavevea lena Itu, aemaise le Taitai, e lavevea foi le Itu lenei, Taitai o le Malo, Minisita o le Kapeneta. O a la aafiaga pe ana taunuu le mea lena? E leai se filemu. O lau tali la ma le faaaloalo lau Afioga, na tau le faamoemoe o le maliega lena, ua faafilemu, aua o le fesili; o fea le mea e taunuu i ai upufai o Malo ma le vevesi lea tatou te talanoa ai i le tatou palota talu ai? ae fai mai ua pau le Palemia, ua pau ana Minisita e lua, ua ave i le falepuipui le Taitai

o le Itu Agai ma le isi sui usufono sinia. O le fesili; a na taunuu le mea lena, tatou te maua le agaga lea o le filemu tou te saunoa mai ai? A o lau molimau, e maua le itu lena.

Tatou laa mai loa i i i lo tatou va feagai ai, o tatou o sui usufono o le atunuu. Lau Afioga i le Fofoga Fetalai, o upu ma tala, uma le Faamasinoga, o a faaaliga na fai mai e le Taitai ma le sui usufono o Faleata 3. Muamua, e le i i ai se Faamasinoga. Lua, e leai se faamaonia o le soligatulafono.

Lau Afioga i le Fofoga Fetalai, o lona tolu, e le avea le faatoesega faamaumaaina na ave i totonu o le Faamasinoga lea e faapea ua ioeina ai ua faia se solitulafono. O mea na e tolu lau Afioga i le Fofoga Fetalai, o ata aliali ia e le faaaloologia lava le Tulafono. E le gata i lea, ua olegia le atunuu, fai mai e le i faia se Faamasinoga, e le i faamaonia se soligatulafono. Ia ma fai mai, a matou faatoesese, e le o se ioeina lena o se soligatulafono.

Tofa Lealailepule Rimoni Aiafi: Lau Afioga i le Fofoga Fetalai...

FOFOGA FETALAI: Ia onosai mai lau Afioga o lea ua uma foi le taimi na tuu atu, o le taimi lenei o le Malo o lea ua saunoa le Tamaitai Palemia.

Afioga Hon FIAME NAOMI MATAAFA: O upu ia na fai ina ua uma le Faamasinoga. Oo mai i luma o le Komiti lea e saunoa mai ai le Taitaifono, o lea e momoli mai ai lava upu nei.

Lau Afioga i le Fofoga Fetalai, a fai lava i fea? A fai mai Tuilaepa, fai mai Lealailepule o le mea lea ma le mea lea, o le sao lena? Ia, ua saunoa mai nei lena Itu faapea mai, saili lou ai Fiame, lau faigamalo. A o lau tali i lau Afioga i le Fofoga Fetalai, ioe, o lea e tau sue se ai, ae le o se ai e mitamita ai, a o se taumafaiga e manuia le atunuu. A o lau fesili la lau Afioga i le Fofoga Fetalai ma lena Itu o le Maota, e faapefea mavaega tuua, mavaega tuua? O a mavaega? A fai mai lava le Faamasinoga o le mea lea ma le mea lea ma le mea lea, ae fai mai le Taitai o le Itu Agai ma le sui usufono o Faleata 3, e leai, e ese. Talitonu mai i le ma tala lea e fai atu. O ni upu ma ni tala ma ni uiga ia e atagia ai le faaaloologia o le Tulafono? O le isi uiga tausili lea, lea e fai mai ai le tatou tautoga, e tatau ona tatou fai, faaaloalo i le Faamasinoga. O le a taatia ia upu na fai i le Faamasinoga, taatia upu na fai ia matou, a o le uma o le Faamasinoga taatia le faaiuga ae fai mai, e le o le mea lena. Le Vaega e Puipuia Aiatatau a Tagata, le mavaega tuua, le mavaega a la outou Nofoaiga, ua toto le fatu lea ma ua tupu laulau le laau, o le manatu lea, a fai mai lava le tala e sese, o lena. Ona o lea tou te fai mai ai, ona o lea e fai mai ai lo outou Taitai, e le sao, e le amiotonu lena mea.

Tofa Lealailepule Rimoni Aiafi: Lau Afioga i le Fofoga Fetalai, e faanoioi atu lava i lau Afioga...

Afioga Hon FIAME NAOMI MATAAFA: Mavaega tuua, fai mai e tuli so matou ai, ae talofa e, e taumafai e tuli le ai...

Tofa Lealailepule Rimoni Aiafi: Malie lou loto...

FOFOGA FETALAI: Se i maea pea le saunoaga a le Taitai o le Malo.

Afioga Hon FIAME NAOMI MATAAFA: A ua toto le fatu lea i totonu o Samoa.

Tofa Lealailepule Rimoni Aiafi: Malie lau Afioga, ia manatua foi lea sa matou ava i le tatou Sui Palemia...

Afioga Hon FIAME NAOMI MATAAFA: Ua toto le fatu lea i totonu o le Palemene, e pule lava, ioe. E tulaga ese. It's a privilege. A fai mai le Taitai o le Vaega Faaupufai lela, o le sao lea, o le mea lea, ona ua ou fai atu ai, talofa e ia Samoa, ioe. Toto le fatu.

Tofa Lealailepule Rimoni Aiafi: Lau Afioga i le Fofoga Fetalai, malie lou finagalo...

Afioga Hon FIAME NAOMI MATAAFA: E mafai ona faitala e solia ai le mamalu o le Faamasinoga lela ma solia ai le mamalu o le Palemene lenei.

Tofa Lealailepule Rimoni Aiafi: Ua tau pea le Afioga i le matou Taitai i le lauga atoa a le Afioga i le Palemia, ae o lea e le o i i le Afioga i le Taitai e tali mai.

FOFOGA FETALAI: Malie mai lau Afioga i le sui usufono mamalu, ana e maua mai lou agaga, se i faaiu saunoaga a le Taitai o le Malo, leaga o lea e i ai le tuutuuga, o lea foi e i ai le tou talosaga. O le mea lenei o lea ou te manatu ai, se i afulelea le saunoaga, ia, o i ina e maua ai le fesoasoani. O le mea lea, se i maea lelei le saunoaga a le Taitai o le Malo, ae lavapapale mai pea lau Afioga i le sui usufono mamalu. Faaauau le saunoaga a lau Afioga i le Palemia.

Afioga Hon FIAME NAOMI MATAAFA: Lau Afioga i le Fofoga Fetalai, ou te le iloa po o le a le sese o lau tala lea e fai atu. Ou te le iloa po o le a le sese. Ua faafofoga le atunuu i upu ma tala ia, ua pei o se meaula le Faamasinoga le la. Ua tuumamaina le tiute ma le valaauina ma le tofi o le sui usufono e soonafai ai lafoga faapea.

Lau Afioga i le Fofoga Fetalai, talofa i lo outou saunoa mai, faagalo, tatou agai i le lumanai. Ae ou te faapea atu lau Afioga i le Sui Taitai ma le mamalu

o lena Itu, ua mauaa le mavaega tuua a le Vaega Faaupufai lena i totonu o le Maota lenei ma totonu o Samoa ma lana faafofogaaga. O le sao lea. E mafai ona osofaia le Tulafono. E mafai ona faaoga le malosi o le tofi e fai ai mea e le tatau ona fai, ae amata atu lava iinei i sui usufono o le Maota lenei.

Lau Afioga i le Fofoga Fetalai, a faapea tatou te fesili o le a le fua, o lou lava taofi, e tatau ona tuu se fua maoae e taofi ai le fatu lea ua ola, ua tatau ona sei mai ona aa i totonu o le Palemene lenei.

O saunoaga i totonu o le Maota lenei, e le milia faauu a tatou upu. Lau Afioga i le Fofoga Fetalai, fai le upu ma le tala lena i feiloaiga a aiga po o nuu foi ma afioaga ona e vavalalata, ae a saofafai loa le mamalu o le atunuu i le Maota lenei, faaeteete le tagata i lana tautala, a ua sola le mea lena, leai se faaaloalo, ua avea le malosi ua faaogasese ai le tofi ma le valaauina i le tofi o le sui usufono.

I lenei lava taeao, e fai foi ma faataitaiga, o upu ma tala e taitaiseseina ai le faafofoga a le atunuu tainane o le Maota lenei, e a le saunoaga a le Sui Taitai, e leai se isi e lavea faalua, double jeopardy. O lea ua faapea mai, o lea ua lavevea sui usufono ia e toalua ua molia i le faaiuga a le Faamasinoga, a o lea foi ua toe fai atu e tatou le mataupu...

Tofa Lauofo Fonotoe Nuafesili Pierre Lauofo: Lau Afioga i le Fofoga Fetalai, ma lou faaaloalo tele lava ona o lea e le i tali le Afioga i le Taitai Komiti...

Afioga Hon FIAME NAOMI MATAAFA: Lau Afioga i le Fofoga Fetalai, se i uma atu pea lava lau tala e faamalamalama ai le double jeopardy lea na aumai.

FOFOGA FETALAI: Onosai mai pea se i maea mai le folasaga a le Tamaitai Palemia ona tuu atu foi lea o le avanoa...

Tofa Hon Lauofo Fonotoe Nuafesili Pierre Lauofo: E pei lava ona matou taumafai atu i le taimi ua tea, o matou lava ia manatu e pei o le matou galuega faa-Itu Agai. A tea atu lava, ia o outou lena. A o tulaga faapea, o le mea foi lea sa ou taumafai atu anataeao, aua o lea ua tele lava le saunoaga a le Tamaitai Palemia i le Taitai o lenei Itu ae le o i i e tali atu. E pei o vaega ia lau Afioga i le Fofoga Fetalai.

FOFOGA FETALAI: Ia o lea o le a faauma mai le saunoaga a le Palemia, ona...

Afioga Hon FIAME NAOMI MATAAFA: Lau Afioga i le Fofoga Fetalai, o le Sui Taitai o le Itu Agai, e le gata o le Sui Taitai a o le alii Loia, ona aumai ai lea o ituaiga faaupuga ia, double jeopardy, e le lavea faalua se

isi. E leai se isi o lavea faalua, ona o le double jeopardy, e fai i o, e ese a iinei. A o le isi faataitaiga ia o ituaiga faamatalaga e aumai, ma atagia mai ai e faapea e le iloa e le Palemene lenei le eseese o mea.

Lau Afioga i le Sui Taitai o le Itu Agai, e tele vale ae le valea uma foi.

Tofa Hon Lauofo Fonotoe Nuafesili Pierre Lauofo: Lau Afioga i le Fofoga Fetalai, e leai se isi na te fuuaoina le Maota lenei, e leai lava ma se isi na te fuuaoina le Maota lenei, ioe. O matou lava ia motugaafa lena e taumafai atu ai se matou lagona, ae le faapea... e leai se isi na te fuuaoina le Maota lenei.

FOFOGA FETALAI: Ia faafetai, o lea ua maua le manatu. Faafetai. Se i faauma atu lava le Palemia.

Tofa Hon Lauofo Fonotoe Nuafesili Pierre Lauofo: A o lea foi ua tele lava le agai mai o le Tamaitai Palemia i le Taitai o lenei Itu, o Ia lea o lea e tuuaia lenei mataupu, ae talofa e, e le o i ai se tala e mafai ona fai atu. Ia o le tulai atu lea lau Afioga.

FOFOGA FETALAI: Ia malie maia le sui usufono mamalu. Se i faamaea mai le saunoaga a le Palemia ona tuu atu lea o le avanoa.

Tofa Hon Lauofo Fonotoe Nuafesili Pierre Lauofo: O le a sou finagalo ae afai o le lafo lea e tau faatu mai, ua leva ona tatau ona faatu mai le lafo ae faagasolo le tatou galuega. O le a le lafo, aumai loa le lafo.

Afioga Hon FIAME NAOMI MATAAFA: Lau Afioga, ia malilie ia ua uma a outou saunoaga, se i taumafai atu foi sa matou faamatalaga. O le mea lea faapea o outou lava finagalo, e sao, ae faamolemole, se aumai le mea tonu. O lena e te silafia lelei lava le mea e tau o le double jeopardy, a o le faataitaiga lea, o le faiga lea e fai, e fai o iinei i totonu o le Maota, ae fai foi i le atunuu.

Lau Afioga i le Fofoga Fetalai, ia, o lea ua faapea mai e le o iinei le Susuga ia Tuilaepa e talifuaitau. O lea ua faamalamalama e le Afioga i le Taitaifono, maua le avanoa o le tali tusitusia, faitoalua e laua ma le sui usufono mo Faleata 3. Ia o le isi foi mea lea, e toalua i laua ae tasi le la tali. Ia, faafetai o lea e i i le sui usufono mamalu o Faleata 3. I le ma le isi lau Afioga, a tatou o foi e fai ma faataitaiga i le Faamasinoga lea na fai mai Lealailepule e le i faia se Faamasinoga na o le iloiloga. E le i manaomia ni molimau, na fai le Faamasinoga lea i luga o molimau tusitusia ma faamauina faaetulafono, maua ai le atoatoaga, fai ai le faaiuga. Ia, e faapena foi le mataupu a le Palemene lenei.

O lau upu mulimuli i le tatou mataupu lau Afioga i le Fofoga Fetalai, o le fautuaga ua tuuina mai e le Komiti ina ia tuueseina sui usufono se i i ai se aso. O lea na naunau mai nisi o finagalo ia uma nei, fai se fua, fai se faaiuga. Ua fesiligia foi le sao o lea fautuaga seia i ai se aso ma aumai ai Tulafono ma Tulafono Tumau. O lea lava e manino, e pule le Palemene i le taimi e fai ai ana faasalaga. O lona uiga, o le se i i ai se aso, o le taimi foi lea. O le saunoa mai e le uma nei ma o le a faaauau, ioe, e le uma nei, e le uma nei aua e le mafai lava ona tuuese le amio, ioe, le amio lea e tulai mai pea, a ia i ai se taimi tatou te mataitu ai pe i ai se aoga o le tatou faasoa lea ua fai nei. Pe moni upu o le tatou faasoa lea na fai nei, aua a na fai mai nei le Komiti po o le a le taimi ae avatu se finagalo o le Maota faapea atu, o le Nofoaiga atoa. A o lea e maua atu i le agaga o le faaiuga le mea lea ou te maua atu ma o lou foi faamoemoe lea, tatou tilotilo lelei i le mea lea e tupu i totonu o le Maota o Samoa. Aua e le uma, e le uma. E tou te saunoa mai lava, ae o lea lava e sau lava le siuleo, o le amio lea.

A fai e outou, leaga e tulaga ese. Ou te le iloa pe o le a le tulaga ese lea e aumai ai le fua lea. Ae na o le tasi lava le fua, o a tatou Tulafono Tumau. O le aloaia ma faaaloogia le Tulafono, ma le Faamasinoga. O le mea lena a sui usufono Samoa e fai.

Ae ou te faamalie atu lau afioga i le Fofoga Fetalai, ou te le iloa, ou te le iloa pe mafai ona toe faafoi mai le mamalu o le Palemene. Ae o le naunautaga lena, ia avea le mataupu lea, e fai ma lamepa e mumu pea, tatou te tilotilo i ai pe moni ia a outou saunoaga.

Pe moni le faamoemoe, aua lau afioga i le Fofoga Fetalai, aumai le maliega o le Harmony. O le mea muamua o le Harmony e le o se upu lena o le feagaiga na saina ai maua ma Tuilaepa. O le upu lea na saina ai maua ma Tuilaepa, Deed of settlement. Ae a faataunuu le mea lea e talosaga mai ai, e faaoga le Harmony Agreement, ia lau afioga i le Fofoga Fetalai, ou te faamalulu atu. O le a avea lea ma alofaga i le tatou agai i luma, a manatu lava le sui usufono e solipala le Palemene, ma soli Tulafono taualoa, faalala mai le Harmony Agreement. E le o le faamoemoe lena lau afioga i le Fofoga Fetalai.

E faaiu atu ai se matou faamatalaga, i lou tulaga, o au o le sui usufono. O le sui usufono o le itumalo o Lotofaga o le mea muamua lea. E pei lava o a outou afioga, o le tatou faitotoa lea i le Maota lea o tatou itumalo. Ae ou te tautala foi ma le faaaloalo o le Taitai o le Malo, ou te talia le fautuaga a le Komiti ua faataatia i luma o le Maota. Ma e faatalosagaina ai, ina ia tuu mai loa le fesili, ina ia talia le lipoti.

Tofa Lealailepule Rimoni Aiafi: Lau afioga i le Fofoga Fetalai...

FOFOGA FETALAI: Ia faafetai mo le saunoaga malamalama a lau afioga i le Taitai o le Malo. Ia ou te talitonu foi o lea lava sa tofu saunoa uma

lava le paia o le Maota. Ia ae taua foi le saunoaga manino a le Tamaitai Palemia, ia ona o lea sa oooo saunoaga a le Maota i le Harmony Agreement ma isi tulaga faapena.

O le ala foi lea o lou tuuavanao pea se i maea lelei le saunoaga a le Palemia po o le Taitai o le Malo, ona o lea lava sa lava foi avanoa sa tuuina atu i a outou afioga. Ia ae o le faaiuiu foi o le saunoaga a le Tamaitai Palemia, ia o lo o silasila alofa foi i leni faamoemoe aemaise le tulaga o i ai ia le tatou lipoti i totonu o le Palemene.

O le mea lea e i ai le manatu ia e... lau afioga i le sui usufono mai Faleata, e tatau foi ona e lagona mai le taua o le manatu lea e tau fai atu i lau afioga i le sui usufono mamalu.

Tofa Lealailepule Rimoni Aiafi: Faafetai i lau afioga i le Fofoga o le Fono. Ia e le toe faasilia foi se upu. O le mea lea na tau tulai atu ai lea na saunoa atu ai le afioga i le Sui Taitai, ona e alofa i le Taitai e le mafai ona tali atu i tuuaiga. Ia ae o lea foi ua uma ona ou faatoese e leai se isi mea. Ae o lea ua saunoa sao ia le afioga i le... ia o lea ua tau le ta, lea ua tauimasui.

Faafetai, manuia le Fono.

FOFOGA FETALAI: Ia, lau afioga i le Taitaifono pe i ai se isi mea...

Tofa Hon Laufo Fonotoe Nuafesili Pierre Laufo: Lau afioga i le Fofoga Fetalai, tulai atu ma le agaga faaaloalo, o lea foi ua faaiuiu ia le tatou mataupu, o lea ua sauni e tuu mai le fesili. Ia e leai foi so matou malosia e teena ai le fesili a aumai loa le fesili ua o tatou alo i le palota.

E pau lava lea o se mea ua ou tulai atu ai ma le faaaloalo, ia aua e le mafai ona avea au ma sui o le afioga i le Taitai. Ia aua o ana gaioiga ma tulaga foi o lona finagalo, ia o la lava e ia te ia. Ae maumau e, pe ana maua se avanoa e pei ona tatalo atu i le taeao ua tea, ia se i sausaunoa atu foi e talifuaitau i le anoano foi o mataupu e pei ona folasia mai e le saunoaga a le afioga i le Tamaitai Palemia.

Ia na pau lava o lea, ia lea ua faafofoga atu leni itu o le Maota, ia o tuualalo foi ma talosaga sa tuuina atu e afioga foi i sui usufono mamalu foi o leni itu, ia ua leai lea. O lea ua fai le finagalo o le afioga i le Tamaitai Palemia. E lagolagoina e le la foi itu o le malu ia le fautuaga e pei ona faataoto mai e le Komiti ma le afioga i le Taitaifono.

Ia e pau le matou tala, talosia ia muta ai i leni aso nei vaega. O le tatalo lava e pei ona taumafai atu foi, ia alo i luma ia lo tatou sa o la e faafofoga foi Samoa. E leai nisi manatu e toe faaopoopo o lea ua sausaunoa uma ia sui usufono mamalu. O se matou foi lena lagona, ia ae peitai, ia e ui lava ina ou lagona o se aso faanoanoa leni, ia au ia ma lou tulai ai i totonu o le Maota, ia ma lou taimi foi atoa na ou ulufale mai ai i totonu o le Maota, e talitonu o se aso faanoanoa leni i le Palemene.

Ui i lea, e le faia sou loto, e le faia foi i se mea ou te manao ai, ae o le tatalo, ia tatou agai i luma. O le a lava le tulaga e pei ona aumai le lafo i lenei itula o le aso, ia o le a tatou alo i le itu e pei ona i ai le finagalo o le Malo, le itu i le afioga i le Tamaitai Palemia.

Ia agalelei mai le Atua, toega o fuafuaga ma galuega o lenei aso, ia faapena ona alofagia e le Atua tulaga uma.

Na faamaonia le lafo ma tulai ai le Lipoti a le Komiti o Tulaga Aloaia ma Amio Tauloa ua faamaonia.

FOFOGA FETALAI: O lea ua talia ma faamaonia e le Fono Aoaofaitulafono le Lipoti a le Komiti o Tulaga Aloaia ma Amio Tauloa.

E tusa o tulaga aloaia o le tatou Galuega, e na ona ou toe afea lava o le tulaga lea mo le silafia. E talu ai o le aso fonofono lenei e amata faamamaluina ai le faaiuga a le Komiti e pei ona faamaonia e le Fono Aoaofaitulafono, e i ai le manatu o le Fofoga Fetalai, e ao lava ona aloaia ma faamamalu e le tatou Maota aemaise o sui usufono mamalu o lo o aafia i le faaiuga ua faamaonia.

I le usitaia foi o aiaiga o a tatou Tulafono Tumau, e le faatagaina se saunoaga i se mataupu ua maea ona faia iai le faaiuga a le Fono Aoaofaitulafono.

O lea ua o tatou taunuu mai i le faaiuga o galuega o lenei aso. O se avanoa foi e fia faaleo ai le agaga faafetai o le Nofoa i le paia o le Palemene. Le afio o lau afioga i le Taitai o le Malo, lau afioga i le Palemia, afifio Minisita o le Kapeneta faapea le Saofaiga o Minisita Lagolago, le paia o lea itu o le Maota le afio o lau afioga i le Sui Taitai, ia aemaise foi o sui usufono mamalu uma o le Palemene.

Ua faamalo le usufono i lenei aso, malo foi le faatoatoa. E fia faaleo foi se faafetai i tapuaiga a Ofisa Sili o Pulega o Matagaluega, Faalapotopotoga Tumaoti o le tatou Malo, malo le onosai. E le tau selu atu, o outou faiva o lo o tua i ai le Maota nei. Malo faafetai le tautua atunuu.

Le paia o Samoa i ona tafa e fia ma lau tapuaiga, e momoli atu le faafetai. Ua ae manu le alofaiva o lau Palemene i lenei aso ona o lau tatalo ma lau tapuaiga mana, malo faafetai.

Ou te faamalulu atu foi i le paia o le Palemene ma lo tatou Maota, aemaise le faafogafoga tapuai a le atunuu pele, afai ua sala se upu ma se aga a le Nofoa i lenei aso, ia e faamalulu atu. O le tatalo ia uimagalo se faaletonu i lo outou finagalo faale-Atua.

Ae tatou te le i tolopo, ou te tapa ma le faaaloalo lau afioga i le sui usufono mai i le itumalo palota o Gagaemauga 2, lau susuga i le Tiakono Toeaina, e saunia se tatou tatalo.

Na tolopo Taulumaga a le Fono Aoaio Faitulafono i le itula e 3:40 i le afiafi seia aulia le itula e 9:30 i le taeao o le Aso Lua, 31 o Me 2022.